

**आपूर्वमाणमचलप्रतिष्ठं समुद्रमापः प्रविशन्ति यद्वा ।
तद्भक्त्यामायं प्रविशन्ति सर्वे स शान्तिमाप्नोति न कामकामी ॥७०॥**

पार्था आणिकि ही परी । तो जाणों येईल अवधारी
जैसी अक्षोभता सागरी । अखंडीत ॥ ५६ ॥
जन्हीं सरिता उभ समस्त । परिपूर्ण होउनि मिलत ।
तन्हीं अधिकु नव्हे इषत् । मर्यादा न संडी ॥ ५७ ॥
ना तारे ग्रीष्मकालीं सरिता । शोषोनि जाति सर्वथा ।
परि न्यून नव्हे पार्था । समुद्र जैसा ॥ ५८ ॥
तैसा प्राप्ति ऋद्धिसिद्धि । तेयासि क्षोभु नाहीं बुद्धी ।
आणि न पवतां न वाधो । अभृति तेयातें ॥ ५९ ॥
साधें सूर्याचां घरीं । काइ प्रकाशु वातिवेन्हीं ।
किं न लविजे चि तारे आंधारीं । कोंडेल तो ॥ ६० ॥
देखैं रिद्धी चि तिया परी । आली गेली से न करी ।
तो विगुंतला असे आंतरीं । महामुखें ॥ ६१ ॥
जो आपुलेनि नागरपणें । इंद्रभवना पावले हणें ।
तो रंजे केवि पालिवणें । भिलांचेनि ॥ ६२ ॥
जो अमृतासि ठी ठेवी । तो कांजी जैसा न सेवी ।
तैसा स्वमुखानुभवीं । न भोगी रुद्धी ॥ ६३ ॥
पार्था हें नवल पाहीं । जेथ स्वर्गमुख लेखणिये नाहीं ।
तेथ रिद्धिसिद्धी इया काइ । प्राकृता होति ॥ ६४ ॥

विहाय कामान्यः सर्वान्पुमांश्चरति निस्पृहः ।

निर्ममो निरहंकारः स शान्तिमधिगच्छति ॥ ७१ ॥

ऐसा आत्मबोधें तोषला । जो परमानंदें पोखला ।
तो चि स्थिरप्रभु भला । बोलख तूं ॥ ६५ ॥
तो अहंकारातें जिणौनि । सकल कामना सांडूनि ।
विचरे विश्व होउनि । विश्वामाप्ति ॥ ६६ ॥

एषा ब्राह्मी स्थितिः पार्थ नैनां प्राप्य विमुह्यति ।

स्थित्वास्यामंतकालेपि ब्रह्मनिर्वाणमृच्छति ॥ ७२ ॥

हे ब्रह्मस्थिति निःसीम । जे अनुभवितां निष्काम ।

पातले परब्रह्म । अनायासें ॥ ६७ ॥

चिद्रूपिं मिलतां । देहांतिची व्याकुलता ।

आड ठाकों न शके चित्ता । आज्ञा जिया ॥ ६८ ॥

ते चि हे स्थिति । स्वमुखें श्रीपति ।

सांघतसे अर्जुनाप्रक्षि । संजयो हणे ॥ ६९ ॥

ऐसें कृष्णवाक्य आइकिलें । तेथ अर्जुनें मनीं हर्णितलें ।

आतां आमचेया चि काना आलें । उपपत्ती इया ॥ ३७० ॥

जें कर्मजात आघवें । एथ निराकारिलें देवें ।

तरि पाउखलें मियां जूझावें । हर्णोनियां ॥ ७१ ॥

ऐसा अच्युताचेया बोला । चित्ति धनुर्द्धर उवाइला ।

आतां प्रभु करील भला । शंकुनियां ॥ ७२ ॥

तो प्रसंगु असे नागर । जो सकल धर्मासि आगर ।

किं विवेकामृतसागर । प्रांतहीनु ॥ ७३ ॥

जो आपण सर्वज्ञ नाथु । निरूपिता होइल अनंतु ।

ते ज्ञानदेउ सांवैल मातु । निवृत्तिदासु ॥ ३७४ ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां योगशास्त्रे
श्रीकृष्णार्जुनसंवादे सांख्ययोगो नाम द्वितीयोऽध्यायः ॥

॥ श्रीकृष्णार्पणमस्तु ॥



ज्ञानेश्वरी

अध्याय तिसरा

अर्जुन उवाच ॥

ज्यायसी चेत्कर्मणस्ते मता बुद्धिर्जनार्दन ।

तत्किं कर्मणि घोरे मां नियोजयसि केशव ॥ १ ॥

मग अर्जुनें हणितलें । देवा तुह्मीं जें वाक्य बोलिलें ।

तें मियां परिसिलें । कमलापती ॥ १ ॥

तेथ कर्म आणि कर्त्ता । नुरे चि पल्हातां ।

ऐसें मत्त तूझे अनंता । निश्चित जरि ॥ २ ॥

तरि मातें केवि हरी । हणासि पार्था संग्रामु करीं ।

इये लाजसि ना घोरीं । कर्मीं सुंतां ॥ ३ ॥

हां गा तूं चि कर्म अशेष । निराकरिसि निःशेष ।

आणि मजकरविं हिंसक । करवीसि कां ॥ ४ ॥

तरि हें विचारीं हृषीकेशा । तूं मानु नेंदसि कर्मलेशा ।

आणि एसणी हे हिंसा । करवीतासि ॥ ५ ॥

व्यामिश्रेणैष वाक्येन बुद्धिं मोहयसीष मे ।

तदेकं वद निश्चित्य येन श्रेयोऽहमाप्नुयाम् ॥ ६ ॥

देवा तुवां चि ऐसें बोलावें । तरि नेणतां आर्हतीं काडू करावें ।

आतां सरलें हणों आघवें । विवेकाचें ॥ ६ ॥

हां गा उपदेशु जरि ऐसा । तरि अपभ्रंशु तो कैसा ।
 आतां पुरला पां धिवंसा । आत्मबोधाचा ॥ ७ ॥
 वैद्यु पथ्य वारुनि जाये । मग विष आपण चि सुये ।
 तरि रोगिया कैसेनि जिये । सांघें मज ॥ ८ ॥
 जैसें आंधलेया अब्हांटा । कां माजवणदान मर्कटा ।
 तैसा उपदेशु हा गोमटा । उडवला आह्मां ॥ ९ ॥
 मीं आदीं चि काहीं नेणें । वरि कवलिलां मोहें एणें ।
 कृष्णा विवेकु एया कारणें । पूसिला तूतें ॥ १० ॥
 तव तूझी एकएकि नवाई । एथ उपदेशामाझि गावाई ।
 तरि अनुसरलेया काई । बोज सांघें ॥ ११ ॥
 आह्मि तनुमनुजीवें । तूझेया बोला उठंगावें ।
 आणि तुवां चि ऐसें बोलावें । तरि सरलें हणें ॥ १२ ॥
 आतां ऐसिया परी बोविसी । तरि नीकें आह्मां करिसी ।
 एथ ज्ञानाची आश काइसी । अर्जुनु हणें ॥ १३ ॥
 तिये जाणिवेचें कीरु सरलें । परि आणिक एक असे जालें ।
 जें थीतें हें डहुललें । हृदय माझें ॥ १४ ॥
 तेविं चि कृष्णा तूमें । हें चरित्र काहीं नेणिजे ।
 जरि चित्त पाहांसि माझें । एणें मीसें ॥ १५ ॥
 ना तरि झांकवीनु आहासि मातें । किं तत्व चि कथिलें ध्वनितें ।
 हें अवगमितां निरुतें । जाणवे ना ॥ १६ ॥
 ह्मगौनि आइकें देवा । हा भावार्थु आतां न बोलावा ।
 मज विवेकु तो सांघावा । मन्हाटा जी ॥ १७ ॥
 मीं अत्यंतु जडु असें । परि ऐता ही नोकें परिहसें ।
 कृष्णा बोलावें तुवां तैसें । एकनिष्ठ ॥ १८ ॥
 देखैं रोगातें जीणावें । अथ तरि घेयावें ।
 परि तें रुचिकर होआवें । मधुर जैसें ॥ १९ ॥
 ९

तैसें सकलार्थभरित । तत्व सांघावें उचित ।
 परि बोधे माझे चित्त । जिया परीं ॥ २० ॥
 देवा तुज ऐसा निजगुरु । आजि आर्तिची वणि कां न करूं ।
 एथ भीड कवणाची धरूं । तूं माये आमची ॥ २१ ॥
 हां गा कामधेनूचें दुभतें । आणि दैवें जालें आपैंतें ।
 तरि कामनेची कां तेथें । वाणि कीजे ॥ २२ ॥
 जरि चितामणि हाता चडे । तरि वांसनेचें कवण सांकडें ।
 कां आपुलेनि सुरवाडें । इछावें ना ॥ २३ ॥
 देखैं अमृतसिंधुतें टाकावें । मग ताहाना जरि फूटावें ।
 तरि सायास कां करावे । मागील ते ॥ २४ ॥
 तैसां जन्मांतरीं बहुती । उपासितां लक्ष्मीपती ।
 तूं दैवें आजि हातीं । जालासि जरि ॥ २५ ॥
 तरि आपुलालिया सावेसा । कां न मगावासि परेशा ।
 देवा सुकाल हा मानसा । पाहल्या असे ॥ २६ ॥
 देखैं सकलास्तिचें जियालें । आणि पुण्य यशासि आलें ।
 हे मनोरथ जाले । निजई माझे ॥ २७ ॥
 जि परममंगलधामा । देवदेवोत्तमा ।
 तूं स्वाधीनु जी आह्वां । हणौनियां ॥ २८ ॥
 देखैं मातेचां ठांड । अपत्या अनवसरु नाहीं ।
 स्तन्यासि लागौनि पाई । जिया परीं ॥ २९ ॥
 तैसें देवा तूतें । पूसिजत असे आवडतें ।
 आपुलेनि आसैं । कृपानिधी ॥ ३० ॥
 तरि पारत्रिकीं हित । आणि आचरतां उचित ।
 तें साधें एक निश्चित । पार्थु हणें ॥ ३१ ॥

श्रीभगवानुवाच ॥

लोकेऽस्मिन्निविधा निष्ठा पुरा प्रोक्ता मयात्मनः ।

ज्ञानयोगेन सांख्यानां कर्मयोगेन योगिनाम् ॥ ३ ॥

तव येना बोला अच्युत । साधेन ह्मणे विस्मितु ।
 अर्जुना परिसैं हा ध्वनितु । अभिप्राउ ॥ ३२ ॥
 जें बुद्धियोगु सांगतां । सांख्यमतसंस्था ।
 प्रकटिली स्वभावता । प्रसंगें आह्मीं ॥ ३३ ॥
 तो उद्देशु तूं नेणसी चि । ह्मणौनि क्षोभलासि वायां चि ।
 तरि जाणैं आतां मियां चि । उक्ता दोन्हीं ॥ ३४ ॥
 अवधारीं वीरश्रेष्ठा । इये लोकीं इया दोन्हीं निष्ठा ।
 मज चि पासौनि प्रकटा । अनादिसिद्धा ॥ ३५ ॥
 एकं ज्ञानयोगु ह्मणिजे । तो सांख्य अनुष्ठिजे ।
 जेथ बोलखीसवें पाविजे । तद्रूपता ॥ ३६ ॥
 एरु कर्मयोगु जाण । जेथ साधकजन निपुण ।
 होउनियां निर्वाण । पावति वेळे ॥ ३७ ॥
 हे मार्ग तरि दोन्हीं । परि एकावटति निदानीं ।
 जैसी सिद्धसाध्यभोजनीं । तृप्ति एकि ॥ ३८ ॥
 कां पूर्वापर सरिता । भिन्ना दीसति पल्हातां ।
 मग सिंधुमिलणीं ऐक्यता । पावति शेषीं ॥ ३९ ॥
 तैसीं दोन्हीं इयें मतें । सूचीति एका चि कारणातें ।
 परि उपास्ति ते योग्यते । अधीन असे ॥ ४० ॥
 देखैं उत्पवनासारिसा । पक्षिया फलासि झोंबे जैसा ।
 साधें नरु केवि तैसा । पावे वेगें ॥ ४१ ॥
 तो हळहळ ढालें । केतुकेनि एके वेळे ।
 मार्गाचेजि बलें । निश्चित टाकी ॥ ४२ ॥

तैसैं विहंगममते । अधिष्ठानि झुनाते ।
 सांख्य सद्य मोक्षाते । आकलित ॥ ४३ ॥
 एर योगिये कर्माधारें । विहितें चि निजाचारें ।
 पूर्णता अवसरें । पावते होंति ॥ ४४ ॥

न कर्मणामनारंभात्तैष्कर्म्यं पुरुषोऽश्नते ।

न च संन्यासनादेव सिद्धिं समधिगच्छति ॥ ४ ॥

वांचूनि कर्मरंभ उचित । न करितां सिद्धवत ।
 कर्महीना निश्चित । होइजे ना ॥ ४५ ॥
 कां प्राप्त कर्म सांडिजे । एतुलेनि नैष्कर्म्या होइजे ।
 हें अर्जुना वायां चि बोलिजे । मूर्खपणें ॥ ४६ ॥
 सांघें पैल तीरा जावें । ऐसैं व्यसन जेथ पावे ।
 तेथ नावेतें त्यजावें । वडे केवि ॥ ४७ ॥
 ना तरि तृप्ति इछिजे । तरि कैसेनि पाकु न कीजे ।
 कां सिद्ध ही न सेविजे । केवि सांघें ॥ ४८ ॥

न हि कश्चित्क्षणमपि जातु तिष्ठत्यकर्मकृत् ।

कार्यते ह्यवशः कर्म सर्वः प्रकृतिजैर्गुणैः ॥ ५ ॥

जवं निरासता नाही । तवं व्यापार असे पाइ ।
 मग संतुष्टिचां ठाई । कुटे साहाजें ॥ ४९ ॥
 हणौनि आइकें पार्था । जेया नैष्कर्म्यपदीं आस्था ।
 तेया उचित कर्म सर्वथा । त्याज्य नोहे ॥ ५० ॥
 आणिक आपुलिये चाडे । गा आपादिलें हें मांडे ।
 किं त्यजिलें कर्म सांडे । ऐसैं आहे ॥ ५१ ॥
 हें वायां चि सैरा बोलिजे । उकलु तरि देखों पाहिजे ।
 परि त्यजितां कर्म न त्यजे । निभ्रान्त मानीं ॥ ५२ ॥
 जवं प्रकृतिचें अधिष्ठान । तवं सांडि मांडि हें अज्ञान ।
 जे चेष्टा ते गुणाधीन । आपैसी असे ॥ ५३ ॥

देखैं विहित कर्म जेतुलें । तें सकल जन्हीं असंडिलें ।
 तारि स्वभाव काइ निमाले । इंद्रियांचे ॥ ५४ ॥
 सांघें श्रवणें आइकों ठेलें । किं नेत्रांचें तेज गेलें ।
 हें नासारंध्र बुजालें । परिमलु नेघे ॥ ५५ ॥
 कां प्राणपानगती । खलन जालें इये मती ।
 किं क्षुधातृषादि आर्त्ता । खुंटलिया ॥ ५६ ॥
 हे स्वप्नावबोध ठेले । किं चरण चालों विसरले ।
 हें असो काइ निमाले । जन्ममृत्यू ॥ ५७ ॥
 हें न टके चि जरि पाइ । तारें सांडिलें एथ काई ।
 ह्मणोनि कर्मासि त्यागु नाही । प्रकृतिमंतां ॥ ५८ ॥
 कर्म पराधीनपणें । निफजतसे प्रकृतिगुणें ।
 एरि धरी मेकली अंतःकरणें । वाहिजे वायां ॥ ५९ ॥
 देखैं रथीं आरुढां होइजे । मग जन्हीं निश्चलां बैसिजे ।
 तन्हीं चलां होउनि हींडिजे । परतंत्रता ॥ ६० ॥
 कां उचललें वायुवसें । शुष्कलें पत्र जैसें ।
 निश्चेष्ट आकाशें । परिभ्रमें ॥ ६१ ॥
 तैसें प्रकृति आधारें । कर्मेन्द्रियें विकारें ।
 नैष्कर्म्य हीं व्यापारे । निरंतर ॥ ६२ ॥
 ह्मणौनि संगु जवं प्रकृतिचा । तवं त्यागु न घडे कर्माचा ।
 एथ करूं ह्मणति तेयांचा । आग्रहो चि उरे ॥ ६३ ॥

कर्मेन्द्रियाणि संयम्य य आस्ते मनसा स्मरन् ।

इन्द्रियार्थान्विमूढात्मा मिथ्याचारः स उच्यते ॥ ६ ॥

जे उचित कर्म सांडिति । मग नैष्कर्म्य हीं पाहांति ।
 पारि कर्मेन्द्रियप्रवृत्ति । निरुधुनि ॥ ६४ ॥
 तेयां कर्मत्यागु न घडे । जें कर्तव्य मनीं सांपडे ।
 वरि नटति ते कुडें । दरिद्र जाण ॥ ६५ ॥

भाषार्थदीपिका.

ऐसे ते पार्था । विषयासक्त सर्वथा ।
अलखावे अन्यथा । भ्रांति नाही ॥ ६६ ॥
यस्त्विन्द्रियाणि मनसा नियम्यारभतेऽर्जुन ।
कर्मैन्द्रियैः कर्मयोगमसक्तः स विशिष्यते ॥ ७ ॥
आतां देइ अवधान । प्रसंगें तुज सांघेन ।
एया निराशाचें चिन्ह । धनुर्वरा ॥ ६७ ॥
जो आंतरीं दृढ । परमात्मरूपीं गूढ ।
बाह्ये तरि रूढ । लौकिकु जैसा ॥ ६८ ॥
जो इंद्रियां आज्ञा करी । विषयांचें भय न धरी ।
प्राप्त कर्म नव्हेरी । उचित जें जें ॥ ६९ ॥
कर्मैन्द्रियें कर्मी । राहटतां तरि नियमी ।
परि तेथिचिया उमी । झांकोले ना ॥ ७० ॥
जो कामनामात्रें न वेपे । मोहमलें न लिपे ।
जैसें जलीं जलें न सिंघे ! पद्मपत्र ॥ ७१ ॥
तैसा संसर्गामाजि असे । सकलांसारिखा दीसे ।
जैसें तोयसंगें आभासे । भानुविंब ॥ ७२ ॥
तैसा सामान्यत्वे पाहिजे । तारि साधारणू चि देखिजे ।
यन्हवि निर्द्धारितां नेणिजे । सोय जेयाची ॥ ७३ ॥
ऐसा चिन्ह चिन्हतु । देखसी तो चि मुगतु ॥
आशापाशरहितु । अलख पां ॥ ७४ ॥
अर्जुना तो चि गा योगी । विशेषिजे जगीं ।
ह्मणौनि ऐसा होथे ययालागि । ह्मणिपें तूतें ॥ ७५ ॥
नियतं कुरु कर्म त्वं कर्म ज्यायो ह्यकर्मणः ।
शरीरयात्रापि च ते न प्रसिद्ध्येदकर्मणः ॥ ८ ॥
तूं मानसासि नियमु करीं । निश्चल होउनि आंतरीं ।
मग कर्मैन्द्रियें व्यापारीं । वर्ततु सुखें ॥ ७६ ॥

हणसि निष्कर्मा जरि होवावें । तारि येथ तें न संभवे ।
 आणि निषिद्ध केविं राहाटावें । विचारि पां ॥ ७७ ॥
 हणौनि जें जें उचित । आणि अवसरें करुनि प्राप्त ।
 तें कर्म हेतुरहित । आचार तूं ॥ ७८ ॥
 पार्था आणि क ही एक । नेणसि तूं कवतिक ।
 जैसैं कर्म चि मोचक । आपैसैं असे ॥ ७९ ॥
 देखैं अनुक्रमाधारे । धर्म जो आचरे ।
 तो मोक्ष तेणें व्यापारे । निश्चित पावे ॥ ८० ॥

यज्ञार्थात्कर्मणोऽन्यत्र लोकोऽयं कर्मबंधनः ।

तदर्थं कर्म कौंतेय मुक्तसंगः समाचर ॥ ९ ॥

स्वधर्म जो बापा । तो नित्ययज्ञ जाण पां ।
 हणौनि वर्ततां तेथ पापा । संचार नाही ॥ ८१ ॥
 हा निजधर्म जें सांडे । कुकर्म रति घडे ।
 तें चि बंधु पडे । संसारिकु ॥ ८२ ॥
 हणौनि स्वधर्मनुष्ठान । तें अखंड तुज यजन ।
 जो करी तेया बंधन । कहीं नाही ॥ ८३ ॥
 हा लोक कर्म बांधला । जो परतंत्र असे भूतला ।
 तो नित्ययज्ञातें असे चूकला । हणौनियां ॥ ८४ ॥

सहायज्ञाः प्रजाः सृष्ट्वा पुरोवाच प्रजापतिः ।

अनेन प्रसविष्यध्वमेव वोऽस्त्वष्टकामधुक् ॥ १० ॥

आतां इये चि विखैं पार्था । तुज मी सांघेन एकि कथा ।
 जें श्रिष्टि आदि संस्था । ब्रह्मेनि केली ॥ ८५ ॥
 तै नित्ययागसहिते । सृजिलीं भूतें समस्तें ।
 परि नेणति चि तियें यज्ञातें । सूक्ष्म हणौनि ॥ ८६ ॥
 तेव्हलि प्रजीं विनविला ब्रह्मा । देवा आश्रो काइ एथ आह्मां ।
 तव ते हणे कमलजन्मा । भूतां प्रति ॥ ८७ ॥

तुझां वर्णविशेषवसें । आह्मीं यज्ञु स्वधर्मु विहिला असे ।
 एयातें उपासा मग आपैसैं । काम पुरती ॥ ८८ ॥
 तुझीं व्रतनियम न करावें । शरीरातें न पीडावें ।
 दुरिकें हीं न वचावें । तीर्थाति गा ॥ ८९ ॥
 योगादिकें साधनें । साकाक्षे आराधनें ।
 मंत्रयंत्रविधानें । झनें करा ॥ ९० ॥
 देवतांतरा भजावें । हें सर्वथा न करावें ।
 स्वधर्मयज्ञ यजावें । अनायासें ॥ ९१ ॥
 अहेतुकेनि चितें । अनुष्टा पां एयातें ।
 पतिव्रता पतितें । जेया परीं ॥ ९२ ॥
 तैसा स्वधर्मुरु मखु । हा चि सेव्यु तुझां येकु ।
 ऐसैं सत्यलोकनायकु । बोधा जाला ॥ ९३ ॥
 देखां स्वधर्मातें भजाल । तरि कामवेनु हा होईल ।
 यन्हविं प्रजा हा चि नाडील । तुमतें सदा ॥ ९४ ॥

देवान्भावयतानेन ते देवा भावयंतु वः ।

परस्परं भावयंतः श्रेयः परमवाप्स्यथ ॥ ११ ॥

ऐणेंकरुनि समस्तां । परितोखु होईल देवतां ।
 मग ते तुझां इछितां । अर्थातें देति ॥ ९५ ॥
 एया स्वधर्मपूज्य पूजितां । देवगणां समस्तां ।
 योगक्षेमु निश्चिता । करिति तुमचा ॥ ९६ ॥
 तुझीं देवां जेया भजाल । ते देव तुझां तुष्टतील ।
 ऐसी परस्परें घडेल । प्रीति जेथ ॥ ९७ ॥
 तेथ तुझां जें करूं ह्मणाल । तें आपैसैं सिद्धी जाईल ।
 वांछित ही पुरैल । मानसिचें ॥ ९८ ॥
 बाचासिद्धि पावाल । आज्ञापक होआल ।
 ह्मणियें तुमतें मागतील । महासिद्धि ॥ ९९ ॥

जैसैं रितुपतिचें द्वार । वनश्री निरंतर ।
उलगे फलभार । लावण्येसीं ॥ १०० ॥

इष्टान्भोगान्हि वो देवा दास्यन्ते यज्ञभाविताः ।
तैर्दत्तानप्रदायैभ्यो यो भुङ्क्ते स्तेन एव सः ॥ १२ ॥

तैसैं सर्वमुखें सहित । दैव चि मूर्तिमंत ।
एईल देखां काढत । तुझां पाठीं ॥ १ ॥
ऐसे समस्तभोगभरित । होआल तुझीं अनार्त्त ।
जरि स्वधर्मैकनिरत । वर्ताल बापा ॥ २ ॥
कां जालिया सकल संपदा । जो अनुसरैल इंद्रियमदा ।
लुब्ध होउनि आस्वादा । विषयांचेया ॥ ३ ॥
तिहीं यज्ञभावितीं सुरीं । जे हे संपत्ति दिधली पुरी ।
तिया स्वमार्गे सर्वेश्वरीं । न भजैल जो ॥ ४ ॥
अग्निमुखीं हावन । न करील देवतापूजन ।
प्राप्ते वेले भजन । ब्राह्मणाचें ॥ ५ ॥
विमुख होईल गुरुभक्ती । आदरु न करिल आतिथि ।
संतोषु नेंदील ज्ञाती । आपुल्लिए ॥ ६ ॥
ऐसा स्वधर्मक्रियारहितु । आथिलेपणें माजतु ।
केवल भोगासक्तु । होईल जो ॥ ७ ॥
तेयातें मग अपाउं थोरु होए । जेणें तें हातिचें सकल जाए ।
देखां प्राप्त ही न लाहे । भोग भोगुं ॥ ८ ॥
जैसैं गतायुषे शरीरीं । चैतन्य वासु न करी ।
कां निदैवांचां मंदिरीं । न न्हाय लक्ष्मी ॥ ९ ॥
तैसा स्वधर्म जरि लेपला । तरि सर्व मुखाचा धारा मोडला ।
जैसा दीपासवें हारतला । प्रकाशु जाए ॥ ११० ॥
तैसी निजवृत्ति जेथ सांडे । तेथ स्वतंत्रते वस्ति न घडे ।
आइकां प्रजा हो हें फुडे । विरिंची हणने ॥ ११ ॥

भावार्थदीपिका.

हगौनि स्वधर्मु जो सांडील । तेयातें कालु दंडील ।
 चोरु हगौनु हरिल । सर्वस्व तेयाचें ॥ १२ ॥
 मग सकल दोष भवते । गिंवसूनि घेंति तेयातें ।
 रात्रीसमैं स्मशानातें । भूतें जैसीं ॥ १३ ॥
 तैसीं त्रिभुवनिचीं दुःखें । आणिक नानाविधें पातकें ।
 दैन्यजात तेतुकें । तेथ चि वसे ॥ १४ ॥
 ऐसें होए तेया उन्मत्ता । मग न सुटे बापा रुदातां ।
 परि कल्पांति हिं सर्वथा । प्राणिगण हो ॥ १५ ॥
 हगौनि निजवृत्ति हे न संडावीं । इंद्रियें बरलों नेंदावीं ।
 ऐसें प्रजातें सिकवीं । चतुराननु ॥ १६ ॥
 जैसैं जलचरां जल सांडे । आणि ततक्षणीं मरण घडे ।
 हा स्वधर्मु हीं तेणें पाडे । विसंभों नए ॥ १७ ॥
 हगौनि तुह्मीं समस्तीं । आपुलां कर्मीं उचितीं ।
 निरतां होआवें हें पुढुतीं पुढुतीं । हणिमत असे ॥ १८ ॥

यज्ञाशिष्टाशिनः संतो मुच्यन्ते सर्व किल्बिषैः ।

भुंजते तेत्त्वधं पापा ये पचंत्यात्मकारणात् ॥ १३ ॥

देखैं विहितक्रियाविधी । निहेंतुका बुद्धी ।
 जो असतिये समृद्धी । विनियोगु करी ॥ १९ ॥
 गुरु गो अग्नि पूजी । अवसरें भजे द्विजीं ।
 निमित्तादिकीं यजी । पितरोद्देशें ॥ २० ॥
 इया यज्ञक्रिया उचिता । यज्ञेंसीं हवन करितां ।
 हुतशेष स्वभावता । उरे जें जें ॥ २१ ॥
 तें सुखें आपुलां घरीं । कुटुंबेंसीं भोजन करी ।
 किं भोग्य चि ते निवारी । कल्मषातें ॥ २२ ॥
 तें यज्ञाशिष्ट भोगी । हगौनि सांडिजे गा तो अर्घी ।
 जिया परीं महारोगी । अमृतसिद्धि ॥ २३ ॥

कां तत्त्वनिष्ठु जैसा । ना गवे भ्रांतिलेसा ।
 तो दोष भोगी तैसा । ना कले दोषां ॥ २४ ॥
 क्षणौनि स्वधर्मे जे जे आजें । ते स्वधर्मे चि बित्तिसौमिजे ।
 मग उरे ते भोगिजे । संतोषेसीं ॥ २५ ॥
 हें वांचूनि पार्था । राहाटों न ये अन्यथा ।
 ऐसी आद्य हे कथा । मुरारि सांघे ॥ २६ ॥
 जे देह चि आपणपें मानिति । आणि विषयांतें भोग्य क्षणति ।
 यया परीते न स्मरति । आणिक कांहीं ॥ २७ ॥
 हें यज्ञोपकरण सकल । नेणत सांते बरल ।
 अहंबुद्धी केवल । भोगूं पाहांति ॥ २८ ॥
 इंद्रियरुची सारिखे । करवीति पाक नीके ।
 ते पापिये पातकें । सेविति जाणें ॥ २९ ॥
 जें संपत्तिजात आघवें । हें हवनद्रव्य मानावें ।
 मग स्वधर्मयज्ञें अर्पावें । आदिपुरुषीं ॥ ३० ॥
 हें सांडूनियां मूर्ख । आपणपेया लागि देख ।
 निफजवीति पाक । नानाविध ॥ ३१ ॥
 जिहि यज्ञ सिद्धी जाये । परेशा संतोषु होये ।
 तें हें सामान्य अन्न नोहे । क्षणौनियां ॥ ३२ ॥

अज्ञान्द्रवन्ति भूतानि पर्जन्यादन्नसंभवः ।

यज्ञान्द्रवति पर्जन्यो यज्ञःकर्मसमुद्भवः ॥ ३३ ॥

हें न क्षणावें साधारण । अन्न ब्रह्मरूप जाण ।
 तें जीवनहेतू जाण । विश्वा एया ॥ ३३ ॥
 अन्ना तव भूतें । प्ररोहो पावति समस्तें ।
 मग वर्षु एया अन्नातें । सर्वत्र प्रसवें ॥ ३४ ॥
 तेया पर्जन्या यज्ञीं जन्म । यज्ञातें प्रकटी कर्म ।
 क्षणौनि कर्मासि आदि ब्रह्म । वेदरूप ॥ ३५ ॥

कर्म ब्रह्मोद्भवं विद्धि ब्रह्माक्षरसमुद्भव ।

तस्मात्सर्वगतं ब्रह्म नित्यं यज्ञे प्रतिष्ठितम् ॥ १५ ॥

मग वेदातें परापर । प्रसवतसे अक्षर ।

ह्यणौनि हें चराचर । ब्रह्मबंध ॥ ३६ ॥

परि कर्माचिया मूर्ती । यज्ञीं अधिवासु श्रुती ।

आइकें सुभद्रापती । अखंड गा ॥ ३७ ॥

एवं प्रवर्तितं चक्रं नानुवर्त्तयतीह यः ।

अधायुरिन्द्रियारामो मोघं पार्थ स जीवति ॥ १६ ॥

हे ऐसी आदिपरंपरा । संक्षेपें तुज धनुर्द्धरा ।

सांधितली एया अध्वरा । लागौनियां ॥ ३८ ॥

ह्यणौनि समूल हा उचितु । स्वधर्मरूपु कतु ।

ननुष्टी जो मत्तु । लोकीं इये ॥ ३९ ॥

तो पातकांचा रासि । जाण भार भूमीसि ।

जो कुकर्में इंद्रियांसि । उपेगा गेला ॥ १४० ॥

तें जन्मकर्म सकल । अर्जुना अतिनिष्फल ।

जैसैं कां अभ्रपटल । अकालिचें ॥ ४१ ॥

कां गला स्तन अजेचे । तैसैं जियालें देख तेयाचें ।

जेया अनुष्ठान स्वधर्माचें । घडे चि ना ॥ ४२ ॥

ह्यणौनि आइकें पांडवा । स्वधर्मु कन्हणीं न संडावा ।

सर्वभावे भजावा । हा चि येकु ॥ ४३ ॥

हां गा शरीर जरि जालें । तरि कर्तव्य हें ओघें आलें ।

मग उचित कां आपुलें । उ०संडावें ॥ १४४ ॥

यस्त्वात्मरतिरेव स्यादात्मतृप्तश्च मानवः ।

आत्मन्येव च संतुष्टः तस्य कार्यं न विद्यते ॥ १७ ॥

देखैं असतेनि देहधर्में । एथ तो एकु न सिंपे कर्में ।

जो अखंडित रमे । आपणपां ॥ ४५ ॥

जें तो आत्मबोधें तोषला । तारि कृतकार्यु देखैं जाला ।
 ह्मणौनि सहजें सांडला । कर्मसंगु ॥ ४६ ॥
 तृप्ति जालेयां जैसीं । साधनें सरति आपैसीं ।
 देखैं आत्मतुष्टी तैसीं । कमें नाहीं ॥ ४७ ॥

नैव तस्य कृतेनार्थो नाकृतेनेह कश्चन ।

न चास्य सर्वभूतेषु कश्चिदर्थव्यपाश्रयः ॥ १८ ॥

जवं वेरि अर्जुना । तो बोधु न भेटे मना ।
 तवं चि येया साधना । भजावें लागे ॥ ४८ ॥

तस्मादसक्तः सततं कार्यं कर्म समाचर ।

असक्तो ह्याचरन्कर्म परमाप्नोति पूरुषः ॥ १९ ॥

ह्मणौनि तूं नियतु । सकल कामरहितु ।
 होउनियां उचितु । धर्म राहाट ॥ ४९ ॥
 जे स्वकर्मा निष्कामता । अनुसरले गा पार्था ।
 ते कैवल्य परम तत्वता । पातले जगीं ॥ १५० ॥

कर्मणैव हि संनिद्धिमास्थिता जनकादयः ।

लोकसंग्रहमेवापि संपश्यन्कर्तुमर्हसि ॥ २० ॥

देख पां जनकादिक । कर्मजात अशेष ।
 न संडितां चि मोक्षसुख । पावते जाले ॥ ५१ ॥
 एया कारणें पार्था । होआवी कर्मी आस्था ।
 हें आणिका ही एका अर्था । उपकरैल ॥ ५२ ॥

यद्यदाचरतिश्रेष्ठस्तत्तदेवेतरो जनः ।

स यत्प्रमाणं कुरुते लोकस्तदनुवर्तते ॥ २१ ॥

जें आचरतां आपणपेया । देखि लागैल लोका येया ।
 तारि चूकैल हा अपाया । प्रसंगें चि ॥ ५३ ॥
 देखैं प्रसार्थ जाले । जे निष्कामता पातले ।
 तेनां हीं कर्तुं असें उरलें । लोकांलागि ॥ ५४ ॥

मार्गि अंधासरिसा । पुढां देखणा हीं चाले जैसा ।
 अज्ञा प्रकटावा धर्मु तैसा । जाणतेन ॥ ५५ ॥
 हां गा जरि ऐसें न कीजे । तरि अज्ञाना काइ बोजे ।
 तेहि कवणी प्रीं जाणिजे । मार्गातें ॥ ५६ ॥
 एथ बडिल जें जें कारिति । तेया नाव धर्मु ठेविति ।
 तो चि एर अनुष्ठिति । सामान्य सकल ॥ ५७ ॥
 हें ऐसें असे स्वभावें । ह्यणौनि कर्म न संडावें ।
 विशेषें आचरावें । लागे संतीं ॥ ५८ ॥

न मे पार्थास्ति कर्तव्यं त्रिषु लोकेषु किंचन ।

नान्वासमवासव्यं वर्त्त एव च कर्मणि ॥ २२ ॥

आतां आणिकाचिया गोठी । तुज सांघों काइ किरीडी ।
 देखैं मीं चि कीं इये राहाटी । वर्त्तत असे ॥ ५९ ॥
 काइ सांकडे काहीं मातें । किं कव्हणें येकें आचें ।
 अनुचरें मीं कर्मातें । ह्यणसि जरि ॥ ६० ॥
 तरि पुरतेपणालागि । आणिकु दुसरा नाहिं जमि ।
 ऐसी सामग्री माझां आंगीं । जाणसी तूं ॥ ६१ ॥
 पारि स्वधर्मि वर्त्तें कैसा । साकांक्षु कां होये जैसा ।
 तेया चि एका उद्देशा । लागौनियां ॥ ६२ ॥

यदि ह्यहं न वर्त्तेयं जातु कर्मण्यतन्द्रितः ।

मम मर्तानुवर्त्तते मनुष्याः पार्थ सर्वशः ॥ २३ ॥

जें भूतजात सकल । असे आझां चि अधीन केवल ।
 तरि न व्हावें हे बरल । ह्यणौनियां ॥ ६३ ॥
 आझि पूर्णकाम होउनि । जरि आत्मस्थिती राहुनि ।
 तरि प्रजा हे कैसेनि । निस्तरैल ॥ ६४ ॥

उत्सीदेयुरिमे लोका न कुर्या कर्म चेदहम् ।

संकल्प्य च कर्त्ता स्यामुपहन्यामिमाः सृजाः ॥ २४ ॥

इया आमची वास पावी । मग वर्तती परी जाणावी ।
ते लौकिकस्थिति आववी । नाशली होईल ॥ ६५ ॥

सक्ताः कर्मण्यविद्वांसो यथा कुर्वन्ति भारत ।

कुर्याद्विद्वांस्तथासक्तश्चिकीर्षुर्लोकसंग्रहम् ॥ २५ ॥

हणौनि समर्थु जो एथें । आणि लाणि सर्वज्ञते ।

तेणें सविशेष कर्मातें । त्याजावें ना ॥ ६६ ॥

देखें फलाचिया आशा । आचरे कां मूर्खु जैसा ।

कर्मि भरु होआवा तैसा । निराशा ही ॥ ६७ ॥

जें पुढुतीं पुढुतीं पार्धा । हे सकललोकसंस्था ।

रक्षणीय गा सर्वथा । हणौनियां ॥ ६८ ॥

मार्गाधारें वर्तावें । विश्व हें मोहरे लावावें ।

अलौकिकां नोहावें । लोकाप्रति ॥ ६९ ॥

जें सायासें स्तन्य सेवी । तें पकानें केवि जेवी ।

हणौनि बालका जैसीं नेंदावी । धनुर्दरा ॥ १७० ॥

न बुद्धिभेदं जनयेदज्ञानां कर्मसंगिनाम् ।

जोषयेत्सर्वकर्माणि विद्वान्युक्तः समाचरेत् ॥ २६ ॥

तैसी कर्मि जेया योग्यता । तेया प्रति नैष्कर्म्यता ।

न प्रकटावी खेलतां । आदिकरुनि ॥ ७१ ॥

तेथ सत्क्रिया चि लावावी । ते चि एकि प्रशंसावी ।

नैष्कर्मि हीं दावावी । आचरौनि ॥ ७२ ॥

तेया लोकसंग्रहालागि । वर्ततां कर्मसंगीं ।

तो कर्मबंधु आंगीं । वाजेल ना ॥ ७३ ॥

प्रकृतेः क्रियमाणानि गुणैः कर्माणि सर्वशः ।

अहंकारविमूढात्मा कर्त्ताहमिति मन्यते ॥ २७ ॥

देखें पुढिलाचें ओढें । जरी आपलां माथां घेइजे ।

तारि सांगें कां न दटिजे । धनुर्दरा ॥ ७४ ॥

तैसीं ह्युभाशुभ कर्म । निफजती प्रकृतिधर्म ।
 तिये मूर्ख मतिभ्रमे । मी कर्त्ता ह्यणे ॥ ७५ ॥
 ऐसा अहंकाररूढ । एकदेशी मूढ ।
 तेया परमार्थ गूढ । प्रकटावा ना ॥ ७६ ॥
 जें तत्वज्ञाचां ठांड । तो प्रकृतिभावो नाहिं ।
 जेथ कर्मजात पाई । निफजत असे ॥ ७७ ॥
 तो देहाभिमानु सांडूनि । गुणकर्म उल्लखौनि ।
 साक्षिभूत होउनि । वर्त्ते देहीं ॥ ७८ ॥

तत्त्ववित्तु महाबाहो गुणकर्मविभागयोः ।

गुणागुणेषु वर्त्तते इति मत्वा न सज्जते ॥ २८ ॥

ह्यगौनि शरीरिं जन्हें होति । तन्हीं कर्मबंधें बाधति ।
 जैसा भूतचेष्टा गभस्ती । वेपवे ना ॥ ७९ ॥
 एथ कर्म तो चि लिपे ! जो गुणसंभ्रमें वेपे ।
 प्रकृतिचेनि आटोपें । वर्त्ततु असे ॥ १८० ॥
 इंद्रियें गुणाधारें । राहाटति निजव्यापारें ।
 तें परकर्म बलात्कारें । आपादि जो ॥ ८१ ॥

प्रकृतेर्गुणसंमूढाः सज्जन्ते गुणकर्मसु ।

तानकृत्स्नविदो मंदान्कृत्स्नविभ्र विचालयेत् ॥ २९ ॥

मयि सर्वाणि कर्माणि संन्यस्याध्यात्मचेतसा ।

निराशीर्निर्ममो भूत्वा युध्यस्व विगतज्वरः ॥ ३० ॥

हें असो आतां प्रस्तुत । सांघिजैल तुज हित ।
 तें अर्जुना देउनि चित्त । अवधारि पां ॥ ८२ ॥
 तारि उचितें कर्म आघवीं । तुवां आचरौनि मज अर्पावी ।
 परि चित्तवृत्ति हे न्यसावी । आत्मरूपीं ॥ ८३ ॥
 हें कर्म मी कर्त्ता । आचरैन मी येया अर्था ।
 ऐसा अभिमान झनें चित्ता । रिगों देसी ॥ ८४ ॥

तुवां शरीरपरां नोहावें । कामनाजात सांडावें ।
 मग अवसरोचित भोगावे । भोग सकल ॥ ८५ ॥
 आतां कोदंड घेउनि हातीं । आरूढ पां इण रथीं ।
 देइं आलिंगन वीरवृत्ती । समाधानें ॥ ८६ ॥
 जर्गीं कीर्तितें रूढवीं । स्वधर्माचा मानु वाढवीं ।
 येया भारापासौनि सोडवीं । मेदिनी हे ॥ ८७ ॥
 आतां पार्था निःशंकु होइं । एया संग्रामा चित्त देइं ।
 एथ हें वांचूनि काहीं । करूं नैण ॥ ८८ ॥

ये मे मदमिदं नित्यमनुतिष्ठन्ति मानवाः ।

श्रद्धावन्तो न स्रूयन्ते मुच्यन्ते तेऽपि कर्मभिः ॥ ३१ ॥

ऐसें अनुपरोध मत माझें । जिहिं परमादरें स्वीकारिजे ।
 श्रद्धासूं अनुष्ठिजे । धनुर्द्धरा ॥ ८९ ॥
 ते हीं सकल कर्मीं वर्तत । जाण पां कर्मरहित ।
 हणौनि हें निश्चित । करणीय गा ॥ १९० ॥

ये त्वेतदभ्यसूयन्तो नानुतिष्ठन्ति मे मतम् ।

सर्वज्ञानविमूढान्स्तान्विद्धि नष्टानचेतसः ॥ ३२ ॥

नां तारि प्रकृतिमंत होउनि । इंद्रियां लला देउनि ।
 जे हें मत माझें अव्हेरुनि । असंडिति ॥ ९१ ॥
 जे सामान्यत्वे विशेषिति । अवज्ञा करूनि देखति ।
 कां हा अर्थवादु हणति । वाचालपणें ॥ ९२ ॥
 ते मोहमदिरा भ्रमले । विषयविखें घारले ।
 अज्ञानपंकीं बुडाले । निभ्रांत जाणें ॥ ९३ ॥
 देखैं शवाचां हाति दीधलें । जैसें रत्न कां वायां गेलें ।
 नातारि जात्यंधा पाहालें । प्रमाण नोहे ॥ ९४ ॥
 कां चंद्राचा उदयो जैसा । उपेगा न वचे चि वायसां ।
 मूर्खीं विवेकु हा तैसा । रुचेल ना ॥ ९५ ॥

ह्यणौनि ते न मनिति । आणिक निंदा ही करूं लाहाती ।
 सांघें पतंग काइ साहांति । प्रकाशातें ॥ ९६ ॥
 तैसे ते पार्था । जे विमुख एया अर्था ।
 तिहिंसि संभाषण सर्वथा । करावें ना ॥ ९७ ॥

सदृशं चेष्टते स्वस्याः प्रकृतेर्ज्ञानवानपि ।

प्रकृतिं यांति भूतानि निग्रहः किं करिष्यति ॥ ३३ ॥

ह्यणौनि इंद्रियें इयें एकें । जाणतेन हीं पुरुषें ।
 लालावीं ना कवतिकें । आदिकरुनि ॥ ९८ ॥
 हां गा सपेंसीं खेलों एईल । किं व्याघ्रसंगु सिद्धी जाईल ।
 सांघें हलाहल जिरल । संघिलें काइ ॥ ९९ ॥
 देखें खेलतां अग्नि लाविला । मग तो न संघेर जैसा उधलला ।
 तैसा प्रकृती मानु दीधला । भला नोहे ॥ २०० ॥

इन्द्रियस्येन्द्रियस्यार्थे रागद्वेषौ व्यवस्थितौ ।

तयोर्न वशमागच्छेत्तौ ह्यस्य परिपंथिनौ ॥ ३४ ॥

यन्हविं तर्हि अर्जुना । एया शरीरा पराधीना ।
 कां नाना भोगरचना । मेलवावी ॥ १ ॥
 आपण सायासें करुनि बहुतें । सकलें समृद्धिजातें ।
 मग उदो अस्तु येयातें । प्रतिपालावें ॥ २ ॥
 मग हें तव पांच मेलवा । शेयीं अनुसरल निजस्वभावा ।
 तेव्हलि लोकें गिविसावा । सीणु आपुला ॥ ३ ॥
 ह्यणौनि केवल देहभरण । ते उघड जाणें नागवण ।
 एयालागि एथें अंतष्करण । देयावें ना ॥ ४ ॥
 यन्हविं इंद्रियांचिया आर्ता— । सरिसा विखो वोषितां ।
 संतोखु किर चित्ता । आपजैल ॥ ५ ॥
 परि तो सवंचोराचा सांग्रातु । जैसा नाव चि येक स्वस्थ ।
 जव नगराचा प्रांतु । सांडिजैना ॥ ६ ॥

बापा विखाचिया मधुरता । ज्ञनें आवडि उपजे चित्ता ।
तो परिणामु न विचारितां । सेवावें ना ॥ ७ ॥
देखें इंद्रियां कामु असे । तो लावीं सुख दुरासे ।
जैसा जळीं मीनु आविसें । भूलविजे ॥ ८ ॥
परि तेया माझारि गळु आहे । तो प्राणार्ते घेउनि जाये ।
तो जैसा ताउवा नोहे । झांकवलपणें ॥ ९ ॥
तैसें अभिलाषें एणें कीजेल । जरि विषयांची आश धरिजेल ।
तरि वरपडेयां होइजेल । क्रोधानला ॥ २१० ॥
जैसा कवळनियां पारधी । घातेचिये संधी ।
आणि मृगाते बुद्धी । साधावेया ॥ ११ ॥
एथ तैसी चि परि आहे । ह्मणौनि तुज हा संसर्गु नोहे ।
पार्था दोन्हीं कामक्रोध हे । घातक जाणें ॥ १२ ॥
ह्मणौनि आश्रो हा न करावा । मनीं हीं आठौं न धरावा ।
एकु निजवृत्तिचा उल्लावा । नाशों नेदी ॥ १३ ॥

श्रेयान्स्वधर्मो विगुणः परधर्मात्स्वनुष्ठितात् ।

स्वधर्मे निधनं श्रेयः परधर्मो भयावहः ॥ ३५ ॥

आगा स्वधर्मु हा आपुला । जन्हें कां कठिणु जाला ।
तन्हें हा चि अनुष्ठिला । भला देखें ॥ १४ ॥
एरु आचारु जो परावा । तो देखतां किर बरवा ।
परि आचरतेनि आचरावा । आपुला चि ॥ १५ ॥
सावें शूद्रगृहीं आघवीं । जन्हें पकानें आधि बरवीं ।
तियें द्विजे केवि सेवावीं । दुबला जन्हें ॥ १६ ॥
हें अनुचित कैसेनि कीजे । अप्राप्य केवि इछिजे ।
अथवा इछिलें हीं पाविजे । विचारि पां ॥ १७ ॥
तरि लोकाचीं धवलारें । देखौनियां मनोहरें ।
असतीं तण्हारें । सांडावीं केवि ॥ १८ ॥

हैं असो वनिता आपुली । कुरूप जन्हें जाली ।
 तन्हें भोगितां ते चि भली । जिया परीं ॥ १९ ॥
 तेवि आवडेतैसा सांकडु । आचरतां जन्हीं दुवाडु ।
 तन्हीं स्वधर्में चि सुरवाडु । पारत्रिकि ॥ २२० ॥
 हा गा शर्करा आणि दूध । हैं गोल्य किर होये प्रसिद्ध ।
 परि कृमिदोषीं विरुद्ध । घेपे केवि ॥ २१ ॥
 ऐसेनि हिं जरि सेविजैल । तरि ते अलुकी चि आगा उरैल ।
 जें तें परिणामीं पथ्य नव्हैल । धनुर्दरा ॥ २२ ॥
 ह्यणौनि आणिकांसि जें विहित । आणिक आपणेया अनुचित ।
 तें नाचरावें जरि हित । विचारिजे ॥ २३ ॥
 एया स्वधर्मते अनुष्ठितां । जरि वेचु होईल जीविता ।
 तो ही नीका वर उभयता । दीसतसे ॥ २४ ॥

अर्जुन उवाच ॥

अथ केन प्रयुक्तोऽयं पापं चरति पूरुषः ।

अनिच्छन्नपि वाष्णंय बलादिव नियोजितः ॥ ३६ ॥

ऐसें समस्तसुरशिरोमणी । बोलिले जेथ शारंगपाणी ।
 तेथ अर्जुनु ह्यणे विनवणी । आथि देवा ॥ २५ ॥
 हैं जें जें तुझीं सांधितलें । तें सकल किर मियां परिसिलें ।
 परि आतां पूसैन काहीं आपुलें । अपेक्षित ॥ २६ ॥
 तरि देवा हैं कैसें । जें ज्ञानियां हीं स्थिति भ्रंशे ।
 मार्गु सांडुनि अनारिसें । चालत देखों ॥ २७ ॥
 सर्वज्ञ जे ही होती । हेय उपादेय जाणति ।
 ते ही परधर्मी व्यभिचरति । कवणें गुणें ॥ २८ ॥
 बीजा आणिक भूसा । अंधु निवाडु नेणे कां जैसा ।
 नाव येक देखणा हीं तैसा । बरले कां पां ॥ २९ ॥

जे असता संगु सांडिति । ते चि संसर्गु करितां न धांति ।
 धनवासी ही सेविति । जनपदातें ॥ २३० ॥
 आपण तारि पलति । सर्वस्वें पाप चुकविति ।
 परि बलिवंडें सूडजति । तेया चि माझि ॥ ३१ ॥
 जेयाची घेंति विवसी । तें जडौनि ठाके जीवेंसी ।
 चुकविति ते गिंवसी । तेयाते चि ॥ ३२ ॥
 ऐसा बलात्कार एकु दासे । तो कोणाचा एथ असे ।
 हें मोलावें हवीकेशें । पार्थु ह्मणे ॥ ३३ ॥

श्रीभगवानुवाच ॥

काम एष क्रोध एष रजोगुणसमुद्भवः ।

महाशनो महापाप्मा विद्ध्येनमिह वैरिणम् ॥ ३७ ॥

तवं हृदयकमलरामु । जो योगियांचा कामु ।
 तो ह्मणतु असे पुरुषोत्तमु । सांघौनि आडकें ॥ ३४ ॥
 तरि हे कामक्रोध पाई । जेयांतें कृपेचा सांढोवा नाही ।
 हे कृतांताचां ठांड । मानिजति ॥ ३५ ॥
 हे ज्ञाननिर्धाचे भूवंग । हे विषयरानिचे बाघ ।
 भजनमार्गिचे मातंग । मारक हे ॥ ३६ ॥
 हे देहदुर्गिचे डोंड । इन्द्रियग्रामिचे कोंड ।
 एयांचे व्यामोहादिक धवड । जगावरि ॥ ३७ ॥
 हे रजोगुणा मानेयाचे । समूल ऐसे आग्वलिचे ।
 धायेपण येयांचें । अविद्या केलें ॥ ३८ ॥
 हे रजाचे किर जाले । परि तमांसि पढियंते भले ।
 तेणें निजपद एयांसि दीधले । प्रमादजात ॥ ३९ ॥
 हे मृत्युचां हान घरीं । मानिजति निकिया परीं ।
 जें जीविताचे वैरी । ह्मणोनियां ॥ ४० ॥

जिया भूकेळियां आविंसा । हें विश्व न पुरे चि वांसा ।
 तिया कुलवाडि एया चि आशा । चालिजत असे ॥ ४१ ॥
 कवतिकें कवलितां मुष्टि । जिये चौदा ही भुवनें थेंकुटी ।
 ते भांति तियेची धाकुटी । हणौनि सरे ॥ ४२ ॥
 जे लोकत्रयाचें भातुकें । फार करीति खाये कवतिकें ।
 ते दासिपणाचेनि त्रिकें । तृष्णा जिण ॥ ४३ ॥
 हें असो मोहें मानिजे । एयांतें अहंकारें घेपेदीजे ।
 जेणें जग आपुलि भोजें । नाचविजत असे ॥ ४४ ॥
 नेणसि सत्याचा भोकसा काढिला । मग अकृत्य तणकुटा भरिला ।
 तो दंभु नव्हे रूढविला । लोकीं इहीं ॥ ४५ ॥
 साध्वी शांति नागविली । माया मांगि श्रिंघारिली ।
 तिघेकरवि विटालविली । इहीं साधुवृंदें ॥ ४६ ॥
 एहीं त्रिवेकाची त्राये फेडिली । वैराग्याची खाल काढिली ।
 जीतेया मान मोडिली । उपशमाची ॥ ४७ ॥
 इहीं संतोखवन खांडिलें । धैर्यदुर्ग पाडिलें ।
 आनंदरोप सांडिलें । उपडूनियां ॥ ४८ ॥
 इहीं बोधाची चोपि लूसिली । सुखाची लीपि पूसिली ।
 चिन्हारीं आगि सूदली । तापत्रयां ॥ ४९ ॥
 हे आंगा तरि घडलें । जीवीं चि आधि जडले ।
 परि नांतुडति गिविसिले । ब्रह्मादिकां ॥ २५० ॥
 हे चैतन्याचां सेजारीं । वसति ज्ञानाचां एकहारीं ।
 हणौनि प्रवर्तले मारीं । संवरति ना ॥ ५१ ॥
 हे जलेंविण बुडलिति । आगीविण जालिति ।
 न बोलत कवलिति । प्राणियांतें ॥ ५२ ॥
 हे शस्त्रेंविण साधिति । दोरेंविण बांधिती ।
 ज्ञानियां तरि बधीति । पैज वेउनि ॥ ५३ ॥

हे चिखलेंविण रोविति । पासिकेंविण गावति ।

हे कोणहा हीं जोगे नव्हती । आंतुवटपणें ॥ १४ ॥

धूमेनाविच्यते बन्धिर्यथादर्शो मलेन च ।

यथोल्लेखेनावृतो गर्भस्तथा तेनेदमावृत्तम् ॥ ३८ ॥

जैसी चंदनाची मूली । गिबंसुनि घेपे व्यालीं ।

ना तारि उल्लाची खोली । गर्भस्थासी ॥ ५५ ॥

कां प्रभाविण भानु । धूमेंविण हुताशनु ।

जैसा दर्पणु मलहीनु । कहीं चि नसे ॥ ५६ ॥

तैसें एहीविण एकलें । आक्षीं ज्ञान नाहीं देखिलें ।

जैसें कोंडेनियां गुंतलें । बीज निफजे ॥ ५७ ॥

आवृतं ज्ञानमेतेन ज्ञानिनो नित्यवैरिणा ।

कामरूपेण कौंतेय दुःपूरेणानलेन च ॥ ३९ ॥

तैसें ज्ञान तारि विशुद्ध । परि एहिं दीसं प्रवद्ध ।

क्षणौनि तें अगाध । होउनि ठेलें ॥ ५८ ॥

आदिं एयातें जीणावें । मग तें ज्ञान पावावें ।

तवं एयां काहीं न प्रभवे । रागद्वेषां ॥ ५९ ॥

एयातें साधावेया लागि । जें बल बाणिजे आंगीं ।

तें इंधन जैसें आगीं । सान्नाउं होये ॥ ६० ॥

इन्द्रियाणि मनो बुद्धिरस्याधिष्ठानमुच्यते ।

एतैर्बिमोहयत्येष ज्ञानमावृत्य देहिनम् ॥ ४० ॥

तैसे उपाये कीजति जे जे । ते येयांसी चि होंति बिरजे ।

क्षणौनि हाटियातें जीणिजे । ईहीं चि जर्गीं ॥ ६१ ॥

ऐसेवा ही सांकडा बोला । एकु उपाउं असे भला ।

तो कारि पां जरि आंगवला । सांघैन तुज ॥ ६२ ॥

तस्मात्स्वमिन्द्रियाण्यादौ नियम्य भरतर्षभ ।

पाप्मानं प्रजहि ह्येनं ज्ञानविज्ञाननाशनम् ॥ ४१ ॥

तरि एयांचा पहिला कुरुठा इंद्रियें । जेथौनि प्रवृत्ति कर्मातें विये ।
 आदीं निर्दळनि घालीं तियें । सर्वथैव ॥ ६३ ॥
 मग मनाची धावं पारुखेल । आणिक बुद्धी सोडवण होईल ।
 एतुलेनि तागा एयां मोडेल । पापियांचा ॥ ६४ ॥
 हे आंतरौनि जरि फीटले । तरि निभ्रांत जाण निवटले ।
 जैसें रस्मीविण उरलें । मृगजल नाही ॥ ६५ ॥
 तैसे रागद्वेष जरि निमाले । तरि ब्रह्मिचें स्वाराज्य आलें ।
 मग भोगी मुख आपुलें । आपण चि ॥ ६६ ॥

इंद्रियाणि पराण्याहुरिन्द्रियेभ्यः परं मनः ।

मनसस्तु परा बुद्धिर्यो बुद्धेः परतस्तु सः ॥ ४२ ॥

एवं बुद्धेः परं बुद्ध्वा संस्तभ्यात्मानमात्मना ।

जहि शत्रु महाबाहो कामरूपं दुरासदम् ॥ ४३ ॥

जे गुरुशिष्याची गोठी । पदपिंडाची गाठी ।
 तेथ स्थिर होउनि नुठी । कव्हणी कार्ळी ॥ ६७ ॥
 ऐसें सकल सिद्धांचा राउ । देवी लक्ष्मीचे नाहो ।
 राया आइकें देवदेउ । बोलता जाला ॥ ६८ ॥
 आतां पुनरपि तो अनंत । आद्य एकि मातु ।
 सांघेल तेथ पांडुसुतु । प्रभु करिल ॥ ६९ ॥
 तेया बोलाचा हान पाडु । कां रसवृत्तिचा निवाडु ।
 जेणें श्रोतेयां होईल सुरवाडु । श्रवणसुखाचा ॥ २७० ॥
 ज्ञानदेउ हणें निवृत्तिचा । चांगु उवाउ धरुनु उन्मेषाचा ।
 मग हा संवाडु हरिपार्थाचा । भोगां बापा ॥ २७१ ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां

योगशास्त्रे श्रीकृष्णार्जुनसंवादे कर्मयोगो

नाम तृतीयोऽध्यायः ॥

॥ श्रीकृष्णार्पणमस्तु ॥

ज्ञानेश्वरी

अध्याय चौथा

आजि श्रवणेंद्रिया पीकलें । जेणें हे गीतानिधान देखिलें ।
आतां स्वप्न चि हें तूकलें । साचा संरिसें ॥ १ ॥
आदी चि विवेकाची गोठी । वारि प्रतिपदी कृष्ण ज्ञाजिठी ।
आणि भक्तराजु किरीटी । परिसतसे ॥ २ ॥
जैसा पंचमालापु सुगंधु । किं परिमलु आणि सुस्वादु ।
भला जाला विनोदु । कथेचा इये ॥ ३ ॥
कैसी आगलीक दैवांची । जें गंगा जोडली अमृताची ।
हो काज तपें श्रोतेयांचीं । फला आलीं ॥ ४ ॥
आतां इंद्रियजात आघवें । तेणें श्रवणाचें घर रिगावें ।
मग संवादसुख भोगावें । गीताख्य हें ॥ ५ ॥
हा अतिशयो अतिप्रसंगें । सांडूनि कथा चि ते सांघें ।
जें कृष्णार्जुन दोघें । बोलत होते ॥ ६ ॥
तेव्हलि संजयो रायातें हणें । अर्जुनु अधिष्ठिला दैवगुणें ।
जें अतिप्रीती नारायणें । बोलिजत असे ॥ ७ ॥
देवी लक्ष्मी येतुली जवलिक । परि तेही यया प्रेमाचें नेदखे चि मुख ।
आजि कृष्णस्नेहाचें पीक । ययातें चि आधि ॥ ८ ॥
सनकादिकांचेया दुरासा । वाढिनलेया किर बहुवसा ।
परि तियाही येणें मानें एषा । येती चि ना ॥ ९ ॥

यया जगदीश्वराचें प्रेम । येथ दीसतसे निरूपम ।
 कैसें पार्थे येणें सर्वोत्तम । पुण्य केलें ॥ १० ॥
 हो काज येयाचेया प्रीती । हा अमूर्तु आला व्यक्ती ।
 मज येकत्रंकिचिया स्थिती । आवडतसे ॥ ११ ॥
 यन्हविं योगियां नाडले । वेदार्थासि नाकले ।
 जेथ ध्यानाचे डोले । पावतिना ॥ १२ ॥
 तें हा स्वरूप । जें अनादि निष्कंप ।
 पारि कवणें मानें सकृप । जाळां असे ॥ १३ ॥
 हा त्रैलोक्यपटाची घडी । आकाराची पैल थडी ।
 आइकैं कैसा ययाचिया आवडी । आवरळा असे ॥ १४ ॥

श्रीभगवानुवाच ॥

इमं विवस्वते योगं प्रोक्तवानहमव्ययम् ।

विवस्वान् मनवे प्राह मनुरिक्ष्वाकवेऽब्रवीत् ॥ १ ॥

मग हणें पांडुमुता । हा चि योगु आर्क्षीं विवस्वता ।
 कथिला परि ते वार्ता । बहुतां दिसांची ॥ १५ ॥
 मग तेणें विवस्वतें रवी । हे चि योगस्थिति आववी ।
 निरोपिली बरवी । मनूप्रति ॥ १६ ॥
 मनू आपण अनुष्ठिली । मग इक्ष्वाकूसि उपदेशिली ।
 ऐसी परंपरा विस्तारली । आय हे ॥ १७ ॥

एवं परंपराप्राप्तमिमं राजर्षयो विदुः ।

सकालेनेह महता योगो नष्टः परंतप ॥ २ ॥

मग आणिक ही या योगातें । राजर्षी जाले जाणते ।
 पारि तेथौनि आतां सांप्रतें । नेणजे हा ॥ १८ ॥
 जें प्राणियां कामीं भरु । देहा चि वरि आदरु ।
 बहुत करुनि विसरु । आत्महिताचा ॥ १९ ॥
 अविट नाथिली आस्थाबुद्धि । विषयसुख चि परमावधी ।

जीउ तैसा उपाधि । आवडे लोकां ॥ २० ॥
 यन्हवि सन्ही खवणेयाचां गात्रीं । पाटाउवें काइ करावीं ।
 सार्धें जात्यंधा रवि । काजा आधि ॥ २१ ॥
 कां बहिरांचिये आस्थानीं । कव्हर्णां गीतांतें हानमानी ।
 कीं कोल्हेयां चंदनीं । आवडि उपजे ॥ २२ ॥
 पै चंद्रोदया आरौते । जेयांचे डोले फूटति असते ।
 ते काउले केवि चंद्रातें । उलखति ॥ २३ ॥
 तैसी वैराग्याची सीव नदखति । जे विवेकाची भाष नेणति ।
 ते मूर्ख केवि पावती । ईश्वरातें ॥ २४ ॥
 कैसा नेणां मोहो वाढीनला । तेणें बहुते येकु वेलु गेला ।
 क्षणौनि योगु हा लोपला । लोकां इये ॥ २५ ॥

स एवार्थं मया तेऽद्य योगः प्रोक्तः पुरातनः ।

भक्तोऽसि मे सखा चेति रहस्यं ह्येतदुत्तमम् ॥ ३ ॥

तो चि हा आजि आतां । तुजप्रती कुंतीसुता ।
 सांधितला आह्मीं तत्वता । भ्रांति न करीं ॥ २६ ॥
 हें जीविचें गा गुज । परि न न्हाइजे चि तूज ।
 जें पढियंसि तूं मज । क्षणौनियां ॥ २७ ॥
 तूं प्रेमाचा पूतला । भक्तिचा जीवाला ।
 मैत्रियेची कला । धनुर्द्वरा ॥ २८ ॥
 तूं अनुसंगाचा ठाऊ । आतां तुज काइ राहों ।
 जन्हीं संप्रामारुढ आहों । जालों आह्मीं ॥ २९ ॥
 तन्हीं नावेक हें साहावें । गाजावज्य ही धरावें ।
 परि तूझें अज्ञानतत्व हरावें । लागे आदीं ॥ ३० ॥

अर्जुन उवाच ॥

अपरं भवतो जन्म परं जन्म विवस्वतः ।

कथमेतद्विजानीयां त्वमादौ प्रोक्तवानिति ॥ ४ ॥

तवं अर्जुनु ह्मणे हरी । माये आपुलेयाचा खेहो करी ।
 एथ विस्मयो काइ अवधारी । कृपानिधी ॥ ३१ ॥
 तूं संवसारश्रांताची साउली । अनाथांची माउली ।
 आमतें किर प्रसवली । तूझी चि कृपा ॥ ३२ ॥
 देवा पांगूल एकार्थें वीजे । तरि जन्मौनि जोजारु साहिजें ।
 हें बोलों काइ तूझें । तुज चि पुढां ॥ ३३ ॥
 आतां पूसैन जें मीं काहीं । तेथ नाकें चित्त देई ।
 तेवि चि देवें कोपावें नाही । बोला एका ॥ ३४ ॥
 तरि मागीलकी जे वार्ता । तुवां सांगितली होंती अनंता ।
 ते नावेक मज चित्ता । येचिना ॥ ३५ ॥
 जें तो विवस्वतु ह्मणिजे काइ । ऐसें हें वडिलां हीं ठाउवें नाही ।
 तरि तुवां चि केवि पाई । उपदेशिला ॥ ३६ ॥
 तो आइकिजे बहुतां कालांचा । आणि तूं तत्रं कृष्णा सांपेचा ।
 ह्मणौनि गा इये मातूचा । विसंवादु ॥ ३७ ॥
 तेवि चि चरित्र देवा तूझें । आपण काहीं नेणिजे ।
 हें लटिकें केवि ह्मणिजे । येकी हेलं ॥ ३८ ॥
 परि हे चि मातु आघवी । मो परिसें तैसी सांघावी ।
 जें तुवां चि तेया रवी । उपदेशु केअ ॥ ३९ ॥

श्रीभगवानुवाच ॥

बहूनि मे व्यतीतानि जन्मानि तव चार्जुन ।
 तान्यहं वेद सर्वाणि न त्वं वेत्थ परंतप ॥ ५ ॥
 तवं कृष्ण ह्मणे पांडुमुता । तो वैवस्वतु जें होता ।
 तें आह्मी नसां ऐसी चित्ता । प्रतीति तुज ॥ ४० ॥
 तरि तूं गा हें नेगसी । पै जन्में आह्मां तुझांसि ।
 बहुते गेलों परि न स्मरसी । आपुलीं तूं ॥ ४१ ॥

मी जेणें जेणें अवसरें । जें जें होउनि अवतरें ।
तें समस्त हीं स्मरें । धनुर्द्धरा ॥ ४२ ॥
ह्यणौनि हें आघवें । मागील मज आठवे ।
मी अजुही परि संभवे । प्रकृतियोगें ॥ ४३ ॥

अजोऽपि सन्नव्ययात्मा भूतानामीश्वरोऽपि सन् ।
प्रकृतिं स्वामधिष्ठाय संभवाम्यात्ममायया ॥ ६ ॥

माझें अव्यक्तत्व न नशे । परि होणें जाणें एक दीसे ।
तें प्रतिबिंबे मायावशें । स्वस्वरूपीं ॥ ४४ ॥
माझी स्वतंत्रता न मोडे । परि कर्माधीनु ऐसा आवडें ।
तें हीं आतिबुद्धी तरि घडे । यन्हविं नाहिं ॥ ४५ ॥
जें येक चि दीसे दुसरें । तें दर्पणाचेनि आधारें ।
यन्हविं काड वस्तुविचारें । दूजें आहे ॥ ४६ ॥
तैसा अमूर्तु चि मीं किरीटी । परि प्रकृतितें जें अधिष्ठां ।
तें साकारपण नटीं । काजा येया ॥ ४७ ॥

यदा यदा हि धर्मस्य ग्लानिर्भवति भारत ।

अभ्युत्थानमधर्मस्य तदात्मानं सृजाम्यहम् ॥ ७ ॥

जें धर्मजात आघवें । युगीं युगीं मियां चि रक्षावें ।
ऐसा ओघु हा स्वभावे । आद्यु असे ॥ ४८ ॥
ह्यणौनि अजत्व परांतें ठेवां । मीं अव्यक्तपण हीं नाठवि ।
जेव्हलि धर्मातें अभिभवी । अधर्मु हा ॥ ४९ ॥
तेव्हलि आपुलेयाचेनि कैवारें । मी साकार होउनि अवतरें ।
मग अज्ञानाचें आंधारें । गीदुनि घाली ॥ ५० ॥

परित्राणाय साधूनां विनाशाय च दुष्कृताम् ।

धर्मसंस्थापनार्थाय संभवामि युगेयुगे ॥ ८ ॥

अधर्माची अवधि तोडीं । दोषांचें लिहिलें फेडीं ।
सज्जनाकरवि गुढी । उभवीं मीं ॥ ५१ ॥

दैत्यांचीं कुलें नाशीं । सांधूचा मानु गिवसीं ।
 धर्मासि नीतीसीं । सेस भरीं ॥ ५२ ॥
 मी अविवेकाची काजली । फेड्ढनि विवेकुदीपु उजली ।
 तैं योगियां पाहे दिवाली । निरंतर ॥ ५३ ॥
 स्वमुखें विश्व कोंदे । धर्माचें जगीं नांदे ।
 भक्तांसि होंति दोंदें । सात्विकाचीं ॥ ५४ ॥
 तैं पापाचा अचलु फीटे । पुण्याची पाहाट फूटे ।
 जैं मूर्ति माझी प्रकटे । पांडुकुमरा ॥ ५५ ॥
 येयां ऐसेयां काजालागि । अवतरिजें गा युगीं युगीं ।
 परि हें चि बोलखे जो जगीं । तो विवेकिया ॥ ५६ ॥
 जन्मकर्मच मे दिव्यमेवं यो वेत्ति तत्त्वतः ।
 त्यक्त्वा देहं पुनर्जन्म नैति मामेति सोऽर्जुन ॥ ९ ॥
 माझें अजत्व जन्मणें । अक्रियता चि करणें ।
 अविकार जो जाणे । तो मुक्तु मानी ॥ ५७ ॥
 तो चालिला संगें न चले । देहिचा देहा नाकले ।
 मग पंचत्वीं तवें मिले । माझां चि रूपीं ॥ ५८ ॥
 वीतरागभयक्रोधाः मन्मया मामुपाश्रिताः ।
 बहवो ज्ञानतपसा पूता मद्भावमागताः ॥ १० ॥
 यन्हविं तन्हीं परापर न शोचिति । जे कामनाभून्य होती ।
 वाटा केव्हलि न वचति । क्रोधाचिये ॥ ५९ ॥
 जे मियां सदा आथिले । माझियाचि सेवा जियाले ।
 कां आत्मबोधें तोखले । वीतराग ॥ ६० ॥
 जे तपोतेजाचे राशी । कां येकायतन ज्ञानांसी ।
 जे पवित्रता तीर्थासि । तीर्थरूप ॥ ६१ ॥
 ते मद्भावा साहाजें आले । मी ते चि होउनि ठेले ।
 जें मजें तेयां उरले । पदर नाही ॥ ६२ ॥

साँवें पितलेची गंधिकालिक । फीटली होये निःशेष ।
तैं सुवर्णवाइ आणिक । जोडूं जाइजे ॥ ६३ ॥
तैसे यमनियमी कडसले । जे तपोज्ञानी चोखालले ।
ते मी ते चि जाले । एथ संशयो काइसा ॥ ६४ ॥

ये यथा मां प्रपद्यंते तांस्तथैव भजाम्यहं ।

मम वर्त्मानुवर्तते मनुष्याः पार्थ सर्वशः ॥ ११ ॥

यन्हविं तन्हीं पाहीं । जे जैसे माझां ठाई ।
भजति तेयां मीं हीं । तैसाचि भजे ॥ ६५ ॥
देखैं मनुष्यजात सकल । हें स्वभावता चि भजनशील ।
जालें असे केवल । माझां ठाई ॥ ६६ ॥

कांक्षंतः कर्मणां सिद्धिं यजंत इह देवताः ।

क्षिप्रं हि मानुषे लोके सिद्धिर्भवति कर्मजा ॥ १२ ॥

परि ज्ञानेविण नाशलें । जें बुद्धिभेदासि आलें ।
तेणें एकीं कल्पलें । अनेकत्व ॥ ६७ ॥
हणौनि अमेदा भेदु देखति । अनामा नामें ठेविति ।
देवो देवी हणती । अवाच्यातें ॥ ६८ ॥
जें सर्वत्र सदा सम । तेथ विभाग अधमोत्तम ।
मतिवसें संभ्रम । विवंचिती ॥ ६९ ॥
मग नाना हेतूप्रकारें । यथोचितें उपचारें ।
मानळीं देवतांतरे । उपासिति ॥ ७० ॥
तेथ जें जें काहीं अपेक्षित । तें तैसेचि पावती समस्त ।
परि तें कर्मसिद्ध निश्चित । उल्लख तूं ॥ ७१ ॥
वांचूनि देंतें घेंतें आणिक । निभ्रांत नाहीं सम्यक ।
येथ कर्म चि फलसूचक । मनुष्यलोकीं ॥ ७२ ॥
जैसे क्षेत्रीं जें पेरिजे । तें वाचौनि आन न निफजे ।
कां पाहिजे तें चि देखिजे । दर्पणाधारे ॥ ७३ ॥

ना तरि कडेयासि तलवटीं । जैसा आपुला चि बोलु किरीटी ।

पडिसादा होउनि उठी । निमित्तयोगें ॥ ७४ ॥

तैसा समस्तां यां भजनां । मी साक्षिभूतु अर्जुना ।

येथ प्रतिस्फले ते भावना । आपुलाली ॥ ७५ ॥

चातुर्वर्ण्यं मया सृष्टं गुणकर्मविभागशः ।

तस्य कर्तारमपि मां विद्वद्यकर्तारमव्ययम् ॥ १३ ॥

आतां यया चि परीं जाण । हे च्यान्ही वर्ण ।

सृजिले मियां गुण— । कर्मविभागें ॥ ७६ ॥

न मां कर्माणि लिपंति न मे कर्मफले स्पृहा ।

इति मां योऽभिजानाति कर्मभिर्न स बध्यते ॥ १४ ॥

हें मज चि तव जालें । परि मियां नाहीं केले ।

ऐसें साच जेणें देखिलें । तो सृष्टला गा ॥ ७७ ॥

एवं ज्ञात्वा कृतं कर्म पूर्वैरपि मुमुक्षुभिः ।

कुरु कर्मैव तस्मात्त्वं पूर्वं पूर्वतरं कृतम् ॥ १५ ॥

जें प्रकृतिचेनि आधारें । गुणाचेनि व्यभिचारें ।

कर्म तदनुसारें । विवंचलिं ॥ ७८ ॥

येथ येक चि हें धनुषपाणी । परि जालें गा चडूवणीं ।

ऐसी गुणकर्मि कडसणी । केली साहाजें ॥ ७९ ॥

क्षणौनि आइकें पार्था । हे वर्णभेद संस्था ।

मी करिता नोहें सर्वथा । तें यया चि हेतू ॥ ८० ॥

मागील मुमुक्ष जे होते । तिहीं ऐसें चि जाणोनियां मातें ।

कर्म केलीं समस्तें । धनुर्दरा ॥ ८१ ॥

परि तियें बाजें जैसीं दग्धलीं । कां नुगवती चि पेरलीं ।

तिसि कर्म चि तेयां जालीं । मोक्षहेतू ॥ ८२ ॥

किं कर्म किमकर्मेति कवयोऽप्यत्र मोहिताः ।

तत्ते कर्म प्रवक्ष्यामि यज्ज्ञात्वा मोक्षयसेऽशुभात् ॥ १६ ॥

येथ आणिक ही एक अर्जुना । हे कर्माकर्मविवचना ।
 आपुलिये चाडे सज्जाना । योग्य नव्हे ॥ ८३ ॥
 कर्म हाणिजे तें कवण । अथवा अकर्मा काय लक्षण ।
 ऐसें विचारितां विचक्षण । गुंपौनि ठेले ॥ ८४ ॥
 जैसें कां कुडें नाणें । खरेयाचेनि सारखेपणें ।
 डोलेयांचें हीं पाहाणें । संशङ्ग घाली ॥ ८५ ॥
 तैसें नैष्कर्म्यतेचेन भ्रमें । गिंवसिजत आहाति कमें ।
 जिहीं दूजी श्रृष्टी मनोधर्मे । करूं शकती ॥ ८६ ॥
 वांचूनि मूर्खांची गोठि काइसी । एथ मोहलले गा क्रांतदर्शी ।
 हाणोंनि तेंचि आतां परिहसें । साधेन तुज ॥ ८७ ॥

कर्मणोऽपि बोद्धव्यं बोद्धव्यं च विकर्मणः ।

अकर्मणश्च बोद्धव्यं गहना कर्मणो गतिः ॥ १७ ॥

तारि हें कर्म हाणिजे स्वभावे । जणें हा विश्वाकारु संभवे ।
 तें सावेव आदीं जाणावें । लागे एथ ॥ ८८ ॥
 मग वर्णाश्रमासि उचित । जें विशेष कर्म विहित ।
 तें ही ओलखावें निश्चित । उपेगेंसीं ॥ ८९ ॥
 पाठिं जें निपिद्ध हाणिपे । तें ही बुझावें स्वरूपें ।
 येतुलेनि येथ काहीं न गूंपे । आपैसैं चि ॥ ९० ॥
 यन्हविं जग हें कर्माधीन । ऐसी व्याप्ति याची गहन ।
 परि तें असो आइकैं चिन्ह । प्राप्ताचें ॥ ९१ ॥

कर्मण्यकर्म यः पश्येदकर्मणि च कर्म यः ।

स बुद्धिमान् मनुष्येषु स युक्तः कृत्स्नकर्मकृत् ॥ १८ ॥

जो सकल कर्मि वर्त्ततां । देखे निष्कर्मता ।
 कर्मसंगें निरासता । फलाचिया ॥ ९२ ॥
 आणि कर्तव्यते लागी । जेया दूसरें नाहिं जागें ।
 ऐसी नैष्कर्म्यता तरि चांगी । बोधला असे ॥ ९३ ॥

यस्य सर्वे समारंभाः कामसंकल्पवर्जिताः ।

* ज्ञानाग्निदग्धकर्माणं तमाहुः पण्डितं बुधाः ॥ १९ ॥

परि क्रियाकलापु आघवा । आचरतु दीसे बरवा ।

तारि तो इहीं चिन्हीं जाणावा । ज्ञानियां गा ॥ १४ ॥

जैसा जो जलापासि उभा ठाके । तो जन्हें आपणपें जलामाजि देखे ।

तन्हीं निभ्रांत उल्लखे । ह्मणे मीं बेगला आहें ॥ १५ ॥

अथवा नावे हान रिगे । तो थडियेचे रुखजात देखे बेगें ।

साचोकारें पाहों लागे । तव रुख ह्मणे अचल ॥ १६ ॥

तैसें सकल कर्मी असणें । तें फुडें मानूनिया वायाणें ।

मग आपणपां जो जाणे । नैष्कर्म्यता ॥ १७ ॥

आणि उदोअस्तुचेनि प्रमाणें । जैसें न चलतां सूर्या चालणें ।

तैसें नैष्कर्म्यत्वां जाणे । कर्म जो गा ॥ १८ ॥

तो मनुष्यासारिखा आवडे । परि मनुष्यत्व तेयासि न घडे ।

जैसें जलाधारें न बुडे । भानुबिंब ॥ १९ ॥

तेणें न पांतां विश्व देखिलें । न करितां सर्व केलें ।

न भोगितां भोगिलें । भोग्यजात ॥ १०० ॥

येके ठाई बसला । परि सर्वत्र तो चि गेला ।

हें असो विश्व जाला । देहें चि तो ॥ १ ॥

जेया पुरुषाचां ठाई । कर्माचा तारि खेदु नाही ।

परि फलापेक्षा काहीं । संचरेना ॥ २ ॥

आणि हें कर्म मी करीन । अथवा आदारिलें सिद्धी नेईन ।

येणें संकल्पें हीं जेयाचें मन । बिटाले ना ॥ ३ ॥

ज्ञानाग्नीचेनि मुखें । जेणें जालिलीं कर्म अशेषें ।

तो ब्रह्मचि मनुष्यवेखें । उल्लख तूं ॥ ४ ॥

त्यक्त्वा कर्मफलासंगं नित्यतृप्तो निराश्रयः ।

कर्मण्यभिप्रवृत्तोऽपि नैव किञ्चित् करोति सः ॥ २० ॥

जो शरीरों उदासु । फलाभोगों निरासु ।
 नित्यता उल्हासु । होउनि असे ॥ ५ ॥
 जो संतोषाचा गाभारा । आत्मबोधाचेया उगारा ।
 पुरे न ह्मणे चि धनुर्द्धरा । आरोगितां ॥ ६ ॥
 कैसा अधिकाधीक आवडी । घेत महासुखाची गोडी ।
 सांडौनि आशां सीकु खंडी । अहंभावाची ॥ ७ ॥

निराशर्यताचित्तात्मा त्यक्तसर्वपरिग्रहः ।

शारीरं केवलं कर्म कुर्वन्नाप्नोति क्लिष्टबन्धम् ॥ २१ ॥

ह्मणौनि अवसरें जें जें पावे । तेणें चि तो सुखावे ।
 जेया आपुलें आणि परावें । दोन्ही नाहीं ॥ ८ ॥
 तो दीठी जें पाहे । तें आपण चि होउनि जाये ।
 आइके तें आहे । तो चि जाला ॥ ९ ॥
 चरणीं हान चाले । कां मुखें जें जें बोले ।
 ऐसें चेष्टाजात तेतुलें । आपण चि जो ॥ ११० ॥

यदृच्छा लाभसंतुष्टो द्वंद्वार्तातो विमत्सरः ।

समः सिद्धावसिद्धौ च कृत्वापि न निबद्धयते ॥ २२ ॥

हें असो विश्वें पाई । जेया आपणपें वांचूनि नाहीं ।
 कर्म तें कवण काइ । बाधी तेयातें ॥ ११ ॥
 आणि हा मत्सर जेथ उपजे । तें नुरे चि तेया दूजें ।
 तो निर्मत्सर काइ ह्मणिजे । बोलवरी ॥ १२ ॥

गतसंगस्य मुक्तस्य ज्ञानावस्थितचेतसा ।

यज्ञायाचरतः कर्म समग्रं प्राविलीयते ॥ २३ ॥

ह्मणौनि सर्वा परीं जो मुक्तु । तो सकर्मु चि कर्मरहितु ।
 सगुणु परि गुणातीतु । येथ भ्रांति नाहीं ॥ १३ ॥
 तो देहसंगें तारि असे । पारि चैतन्या सारिखा दोसे ।
 पाहांतां परब्रह्माचेनि कसें । चोखालु भला ॥ १४ ॥

ऐसा ही तो कवतिकें । जरि कर्म करी यज्ञादिकें ।
 तारि तियें लया जांति अशेषें । तेयाचां चि ठांडें ॥ १९ ॥
 अकालिचीं अभ्रें जैसीं । ऊर्मीवीण आकाशीं ।
 हारपति आपैसीं । उदैलीं सांतीं ॥ १६ ॥
 तैसि विधिविधानरहितें । जन्हीं आचरला तो समस्तें ।
 तन्हीं तियें ऐक्यभावे ऐक्यातें । पावतील ॥ १७ ॥
 जें हें हवन मी होता । कां इये यज्ञीं हा भोक्ता ।
 ऐसी बुद्धीसि नाहीं भिन्नता । ह्यणौनियां ॥ १८ ॥
 जें यष्टा यज्ञ यजावें । ते हविमंत्रादीक आघवें ।
 तो देखे अविनाभावे । आत्मबुद्धी ॥ १९ ॥

ब्रह्मार्पणं ब्रह्म हविर्ब्रह्माग्नौ ब्रह्मणा हुतं ।

ब्रह्मैव तेन गन्तव्यं ब्रह्मकर्मसमाधिना ॥ २४ ॥

ह्यणौनि ब्रह्म तें चि कर्म । ऐसें बोधा आलें जेया सम ।
 तेया कर्तव्य तें नैष्कर्म्य । धनुर्द्वरा ॥ १२० ॥
 आतां अविवेककुमारत्वा मूकलें । जेयां विरक्तीचें पाणिग्रहण जालें ।
 मग उपासन जिहिं आणिलें । योगाग्नीचें ॥ २१ ॥
 जे यजनशील अहर्निशीं । जिहीं अविद्या हवीली मनैसीं ।
 गुरुवाक्य हुताशीं । हवन केलें ॥ २२ ॥
 तिहीं योगाग्नीकिं यजिजे । तो देवयज्ञु वीजे ।
 तेथ आत्मसुख कामिजे । पांडुकुमरा ॥ २३ ॥

देवमेवापरे यज्ञं योगिनः पर्युपासते ।

ब्रह्माग्नावपरे यज्ञं यज्ञेनैवोपजुव्हति ॥ २५ ॥

आतां अवधारीं सांघेन आणिक । जे ब्रह्माग्निक सामिक ।
 तेयातें यज्ञें चि यज्ञु देख । उपासिजे ॥ २४ ॥
 एक संयमाग्नी होत्री । ते युक्तित्रयाचां मंत्री ।
 यजन करिति पवित्री । इंद्रियद्रव्यां ॥ २५ ॥

भोवादीर्घाद्रियाण्यन्ये संयमाभिषु जुहति ।

शाहादीन् विषयानन्ये इन्द्रियाभिषु जुहति ॥ २६ ॥

एका वैराग्यरवी विवल्ले । तवं संयती विहार केले ।

तेथ अपावृत जाले । इन्द्रियानल ॥ २६ ॥

तिहि विरक्तिची ज्वाला घेतली । तवं विकारांचीं इंधनें पलिपली ।

तेथ आशाधूमें सांडिली । पांचे कुडें ॥ २७ ॥

मग वाक्यविधीचिया निरिविडी । विषयाहुती उडंडी ।

हवन केलें कुडी । इन्द्रियाग्नीचां ॥ २८ ॥

सर्वाणीन्द्रियकर्माणि प्राणकर्माणि चापरे ।

आत्मसंयमयोगाग्नौ जुहति ज्ञानदीपिते ॥ २७ ॥

येकिं यियाचि परीं पार्था । दोष क्षपिले सर्वथा ।

आणिकीं हृदयारणीं मंथा । विवेकु केला ॥ २९ ॥

तो उपशमीं निहिटिला । धैर्ये वरी दाटिला ।

गुरुवाक्यें काढिला । बलिकटपणें ॥ १३० ॥

ऐसें समरसें मथन केलें । तेथ झडकरी काजा आलें ।

जें उज्जीवन जालें । ज्ञानाग्नीचें ॥ ३१ ॥

पहिला रिद्धीसिद्धीचा संभ्रमु । तो निवर्त्तौनि गेला धूम ।

मग प्रकटला सूक्ष्मु । विस्फुलिंगु ॥ ३२ ॥

तेया मनाचें मोकलें । पेटवण घातलें ।

जें यमनियमीं हलवारलें । आइतें होतें ॥ ३३ ॥

तेणें सांधुक्षणे ज्वाला समृद्धा । तेथ बासनांतराचिया समिधा ।

केहेसिं विविधा । जालीलीया ॥ ३४ ॥

मग सोहंमंत्रीं दीक्षिति । इन्द्रियकर्माचिया आहुती ।

तिये ज्ञानानलीं प्रदीप्तीं । दीधलिया ॥ ३५ ॥

पाठि प्राणक्रियेन सृवेनसीं । पूर्णाहुति पडिली हुताशीं ।

तेथ अवभृथ समरसीं । साहाजें जालें ॥ ३६ ॥

मग आत्मबोधिचें मुख । तें जैसें संयमाग्नीचें शेष ।
 तो चि पुरोडाशु देख । घेतला तिहिं ॥ ३७ ॥
 येक ऐसां यजनीं । मुक्त जाले गा त्रिभुवनीं ।
 इया यज्ञक्रिया तारि आनानीं । परि प्राप्य तें एक ॥ ३८ ॥

द्रव्ययज्ञास्तपोयज्ञा योगयज्ञास्तथापरे ।

स्वाध्यायज्ञानयज्ञाश्च यतयः संशितव्रताः ॥ २८ ॥

येक द्रव्ययज्ञ ह्मणपती । एक तपसामप्रिया निरुजति ।
 येक योगयाग ही आहाती । जे सांघीतले ॥ ३९ ॥
 येकिं शद्धीं शद्ध चि यजिजे । तो वाग्यनु ह्मणिजे ।
 ज्ञानें ज्ञेय गमिजे । तो ज्ञानयनु ॥ १४० ॥
 हें अर्जुना सकल कुवाडें । जें अनुष्ठितां अति सांकडें ।
 पारि जितेंद्रियांसी चि घडे । योग्यतावसें ॥ ४१ ॥
 तें प्रवाण येथ भले । योगसमृद्धी आधिले ।
 ह्मणौनि आपणपां तिहीं केलें । आत्महवन ॥ ४२ ॥

अपाने जुव्हति प्राणं प्राणेऽपानं तथापरे ।

प्राणापानगतौ रुद्धा प्राणायामपरायणाः ॥ २९ ॥

एक अपानाग्नीचां मुखीं । प्राणद्रव्यें देखें ।
 हवन केलें एकीं । अभ्यासयोगें ॥ ४३ ॥
 एक अपानु प्राणीं आर्पिती । एक दोहोंतें हीं निरुध्तिती ।
 ते प्राणायामीं ह्मणिपती । पांडुकुमरा ॥ ४४ ॥

अपरे नियताहाराः प्राणान्प्राणेषु जुव्हति ।

सर्वेऽप्येते यज्ञविदो यज्ञक्षपितकल्मषाः ॥ ३० ॥

येक वज्रयोगक्रमें । सर्वाहारसंयमें ।
 प्राणीं प्राणु संभ्रमें । हवन करिती ॥ ४५ ॥
 ऐसे मोक्षकाम सकल । समस्त हे यजनशील ।
 जिहीं यज्ञद्वारीं मळ । क्षालन केलें ॥ ४६ ॥

यज्ञशिष्टाश्रुतभुजो यान्ति ब्रह्मसमात्मनम् ।

नायं लोकोऽस्त्ययज्ञस्य कुतोऽन्यः कुरुसत्तम ॥ ३१ ॥

जेयां अविद्याजात आकलितां । जें उरलें निज स्वभावता ।

तेथ अग्नि आणि होता । उरोचिना ॥ ४७ ॥

जेथ यजितेयात्मा कामु पुरे । यज्ञीचें विधान सरे ।

माघौतें जेथौनि ॐसरे । क्रियाजात ॥ ४८ ॥

विचार जेथ न रिगे । हेतु जेथ नेघे ।

जें द्वैतदोषसंगे । सिंपै चि ना ॥ ४९ ॥

ऐसें अनादिसिद्ध चोखट । जें ज्ञानयज्ञांशिशिष्ट ।

तें ते सेविति ब्रह्मनिष्ठ । ब्रह्माहमंतें ॥ १५० ॥

ऐसे सेखाश्रुतें धाले । कीं अमृतभावासि आले ।

ह्यणौनि ब्रह्म ते जाले । अनायासें ॥ ५१ ॥

एरां विरक्ती माल न घली चि । जेयां संयमाग्नीची सेवा न घडे चि ।

जे बौगयागु ही न कारिती चि । जन्मले सांते ॥ ५२ ॥

एयां ऐहिक ही एक धड नाही । मग परत्रीक सांधिजैल काइ ।

ह्यणौनि असो हे गोठि पाइ । पांडुकुमरा ॥ ५३ ॥

एवं बहुविधा यज्ञा धितता ब्रह्मणो मुखे ।

कर्मजान्बुद्धिं तान्सर्वानेवं ज्ञात्वा विमोक्ष्यसे ॥ ३२ ॥

ऐसे बहुतीं परीं अनेग । जे सांधितले कां याग ।

ते विस्तारुनि वेदें चांग । ह्यणितले आहाति ॥ ५४ ॥

परि तेणें विस्तारें काइ करावें । हे कर्मसिद्ध जाणावे ।

एतुलेनि कर्मबंधु स्वभावे । पावैल ना ॥ ५५ ॥

अर्जुना वेदु जेहाचें मूल । जें क्रियाविशेषें स्थूल ।

जेयां नव्हालियेचें फल । स्वर्गसुख ॥ ५६ ॥

भ्रैयान्द्रव्यमथाद्यज्ञाज्ज्ञानयज्ञः परतप ।

सर्वं कर्माखिलं पार्थ ज्ञाने परिसमाप्यते ॥ ३३ ॥

ते द्रव्ययाग किर होती । परि ज्ञानयज्ञाची सरी न पवती ।
 जेवि तारातेज संपती । दिनकरेंसीं ॥ ५७ ॥
 देखें परमात्मसुखनिधान । साधावेया योगीजन ।
 जें न विसंभति अंजन । उन्मेखनेत्रीं ॥ ५८ ॥
 जें धावंतेया कर्माची लाणि । नैष्कर्म्य बोधाची खाणि ।
 जें भूकैलेयां धणि । साधनाची ॥ ५९ ॥
 जेथ प्रवृत्ति पांगुल जाली । तर्काचि दृष्टि गेली ।
 जेणें इंद्रियें विसरलीं । विषयसंगू ॥ ६० ॥
 मनाचें मनपण गेलें । जेथ बोलांचें बोलणें ठेलें ।
 जेयामाजि सांपडलें । ज्ञेय दीसे ॥ ६१ ॥
 जेथ वैराग्याचा पांगु फीटे । विवेकाचा ही सोसु तूटे ।
 जें न पांतां साहाजें भेटे । आपणां पें ॥ ६२ ॥

तद्विद्धि प्रणिपातेन परिप्रश्नेन सेवया ।

उपदेक्ष्यंति ते ज्ञानं ज्ञानिनस्तत्त्वदर्शिनः ॥ ३४ ॥

तें ज्ञान पें गा बरवें । जें मनीं आधि जाणावें ।
 तें संतां ययां भजावें । सर्वस्वेंसीं ॥ ६३ ॥
 जेयांचा ज्ञानकुरुठा । तेथ साधुसेवा हो दारवठा ।
 तो स्वाधीनु करीं सूभटा । उल्लगौनि ॥ ६४ ॥
 जारे तनुमनुजीवें । विचारासि लागावें ।
 आणि अगर्वता करावें । दास्य सकल ॥ ६५ ॥

यज्ज्ञात्वा न पुनर्मोहमेवं यास्यसि पांडव ।

येन भूतान्यशेषेण द्रक्ष्यस्यात्मन्यथो मयि ॥ ३५ ॥

मग अपेक्षित जें आपुलें । तें ही सांगतील पूसिलें ।
 जेणें अंतःकरण बोधलें । संकल्पा नैये ॥ ६६ ॥
 जेहाचेनि उजीवडें । जालें चित्त निधडें ।
 ब्रह्माचेनि पाडें । निशंक होईल ॥ ६७ ॥

तेव्हलि आपणपेन सहितें । ये अशेपें हीं भूतें ।
माझां स्वरूपीं अखंडितें । देखसी तूं ॥ ६८ ॥
ऐसें ज्ञानप्रकाशें पाहिल । तें मोहांधकार जाइल ।
जें गुरुकृपा होइल । पार्था गा ॥ ६९ ॥

अपि चेदसि पापेभ्यः सर्वेभ्यः पापकृत्तमः ।

सर्वं ज्ञानप्लवेनेव दृजिनं संतरिष्यसि ॥ ७० ॥

जन्हीं कल्मषांचा आगर । तूं भ्रांतिचा सागर ।
व्यामोहाचा डोंगर । होउनि आहासि ॥ ७० ॥
तन्हीं ज्ञानशक्तीचेन पाडें । हें आंधवेंचि गा थोकेडें ।
ऐसें सामर्थ्य जेयाचें चोखडें । ज्ञानीं इथे ॥ ७१ ॥
देखैं विश्वसंभ्रमा ऐसा । जो अमूर्तीचा कडवसा ।
तो जेयाचेया प्रकाशा । पुरे चि ना ॥ ७२ ॥
तेया काइसे मनोमल । हें बोलतां चि अति कीडाल ।
नाहिं येणें पाडें ठिसाल । दूजें जर्गीं ॥ ७३ ॥

यथेधांसि सभिक्षोऽग्निर्भस्मसात्कुरुतेऽर्जुन ।

ज्ञानाग्निः सर्वकर्माणि भस्मसात्कुरुते तथा ॥ ७४ ॥

सांघें भूतत्रयाची काजली । जे गगनामाजि उधळी ।
तिये प्रलङ्घचिये वाहुंठली । काइ अन्न पूरे ॥ ७४ ॥
किं पवनाचेनि कोपें । पाणियें चि जो पळिपे ।
तो प्रलयानल काइ दडपे । तृणें नायें ॥ ७५ ॥

नहि ज्ञानेन सदृशं पवित्रमिह विद्यते ।

तत्स्थयं योगसंस्निद्धः कालेनात्मनि विदति ॥ ७६ ॥

क्षणौनि असो हें न घडे । जें विचारितां चि असंघडे ।
पुडुतीं ज्ञानाचेनि पाडें । पवित्र न दिसे ॥ ७६ ॥
एक ज्ञान ही उत्तम होये । आणिक ही येथ तैसें चि आहे ।
तारि सांघें चैतन्य कां नोहे । दूसरें गा ॥ ७७ ॥

ना तरि महातेजाचेनि कसें । चोखाल प्रतिविंब दीसे ।
 कां गवसलें गवसे । आकाश हें ॥ ७८ ॥
 ना तरि पृथ्वीचेनि पाडें । कांटालें जरि जोडे ।
 तरि ज्ञानासि उपमा घडे । पांडुकुमरा ॥ ७९ ॥
 ह्यणौनि बहुतीं परी पाहातां । पुडुतीं पुडुतीं निर्द्धारितां ।
 हे ज्ञानिची पवित्रता । ज्ञानीचि आधि ॥ १८० ॥
 जैसी अमृताची चवि निवडिजे । तरि अमृता चि सारिखी ह्यणिजे ।
 तैसें ज्ञान हें उपमिजे । ज्ञानेंसीं चि ॥ ८१ ॥
 आतां ययावरिं बोलणें । वायां चि वेलु फेडणें ।
 तव साच जी हें पार्थु ह्यणे । बोलिजत असां ॥ ८२ ॥
 परि तेंचि ज्ञान केवि जाणावें । ऐसें जव अर्जुनें पूसावें ।
 तव तें मनोगत देवें । जाणीतलें ॥ ८३ ॥

श्रद्धावांलुभते ज्ञानं तत्परः संयतेन्द्रियः ।

ज्ञानं लब्ध्वा परां शान्तिमचिरेणाधिगच्छति ॥ ३९ ॥

मग ह्यणतसे किरीटी । आतां चित्त देई इये गोठी ।
 सांघैन ज्ञानाचिये भेटी । उपावो तुज ॥ ८४ ॥
 तरि आत्ममुखाचिया गोडिया । धिटला जो विषयां ।
 जेयाचां ठाई इंद्रियां । मानु नाही ॥ ८५ ॥
 जो मनासि चाड न संघे । जेयां प्रकृतिचें केलें ने घे ।
 जो श्रद्धेचेनि संभोगें । मुखिया जाला ॥ ८६ ॥
 तेयातें चि गिबसित । हें ज्ञान पावे निश्चित ।
 जेयामाजि अचुंबित । शांति असे ॥ ८७ ॥
 तें ज्ञान हृदयीं प्रतिष्ठे । आणि शांतिचा अंकुर फूटे ।
 मग विस्तारु बहुत प्रकटे । ततक्षणीं ॥ ८८ ॥
 तेव्हां जेउति वांस पाहिजे । तेउती शांती चि एकि देखिजे ।
 तेथ पारावार नेणिजे । निर्द्धारितां ॥ ८९ ॥

ऐसा हा उत्तरोत्तर । ज्ञानबीजाचा विस्तार ।

हा सांगतां असे अपार । परि असो आतां ॥ १९.० ॥

अज्ञश्चाश्रद्धानश्च संशयात्मा विनश्यति ।

नायं लोकोऽस्ति न परो न सुखं संशयात्मनः ॥ ४० ॥

आइकैं जेया प्राण्यांचां टांड । यया ज्ञानाचें पाहिलें नाहि ।

तेयाचें जियालें ह्मणों काइ । वरि मेलें चांग ॥ ११ ॥

भून्य जैसें गृह । कां चैतन्येवीण देह ।

तैसें जीवीत तें संमोह । ज्ञानहीन ॥ १२ ॥

अथवा ज्ञान कीर आपु नेहे । परि तें चाड येकि जन्हीं वाहे ।

तेथ जीवाला काहीं अहे । प्राप्तिचा ॥ १३ ॥

वांचूनि ज्ञानाची गोठि काइसी । परि ते आस्था ही न धरी जो मानसी ।

तो संशयरूप हुताशी । पडिला जाण ॥ १४ ॥

जें अमृत ही परि नावडे । ऐसें संवियां चि अरोचक जें पडे ।

तें मरण आलें असें फुडें । हें जाणों ये कीं ॥ १५ ॥

तैसा विषयमुखरजें । जो ज्ञानेंसीं चि माजे ।

तो संशइ अंगिकरिजे । एथ भ्रान्ति नाहीं ॥ १६ ॥

मग संशइ जरि पडिला । तरि निभ्रांत जाणें नाशला ।

तो अहिकाही परि मूकला । मुखासि गा ॥ १७ ॥

जेया कालज्वर आंगीं वाणे । तो शीतोष्णें जैसीं नेणे ।

आगि आणि चांदिणें । सारसैं चि मानीं ॥ १८ ॥

तैसें साच आणि लाटिकें । वीरू अथवा नीकें ।

संशइ तो नोलखे । हिताहितें ॥ १९ ॥

हा रातिदिवस पाहि । जैसा जाल्यंघा ठाउवा नाहि ।

तैसें संशया सत्य काहीं । मना नै ये ॥ २०० ॥

ह्मणौनि संशयाह्वनि धोर । आणिक पाप नाहि धोर ।

हा विनाशाची वागुर । प्राण्यांसि ॥ १ ॥

योगसंन्यस्तकर्माणं ज्ञानसंछिन्नसंशयम्

आत्मव्यंतं न कर्माणि निबध्नन्ति धनंजय ॥ ४१ ॥

हणौनि हा लजावा । हाचि येकु जीणावा ।

जो ज्ञानाचिया असावा— । माजि असे ॥ २ ॥

जे अज्ञानाचें गडदे पडे । तें हा बहुवसु मनीं वाढे ।

हणौनि सर्वथा मार्गु मोडे । विश्वासाचा ॥ ३ ॥

तस्मादज्ञानसंभूतं हृत्स्थं ज्ञानासिनात्मनः ।

छिन्त्येनं संशय योगमातिष्ठोत्तिष्ठ भारत ॥ ४२ ॥

हृदईं हाचि न समाण । आणि बुद्धितें गवसूनि ठाण ।

तेथ संशयात्मक होण । लोकत्रय ॥ ४ ॥

ऐसा ही जन्हीं थोरावे । तन्हीं उपायें येकें आंगवे ।

जरी हातीं होये बरेचें । ज्ञानखड्ग ॥ ५ ॥

तारि तेणें ज्ञानशस्त्रें तांखडे । निखळ हा निवटे ।

मग निःशेष स्वता फिटे । मानसिचा ॥ ६ ॥

या कारणें पार्था । उटीं वेगीं बरीता ।

नाशु करुनि हृदयस्था । संशयासि ॥ ७ ॥

ऐसें सर्वज्ञाचा वापु । जो कृष्ण ज्ञानदापु ।

तो हणतसे सकृपु । आइकें राया ॥ ८ ॥

तवं एया पूर्वापर बोलाचा । विचारुनि कुमर पांडुचा ।

कैसा प्रश्नु हान अवसरिचा । कारिता होईल ॥ ९ ॥

जेयाचां बरेवेपणीं । कीजे आठां रसांची ओलावणी ।

जो सज्जनाचिये आणी । विसावां जर्गी ॥ २१० ॥

तो शांतू चि अभिनवैल । ते परियसां मन्हाटे बोल ।

जे समुद्रा ही हूनि खोल । अर्थभरित ॥ ११ ॥

जैसें विव्र तरि बचकेयेवडे । परि प्रकाशा त्रैलोक्य धोकडे ।

शब्दाचो व्यासि तेणें पांडे । अनुभवावी ॥ १२ ॥

ना तारि कामितेयाचिया इछा । फळे कल्पवृक्षु जैसा ।
 बोलु व्यापकु होये तैसा । तरि अवधान देयावें ॥ १३ ॥
 हें असो काये हणवें । सर्वज्ञ जाणती स्वभावें ।
 तन्हीं नांकेनि चित्त देयावें । हे विनती माझी ॥ १४ ॥
 जें साहित्य आणि शांती । हे रेखा दिसे बोलती ।
 जैसी लावण्यगुणयुक्ती । आणि प्रसन्नता ॥ १५ ॥
 आदिं चि साखर आवडे । आणि ते चि जरि ओखधा जोडे ।
 तारि न सेवावी कां कोडें । नावां नावां ॥ २१६ ॥
 साहाजें मलयानीलु सुंदु । तेया ही होये अमृताचा स्वादु ।
 आणि तेथ चि जोडे नादु । दैवंगत्या ॥ १७ ॥
 तारि स्पर्शें सर्वांग जीववी । स्वादें जीभेतें नाचवी ।
 तेविं चि कानाकरवि हणवी । बापु माझा ॥ १८ ॥
 तैसें कथेचें इये आइकणें । एक श्रवणासि होये पारणें ।
 आणि संसारदुःखा मोकळवणें । विवृतीविण ॥ १९ ॥
 जरि मैत्रें चि बैरी मरे । तरि वापां कां बांधावे कटारे ।
 रोगु जाये दूवें ओंगरें । तरि नीलु कां पियावा ॥ २२० ॥
 तैसा मनाचा मारु न करितां । इंद्रियां दुःख नेंदितां ।
 एथ मोक्षु असे आइकतां । श्रवणांमाझि ॥ २१ ॥
 हणौनि आथिलिया आराणुका । गीतार्थु हा नीका ।
 ज्ञानदे० हणें आइकां । निवृत्तिदासु ॥ २२२ ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां
 योगशास्त्रे श्रीकृष्णार्जुनसंवादे ज्ञानयोगो
 नाम चतुर्थोऽध्यायः ॥

॥ श्रीसर्वात्मकरामकृष्णपणमस्तु ॥

ज्ञानेश्वरी

अध्याय पांचवा.

अर्जुन उवाच ॥

संन्यासं कर्मणां कृष्ण पुनर्योगं च शंससि ।

यच्छ्रेय एतयोरेकं तन्मे ब्रूहि सुनिश्चितम् ॥ १ ॥

मग पार्थ कृष्णातें झणे । हां हो हें कैसें तुमचें बोलणें ।

एक होये तरि अंतःकरणें । विचारुं ए ॥ १ ॥

मागां सकल कर्मांचा संन्यासु । तुझीं चि निरोपिला होता बहुवसु ।

तरि कर्मयोगीं केवि अतिरसु । पोखित असा ॥ २ ॥

हें ऐसें द्वैतार्थ बोलतां । आत्मां नेणतेयांचेया चित्ता ।

आपुलिये चाडे अनंता । उमजु नोहे ॥ ३ ॥

आइकें एकसरां तें बोधिजे । तरि एकनिष्ठ चि बोलिजे ।

हें आणिकिं काये सांघिजे । तुझाप्रति ॥ ४ ॥

तन्हीं येया चि लागौनि तुमतें । मियां माझेरासि एक विनविलें होतें ।

जें हा परमार्थ ध्वनितें । न बोलावा ॥ ५ ॥

परि तें मागील असो देवा । आतां प्रस्तुतीं उकलु देखावा ।

सांघें दोहोंमाझि बरवा । मार्गु कवणु ॥ ६ ॥

जो परिणामीचा निर्वाला । अचुंबित ये फला ।

आणि अनुष्ठितां प्रांजला । सवियां चि ॥ ७ ॥

जैसे निद्रेचें सुख न मोडे । आणि मार्गु तरि बहूँ सांडे ।
तैसें सोखासना सांघडें । सोहपें होये ॥ ८ ॥

श्रीभगवानुवाच ॥

संन्यासः कर्मयोगश्च निःश्रेयसकराबुभौ ।

तयोस्तु कर्मसंन्यासात्कर्मयोगो विशिष्यते ॥ २ ॥

एणें अर्जुनाचेनि बोलें । देवो मनीं रिझले ।
मग होईल आइकें हणितलें । संतोखौनियां ॥ ९ ॥
देखां कामधेनु ऐसी माये । सदैवां जेया होये ।
तो चंद्रु चि परि लाहे । खेलावया ॥ १० ॥
पाहा पां शंभूची प्रसन्नता । तेया उपमन्युचिया आर्त्ता ।
काये क्षीराब्धि दूधभाता । देई चि ना ॥ ११ ॥
तैसा औदार्याचा कुरुठा । कृष्णु आपु जालेयां सुभटा ।
कां सर्व सुखाचा वसैठा । तो चि नोहावा ॥ १२ ॥
एथ चमत्कार काइसा । गोसांवि लक्ष्मीकांता ऐसा ।
आतां आपुलालिया सावैसा । मागाचा किं ॥ १३ ॥
हणौनि अर्जुनें हणितलें । तें हांसौनि येरें दीधलें ।
तें चि सांघैन बोलिलें । काइ कृष्णें ॥ १४ ॥
तो हणने गा कुंतीमुता । हे संन्यासयोग विचारितां ।
मोक्षकर तत्त्वता । दोन्हीं होंति ॥ १५ ॥
तन्हीं जाणां नेणां सकलां । हा कर्मयोग किर पांजला ।
जैसी नाव स्त्रियां बालां । तोयतरणी ॥ १६ ॥
तैसें सारासार पाहिजे । तरि सोहोपा हा चि देखिजे ।
एणें संन्यासफल लाहिजे । अनायासें ॥ १७ ॥

श्रेयः स नित्यसंन्यासी यो न द्वेष्टि न कांक्षति ।

निर्द्वंद्वो हि महाबाहो सुखं बंधात्प्रमुच्यते ॥ ३ ॥

आतां येया चि लागि सांघैन । तुज संन्यासियाचें चिन्ह ।
 मग साहाजें हें अभिन्न । जाणसी तूं ॥ १८ ॥
 तरि गेल्याची से न करी । न पत्रतां चाड न धरी ।
 जो मुनिश्चलु आंतरी । मेरु तैसा ॥ १९ ॥
 आणि मी माझें हे आठवण । विसरलें जेयाचें अंतःकरण ।
 तो पार्था संन्यासी जाण । निरंतर ॥ २० ॥
 जो मनें ऐसा जाला । संगि तो चि सांडिला ।
 ह्मणौनि मुखें मुख पातला । अखंडीत ॥ २१ ॥
 आतां गृहादीक आवघें । तें काहीं च नलगे त्यजावें ।
 जें घेतें जालें स्वभावे । निःसंगु ह्मणुनि ॥ २२ ॥
 देखैं अग्नि विज्ञौनि जाये । मग जें राखौडी केवल होये ।
 तैं ते कापुसैं हीं गवसूं ये । जिया परीं ॥ २३ ॥
 तैसा असतेन उपाधी । नाकलिजे तो कर्मबंधीं ।
 जेयाचिये बुद्धी । संकल्पु नाहीं ॥ २४ ॥
 ह्मणुनि कल्पना जें सांडे । तें चि गा संन्यासु घडे ।
 येया कारणें दोन्हीं सांघडे । संन्यासयोग ॥ २५ ॥

सांख्ययोगौ पृथग्बालाः प्रवदन्ति न पंडिताः ।

एकमन्यास्थितः सम्यग्बुभयोर्विदते फलम् ॥ ४ ॥

यन्हवि तःहीं पार्था । जे मूर्ख होंति सर्वथा ।
 ते सांख्यकर्मसंस्था । जाणति केवि ॥ २६ ॥
 साहाजें ते अज्ञान । ह्मणौनि ह्मणति हें भिन्न ।
 यन्हवि दीप प्रति काइ आनान । प्रकाश आहाति ॥ २७ ॥
 पै सम्यक् एकानुभवे । जेहि देखिलें तत्त्व आवघें ।
 दोहोंतें हीं एकभावे । मानिति गा ॥ २८ ॥

यत्सांख्यैः प्राप्यते स्थानं तद्योगैरपि गम्यते ।

एकं सांख्यं च योगं च यः पश्यति स पश्यति ॥ ५ ॥

आणि सांख्यीं जें पाविजे । तें चि योगिं गमिजे ।
 ह्यौनि ऐक्य दोहों साहाजें । इया ही परो ॥ २९ ॥
 देखें आकाशा आणि अवकाशा । भेदु कां नाहि जैसा ।
 तैसें ऐक्य योगसंन्यासा । बोलखे जो ॥ ३० ॥
 तेया चि जगीं पाहलें । आपणपें तेणें चि देखिलें ।
 जेया सांख्ययोग जाणवले । भेदेविण ॥ ३१ ॥

संन्यासस्तु महाबाहो दुःखमाप्नुमयोगतः ।

योगयुक्तो मुनिर्ब्रह्म न चिरेणाधिगच्छति ॥ ६ ॥

जो युक्तिपथें पार्था । चडे मोक्षपर्वता ।
 तो महासुखाचा निमथा । वहिला पावे ॥ ३२ ॥
 ऐसी योगस्थिति जेया सांडे । तो बायां चि हव्यासीं पडे ।
 परि प्राप्ति कहीं न घडे । संन्यासाची ॥ ३३ ॥

योगयुक्तो विशुद्धात्मा विजितात्मा जितेंद्रियः ।

सर्वभूतात्मभूतात्मा कुर्वन्नपि न लिप्यते ॥ ७ ॥

जेणें भ्रांतीपासोनि हीतलें । गुरुवाक्यें मन धूतलें ।
 मग आत्मस्वरूपीं घातलें । हरौनियां ॥ ३४ ॥
 जेसें समुद्रीं लवण न पडे । तवें वेगलें अल्प आवडे ।
 मग होये सिंधू चि एवडें । मिले तेव्हां ॥ ३५ ॥
 तैसें संकल्पौनि काढलें । जेयाचें मन चैतन्य जाले ।
 तेणें एकदेशिये परि व्यापिलें । लोकत्रय ॥ ३६ ॥
 आतां कर्त्ता कर्म करावें । हें कुठलें तेया आघवें ।
 आणि करी तन्हीं स्वभावे । अकर्त्ता तो ॥ ३७ ॥

नैव किंचित्करोमीति युक्तो मन्येत तत्त्ववित् ।

प्रह्वन्मृण्वन्स्पृशन्निघ्नन्नश्नन्नच्छन्स्वपन्स्वसन् ॥ ८ ॥

जें पार्था तेया देहीं । मीं ऐसा आठौ नाही ।
 तारि कर्तृत्व कैचें काइ । उरे साधें ॥ ३८ ॥



भाषार्थदीपिका.

ऐसे तनुत्यागेंविण । अमूर्त्तिचे गुण ।
 दीसति संपूर्ण । योगयुक्ता ॥ ३९ ॥
 यन्हवि आणिकाचिया परी । तो ही येकु शरीरी ।
 अशेषी ही व्यापारी । वर्त्तु असे ॥ ४० ॥
 तो ही नेत्री पाहे । श्रवणीं आइकतु आहे ।
 परि तेथिचा सर्वथा नोहे । हें नवल देखें ॥ ४१ ॥
 स्पर्शासि तरि जाणे । परिमलु सेवी घ्राणें ।
 अवसरोचित बोलणें । तेया ही आधि ॥ ४२ ॥
 आहारातें स्वीकरी । त्याज्य तें परिहरी ।
 निद्रेचा अवसरी । निदिजे मुखें ॥ ४३ ॥
 आपुलेनि इछावसें । तो ही गा चालतु दीसे ।
 पै सकल कर्म ऐसें । राहाटे किर ॥ ४४ ॥

प्रलपन्विस्तृजन्गृह्णन्निमिषन्निमिषन्नपि ।

इन्द्रियाणीन्द्रियार्थेषु वर्त्तत इति धारयन् ॥ ९ ॥

हें सांघों काइ एकैक । देखें श्वासोश्वासादिक ।
 आणि निमेषानिमेष । आदिकरुनि ॥ ४५ ॥
 पार्थी तेयाचां ठांड । हें आवयें चि आधि पाई ।
 परि तो करिता नोहे काहीं । प्रतीतिबलें ॥ ४६ ॥
 जें श्रांतिसेजे मृतला । तें स्वप्नमुखें भूतला ।
 मग तो ज्ञानोदयीं चेइला । ह्मणोनियां ॥ ४७ ॥
 आतां अधिष्ठानसंगति । अशेषा ही इन्द्रियवृत्ती ।
 आपुलालां अर्थी । वर्त्तत आर्थी ॥ ४८ ॥

ब्रह्मण्याधाय कर्माणि संगं त्यक्त्वा करोति यः ।

लिप्यते न स पापेन पद्मपत्रमिवाम्भसा ॥ १० ॥

दांपाचेनि प्रकाशें । गृहिचे व्यापार जैसे ।
 देहीं कर्मजात तैसें । योगयुक्त ॥ ४९ ॥

तौ कर्म करी सकलें । परि कर्मबंधा नाकले ।

जैसे न सिंघे जलें जलें । पञ्चपत्र ॥ ५० ॥

कायेन मनसा बुद्ध्या केवलेन्द्रियैरपि ।

योगिनः कर्म कुर्वति संगं त्यक्त्वात्मशुद्धये ॥ ११ ॥

देखें बुद्धीची भाष नेणिजे । मनाचा अंकर नुदैजे ।

ऐसा व्यापार तो बोलिजे । शरीर गा ॥ ५१ ॥

हैं चि मन्हाटे परिहसैं । तारे बालकाची चेष्टा जैसी ।

योगिये करिति कर्म तैसी । केवला तन् ॥ ५२ ॥

मग पांचभूतिक सांचले । जेव्हां शरीर असे निदलें ।

तेथ मन चि राहाटे एकलें । स्वर्गी जेवि ॥ ५३ ॥

नवल आइकें धनुर्द्धरा । कैसा वासनेचा सर्वसारा ।

देहा हों नेंदी उजगरा । परि मुखदुःखें भोगी ॥ ५४ ॥

दाहिं इंद्रियांचां गावि नेणिजे । ऐसा व्यापार जो निफजे ।

तो केवल गा हाणिजे । मानसाचा ॥ ५५ ॥

योगिये तो ही करिति । परि अकर्म तैसें बुझति ।

जे सांडिली आहे संगती । अहंभावाची ॥ ५६ ॥

आतां जालेयां भ्रमहत । जैसे पिशाचाचें चित ।

मग इंद्रियांचें चेष्टित । विकट दीसे ॥ ५७ ॥

स्वरूप तरि देखे । आलविलें आइके ।

शब्दु बोले मुखें । परि ज्ञान नाही ॥ ५८ ॥

हैं असो काजेंविण । जें जें काहीं करण ।

तें केवल कर्म जाण । इंद्रियांचें ॥ ५९ ॥

मग सर्वत्र जें जाणतें । तें बुद्धांचें कर्म निरुतें ।

बोलख अर्जुनातें । हाणे हरी ॥ ६० ॥

ते बुद्धि धूर करुनि । कर्म करो चित देउनि ।

परि नैष्कर्म्यापासोनि । मुक्त दीसति ॥ ६१ ॥

जे बुद्धिचिये ठाउनि देहीं । तेयां अहंकाराची शंका नाही ।
 ह्मणोनि कर्में चि करित पाहीं । चोखालले ॥ ६२ ॥
 आगा करितेन विण कर्म । तें चि तें नैष्कर्म्य ।
 हें जाणति गुरुगम्य । सुवर्म जे ॥ ६३ ॥
 आतां शांतरसाचें भरितें । सांडित आहे पातातें ।
 जें बोलणें बोला परातें । बोलवलें ॥ ६४ ॥
 एथ इंद्रियांचा पांगु । जेया फोटला आहे चांगु ।
 तेयांसी चि आथि लागु । परिसावेया ॥ ६५ ॥
 हा असो अतिप्रसंगु । न संडि पां कथालागु ।
 होईल श्लोकसंगती भंगु । ह्मणोनियां ॥ ६६ ॥
 जें मना कलितां कुवाडें । घांघवसितां बुद्धी नातुडे ।
 तें दैवाचेन मुरवाडें । सांघवलें तुज ॥ ६७ ॥
 जें शद्धातीत स्वभावे । तें बोलीं चि जरि फावे ।
 तरि आंणिकें काडू करावें । सांघवें कथा ॥ ६८ ॥
 हा आर्त्तिविशेषु श्रोतेयांचा । जाणोनि दासु निवृत्तिचा ।
 ह्मणे संवादु तेयां दोघांचा । परियमां तरि ॥ ६९ ॥
 मग कृष्ण ह्मणे पार्थातें । आतां प्राप्ताचें चिन्ह पुरतें ।
 सांघेन तुज निरुतें । चित्त देई ॥ ७० ॥

युक्तः कर्मफलं त्यक्त्वः शान्तिमाप्नोति नैष्ठिकीम् ।

अयुक्तः कामकारेण फळे सक्तो निवध्यते ॥ १२ ॥

तरि आत्मयोगें आयिला । जो कर्मफलासि वीटला ।
 तो घर रिगोनि वरिला । शांती जर्गी ॥ ७१ ॥
 एरु कर्मबंधें किरीटी । अभिलाखाचिया मांठी ।
 कालासला खुंटी । फळभोगाचां ॥ ७२ ॥
 फलाचिये आधवे । ऐसें कर्म करी आववें ।
 मग न कीजे येणें भावें । उपेक्षी जो ॥ ७३ ॥

सर्वकर्माणि मनसा संन्यस्याऽऽस्ते सुखं वशो ।

नवद्वारे पुरे देही नैव कुर्वन्नकारयन् ॥ १३ ॥

तो जियाकडे वास पाहे । तेउती सुखाची सृष्टि होये ।

तो ह्मणे तेथ राहे । महाबोधु ॥ ७४ ॥

नवद्वारें देहीं । तो असे पर नाही ।

कारतू चि न करी काहीं । फलत्यागी ॥ ७५ ॥

न कर्तृत्वं न कर्माणि लोकस्य सृजति प्रभुः ।

न कर्मफलसंयोगं स्वभावस्तु प्रवर्त्तते ॥ १४ ॥

जैसा कां सर्वेश्वर । पाहेजे तव निर्व्यापार ।

परि तो चि रची विस्तार । त्रिभुवनाचा ॥ ७६ ॥

आणि करिता ऐसें ह्मणिये । तरि कर्मि कव्हणि न सिंघे ।

जें हातुपाउ न लिंघे । उदासवृत्तिचा ॥ ७७ ॥

योगनिद्रा तरि न मोडे । अकर्तपणा सांचलु न पडे ।

परि महाभूतांचें दलवाडें । उभारी भलें ॥ ७८ ॥

जगाचां जिविं आहे । परि कव्हणांचा कहिं नोहे ।

जग चि होये जाये । तो शुद्धि ही नेणे ॥ ७९ ॥

नादस्ते कस्यचित्पापं न चैव सुकृतं विभुः ।

अज्ञानेनावृतं ज्ञानं तेन मुह्यंति जंतवः ॥ १५ ॥

पापपुण्यें अशेषें । तो पासि चि असतु न देखे ।

आणि साक्षि ही दोहों न ठके । परि गोठि काइसी ॥ ८० ॥

पै मूर्त्तिचेनि मेलें । तो मूर्त्तु चि होउनि खेले ।

परि अमूर्त्तपण न मेलें । दादुलेयाचें ॥ ८१ ॥

तो सृजी पाली संहारी । ऐसें बोलति जे चराचरीं ।

ते अज्ञान गा अवधारीं । पांडुकुमरा ॥ ८२ ॥

ज्ञानेन तु तदज्ञानं येषां नाशितमात्मनः ।

तेषामादित्यवज्ज्ञानं प्रकाशयति तत्परम् ॥ १६ ॥

तैं चि अज्ञान जैं समूल तूटे । तैं भ्रातिचें मसैरें फीटे ।
 मग अकर्तृत्व हें प्रकटे । ईश्वराचें ॥ ८३ ॥
 एथ ईश्वर एकु अकर्ता । ऐसें मानलें जरि चित्ता ।
 तो चि मी हें स्वभावता । आदि चि आहे ॥ ८४ ॥
 ऐसेनि विवेकें उदो चित्ति । तेयांसि भेदु कैचा व्रीजयत्ती ।
 देखैं आपुलिया प्रतीती । जग चि मुक्त ॥ ८५ ॥
 जैसी पूर्व दिशेचां राउलीं । उदयाची सूर्य होथे दिवाली ।
 किं एन्हीं हीं दिशां तिये चि कालीं । कालिमा नाहिं ॥ ८६ ॥
 ऐसें व्यापक ज्ञान भलें । जेयांन्या हृदया गिवसत आले ।
 तेयांची समतादृष्टि बोले । विशेषू काई ॥ ८७ ॥

तद्बुद्धयस्तदात्मानस्तन्निष्ठास्तत्परायणाः ।

गच्छन्त्यपुनरावृत्तिं ज्ञाननिर्धूतकल्मषाः ॥ १७ ॥

एक आपण्यां चि जैसें । ते देखति विश्व तैसें ।
 हें बोलणें काइ ऐसें । नवल एथ ॥ ८८ ॥
 परि दैव जैसें कवतिकें । काहिं चि सरोनि दैन्य न देखे ।
 कां विवेकु हा नोळखे । भ्रातितें ॥ ८९ ॥
 ना तरि अंधकाराची वानी । जैसा सूर्य नेणें स्वप्नी ।
 अमृत नाइके आपुले कानीं । मृत्युकथा ॥ ९० ॥
 हें असो संतापु कैसा । हणौनि चंद्रु कां न स्मरे जैसा ।
 भूति भेदु नेणति तैसा । ज्ञानिये ते ॥ ९१ ॥

विद्याविनयसंपन्ने ब्राह्मणे गवि हस्तिनि ।

शुनि चैव श्वपाके च पंडिताः समदर्शिनः ॥ १८ ॥

मग मशकु हा गजु । कां श्वपचु हा द्विजु ।
 पैल इतरु हा आत्मजु । हें उरैल कें ॥ ९२ ॥
 ना तरि धेनु हे श्वान । एक उरुयें एक हीन ।
 हें असो कैचें स्वप्न । जागतेया ॥ ९३ ॥

एथ भेदु तारि देखावा । जरि अहंभाओ उरला होआवा ।
तो आदीं चि नाहिं आघवा । आतां विषम काइ ॥ ९४ ॥
ह्मणौनि सर्वत्र सदा सम । तें आपण चि अद्वय ब्रह्म ।
हें संपूर्णता जाणें वर्म । समदृष्ट्यांचें ॥ ९५ ॥

इहैव तैर्जितः सर्गो येषां साम्ये स्थितं मनः ।

निर्दोषं हि समं ब्रह्म तस्माद्ब्रह्मणि ते स्थिताः ॥ १९ ॥

जिहि विषयसंगु न संडितां । इंद्रियांतें न दंडितां ।
भोगिली निःसंगता । कामेंद्रिण ॥ ९६ ॥
जिहि लोकाचेन आधारें । लौकिकें चि व्यापारें ।
सांडिलें निदमुरें । लौकीक हें ॥ ९७ ॥
जैसा जनामाजि खेचरु । असतू चि जना नव्हे गोचरु ।
तैसे शरीरीं ते परि संसारु । नोलखे तेयां ॥ ९८ ॥
हें असो पवनाचेनि मेलें । जैसें जळिं जळ चि लोले ।
आणिकें ह्मणति वेगळे । कळोळ हे ॥ ९९ ॥
तैसें नामरूप तेयाचें । यन्हविं ब्रह्म चि ब्रह्मिचें ।
मन साम्या आलें जेयाचें । सर्वत्र गा ॥ १०० ॥

न ब्रह्मण्येतिप्रथं प्राप्य नोद्विजेत्प्राप्य चाप्रियम् ।

स्थिरयुद्धिरसंमूढो ब्रह्मविद्ब्रह्मणि स्थितः ॥ २० ॥

ऐसेन समदृष्टी जो होथे । तेया पुरुषा लक्षण हीं आहे ।
अर्जुना संक्षेपें सांघेन पाहे । अच्युतु ह्मणे ॥ १ ॥
तरि मृगजलाचेनि पूरें । जैसें न लोटिजे कां गिरिवरें ।
तैसा शुभाशुभीं न विकरे । पातलां जो ॥ २ ॥
तो चि तो निरुता । समदृष्टी तत्वता ।
हरि ह्मणे पांडुसुता । तो चि ब्रह्म ॥ ३ ॥

बाह्यरूपशेष्वसक्तात्मा विदित्यात्मनियत्सुखम् ।

स ब्रह्मयोगयुक्तात्मा सुखमक्षय्यमश्नुते ॥ २१ ॥

जेया आपणपें सांडूनि कहीं । इन्द्रियग्रामुंवरि एणें नह्हीं ।
तो विषय न सेवी हें काइ । चित्र एथ ॥ ४ ॥

साहाजें स्वमुखिचेन अपारें । सुरवाडें आंतरे ।
रचला ह्मणौनि बाहिरे । पाउल न घली ॥ ५ ॥

साधें कुमुददलाचेनि ताटें । जेविला चंद्रकिरणें चोखटें ।
तो चकोरु बालुवंटें । चुंबितु आहे ॥ ६ ॥

तैसें आत्ममुख उपाडलें । जेयासि आपणपां चि फावलें ।
तेयां विषय साहाजें सांडले । सांघों काइ ॥ ७ ॥

ये हि संस्पर्शजा भोगा दुःखयोनय एव ते ।

आद्यंतवंतः कांतेय न तेषु रमते बुधः ॥ २२ ॥

यन्हविं तन्ह्हीं कवतिकें । विचारूनि पाहे पां नाकें ।

एयां विषयांचेन मुखें । झांकवति कवण ॥ ८ ॥

जिहि आपणपें नाहिं देखिलें । ते चि हीं इन्द्रियार्थी रंजले ।

जैसें कां आलुकलें । तुपान सेवी ॥ ९ ॥

ना तरि मृगें तृषापीडितें । संभ्रमें विसरौनि जलातें ।

मग तोयबुद्धि बरडीतें । टाकूनि एंति ॥ ११० ॥

तैसें आपणपें नाहिं दीटें । जेहांतें स्वमुखाचे सदा खराटे ।

तेयांसी चि विषय हे गोमटे । आवडति ॥ ११ ॥

यन्हविं विपें काइ मुख आहे । हें बोलणें चि सारिखें मोहे ।

तारि विशुत्स्फुरणें कां न पाहे । जगामाझि ॥ १२ ॥

साधें वातातापु हा धरे । ऐसें अभ्रछाया चि सरें ।

तारि त्रिमालिकें धवलारें । करावीं कां ॥ १३ ॥

ह्मणौनि विषयमुख जें बोलिजे । तें नेणतां गा वायां जल्पिजे ।

जैसें महुर् हान कां ह्मणिजे । विपकंदातें ॥ १४ ॥

ना तरि भौमा नावं मंगलु । रोहिणीतें ह्मणिजे जलु ।

तैसा सुखप्रवादु बरलु । विपद्कु हा ॥ १५ ॥

हे असो आघवी बोली । सांघ पां सर्पफणिची साउली ।
 ते शीतल होईल केतुली । मूखकांसि ॥ १६ ॥
 जैसा आमीषकवल्लु पांडवा । मीनु न सेवी तवं चि बरवा ।
 तैसा विषयसंगु आघवा । निभ्रांत जाणें ॥ १७ ॥
 हें चि विरक्तिचिया दृष्टी । जें निहालिजे किरीटी ।
 तें पांडुरोगाचिये पुष्टी । सारिखें दीसे ॥ १८ ॥
 ह्मणौनि विषयभोगीं जें सुख । तें साद्यंत चि जाण दुःख ।
 पारि काइ करीतु मूर्ख । तें न सेवितां न सरे ॥ १९ ॥
 ते आंतर नेणती चि बापुडे । ह्मणौनि अगत्या सेवणें घडे ।
 साधें प्रयपंकिचे कीडे । काइ चिलिसि घेंती ॥ २० ॥
 तेयां दुःख्यां दुःख चि जिन्हार । ते विषयकर्मिचे दर्दूर ।
 तें चि जलातें जलचर । सांडितु केवि ॥ २१ ॥
 आणि दुःखयोनी जिया आहाति । तिया निरर्थका तारि नव्हति ।
 जारि विषयांवरि विरक्ति । धरीति जीव ॥ २२ ॥

शक्रोतीहैव यः सोढुं प्राक्शरीरविमोक्षणात् ।

कामक्रोधोद्भवं वेगं स युक्तः स सुखी नरः ॥ २३ ॥

ना तारि गर्भवासादि संकट । कां जन्ममरणींचे कष्ट ।
 हे विसांवेनिविण वाट । वाहवी कवण ॥ २३ ॥
 जारि विषइं विषयो सांडिजेल । तारि महादोषिं कें वसिजेल ।
 आणि हा संसारशब्दु नव्हैल । लटका जर्गी ॥ २४ ॥
 ह्मणौनि अविद्याजात नाथिलें । तें तिहिं चि साच दाविलें ।
 जिहिं सुखबुद्धी घेतलें । विषयदुःख ॥ २५ ॥
 एया कारणें गा सूभटा । हा विचारितां विखो ओखटा ।
 तूं झनें कहीं इया वाटा । विसरौनि जासी ॥ २६ ॥
 पै ययातें विरक्त पुरुष । त्यजीति कां जैसें विष ।
 निराशां तेयां दुःख । दाविलां नावडे ॥ २७ ॥

ज्ञानियांचां ठांडं । एयाची मातु ही किर नाहि ।
 देहीं देहभाव जिहीं । स्ववंश केले ॥ २८ ॥
 जेयातें बाह्याची भाष । नेणिजे चि निःशेष ।
 आंतर चि सुख । एक आथि ॥ २९ ॥
 परि ते वेगळेपणें कां भोगिजे । जेंसें पक्षियें फल चुंबिजे ।
 जेंसें नव्हे तेथ विसरिजे । भोगितेपण ॥ ३० ॥
 भोगि अवस्था एकि उठि । ते अहंकाराचलु लोटी ।
 मग मुखेंसीं घे आंटी । गाढेपणें ॥ ३१ ॥
 तिये आलिंगनमेलीं । होये आपेंआपु कवली ।
 तेथ जल जेंसें जलीं । वेगळें न दिसे ॥ ३२ ॥
 कां आकाशीं वायु हारपे । तेथ दोनि हा भाऊ लोपे ।
 तैसें मुख चि उरे स्वरूपें । मुरति तिये ॥ ३३ ॥
 ऐसी द्वैताची भाष जाये । मग ह्मणों जरि येक चि होये ।
 तरि तेथ साक्षि कवण आहे । जाणतें जें ॥ ३४ ॥
 ह्मणौनि असो हें आघवें । एथ न बोलणें काइ बोलावें ।
 ते खुण चि पावेल स्वभावे । आत्मरामीं ॥ ३५ ॥
 जे ऐसेन मुखें मातले । आपणपां चि आपण गुंतले ।
 ते मी जाण निखल आंतले । समरसाचे ॥ ३६ ॥
 ते आनंदाचे अनुकार । मुखाचे अंकुर ।
 किं महाबोधें विकार । केले जैसे ॥ ३७ ॥
 ते विवेकाचे गावं । किं परब्रह्मिचे स्वभाव ।
 ना तरि अलंकरले अवयव । ब्रह्मविद्येचे ॥ ३८ ॥
 ते सत्वाचे सात्विक । किं चैतन्याचे आंगिक ।
 हें बहु असो एकैक । वानिसि काइ ॥ ३९ ॥
 तूं संतस्तवनीं रचसी । तरि कथेची से न करिसि ।
 किर निरालीं बोल देखसी । सनागर ॥ ४० ॥

परि तो रसातिशयो मुकुली । मग प्रथार्थुदीप उजळि ।
 करी साधुहृदयराउली । मंगलउखा ॥ ४१ ॥
 ऐसा गुरुत्वा उवाइला । निवृत्तिदासासि पातला ।
 मग तो ह्मणे कृष्ण काइ बोलिला । तें चि आइका ॥ ४२ ॥
 योंऽतःसुखोंऽतरारामस्तथांतर्ज्योतिरेव यः ।
 स योगी ब्रह्म निर्वाणं ब्रह्मभूतोऽधिगच्छति ॥ २४ ॥
 अर्जुना अंतःसुखाचां डोहीं । येकसरा तलु घेतला जिहीं ।
 मग थिरावौनि ते ही । ते चि जाले ॥ ४३ ॥
 अथवा आत्मप्रकाशें चोखें । जो आपणपां चि विश्व देखे ।
 तो देहें चि ब्रह्मसुखें । मानूं येइल ॥ ४४ ॥

लभंते ब्रह्म निर्वाणमृषयः क्षीणकल्मषाः ।

छिन्नद्वैधा यतात्मानः सर्वभूतहिते रताः ॥ २५ ॥

जें साचोकारें परम । नातःपर निःसीम ।

जिये गाविंचे निष्काम । अधिकारिये ॥ ४५ ॥

जें महर्षी वांटलें । विरक्तां भागा फीटलें ।

जें निःसंशयां पीकलें । निरंतर ॥ ४६ ॥

कामक्रोधवियुक्तानां यतीनां यतचेतसाम् ।

अभितो ब्रह्म निर्वाणं वर्तते विदितात्मनाम् ॥ २६ ॥

जिहिं विषयांपासांनि हीतलें । चित्त आपुलें आपण जीतलें

ते निश्चित जेथ सूतले । चेंति चि ना ॥ ४७ ॥

तें परब्रह्मनिर्वाण । जें आत्मविदांचें कारण ।

तें चि ते पुरुष जाण । पांडुकुमरा ॥ ४८ ॥

ते ऐसे कैसेन जाले । जें देहें चि ब्रह्मत्वा आले ।

हें हीं पूससि तारि भलें । संक्षेपें सांगों ॥ ४९ ॥

स्पर्शान्कृत्वा बहिर्बाह्यांश्चक्षुश्चैवांतरे भ्रुवोः ।

प्राणपानौ समौ कृत्वा नासाभ्यंतरचारिणौ ॥ २७ ॥

तारि बैराग्याचेम आधारे । तिहि विषय दबडूमि बाहिर ।
 शरीरी एकदरें । केलें मना ॥ १५० ॥
 साहाजें तिहि संधिसि भेटी । जेथ भूपल्लवां पडे गांठि ।
 तेथ पाठिमोरी दीठा । पाउखौनियां ॥ ५१ ॥
 सांड्ढनि दक्षिण वाम । प्राणापानसम ।
 चित्तेंसि व्योम । गामिये करिति ॥ ५२ ॥

यतेंद्रियमनोबुद्धिर्मुनिमोक्षपरायणः ।

विगतेच्छाभयक्रोधो यः सदा मुक्त एव सः ॥ २८ ॥

तेथ जैसीं रथ्योदकें सकलें । घेउनि गंगा समुद्रीं मिले ।
 मग एकैक वेगलें । काढूं नये ॥ ५३ ॥
 तैसी वासनांतरांची विवंचना । मग आपैसी पाउखे अर्जुना ।
 जेव्हालि गगनीं लो मना । पत्रनें कीजे ॥ ५४ ॥
 जेथ हें संसारचित्र उमटे । तो मनोरूप पट फाटे ।
 जैसा सरोवरु आटे । मग प्रतिभा नाही ॥ ५५ ॥
 तैसें मनपण मुदल जाये । मग अहंभावादिक कें आहे ।
 झणौनि शरीरें चि गगन होये । अनुभवी तो ॥ ५६ ॥
 आह्मि मागा मत सांघितलें । जें देहीं चि ब्रह्मत्व पातले ।
 ते एणें मार्गे आले । झणौनियां ॥ ५७ ॥
 यमनियमाचे डोंगर । अभ्यासांचे सागर ।
 क्रमूनि हें पार । पातले ते ॥ ५८ ॥
 तिहि आपणपें करुनि निर्लेप । प्रपंचा घेतलें माप ।
 मग साचाचें चि रूप । होउनि ठेले ॥ ५९ ॥
 ऐसा योगयुक्तिचा उद्देशु । जेथ बोलिला हृषीकेशु ।
 तेथ अर्जुनु मुडंसु । चमत्कारला ॥ १६० ॥
 तें देखिलेयां कृष्णें जाणितलें । मग हांसौनि पार्था ह्मणितलें ।
 हें काइ पां चित्त उवाडलें । इयें बोलीं तूजें ॥ ६१ ॥

तव अर्जुन ह्मणे दे० । परचित्तलक्षणाचा रा० ।
 भला जाणितला जी भा० । मानसु माझा ॥ ६२ ॥
 मियां जें विवरुनि काहीं पूसावें । तें आदिं च कलिलें देवें ।
 तारें बोलिलें तें चि सांघावें । विवळ करुनि ॥ ६३ ॥
 यन्हाविं तन्हें अवधारां । जो दाखविला तुझीं अनुसार ।
 तो पव्हणेयांहूनि पायेउतारा । सोहोपा जैसा ॥ ६४ ॥
 तैसा सांख्याहूनि पाहा प्रांजला । परि आह्मांसारिखेयां जी अभोलां ।
 एथ आधि काहिं प्रकाला । तो साहों ए वर ॥ ६५ ॥
 ह्मणौनि एकु वेल देवा । तो चि पडिताला घेयावा ।
 विस्तरैल तन्हें सांघावा । सायंतु चि ॥ ६६ ॥
 तव कृष्ण ह्मणति हो कां । तुज हा मार्गु गमला नीका ।
 तरि काइ जालें ऐकिजो कां । मुखें बोलों ॥ ६७ ॥
 अर्जुना तूं परियससी । परियसौनियां अनुष्ठिसि ।
 तरि आह्मासि वाणि काइसी । सांविं बांपां ॥ ६८ ॥
 आदिं चि चित्त मायेचें । वरि मीस जालें पढियंतेयाचें ।
 आतां तें अद्भुतपण स्नेहाचें । कवण जाणे ॥ ६९ ॥
 ते ह्मणो कारुण्यरसाची वृष्टि । किं नवेया स्नेहाची सृष्टी ।
 हें असो नेणजे दिठी । हरिची वानुं ॥ ७० ॥
 जे अमृताची जाणों ओतली । किं प्रेम चि पेउनि मातली ।
 ह्मणौनि कां अर्जुनमोहें गुंतली । निगों नेणे ॥ ७१ ॥
 हें बहू जें जें जल्पिजेल । तेणें कथेसी चि फांकु होईल ।
 परि तें स्नेहरूपा नै येइल । बोलवरि ॥ ७२ ॥

भोक्तारं यज्ञतपसां सर्वलोकमहेश्वरम् ।

सुहृदं सर्वभूतानां ज्ञात्वा मां शान्तिमुच्छति ॥ २९ ॥

ह्मणौनि विसुरा काइ येणें । तो ईश्वर कवलावा कोणें ।

जो आपुलें मान नेणे । आपण चि ॥ ७३ ॥

तन्ही मागिला ध्वनी आंतु । मज गमला साविया चि मोहितु ।
 जें बलात्कारें असे हणतु । पारयसें परिस ॥ ७४ ॥
 अर्जुना जेणें जेणें भेदें । तूझें कां चित्त बोधे ।
 तैसें तैसें विनोदें । निरूपिजेल ॥ ७५ ॥
 तो काइसेथा नावं योगु । तेयाचा कवण उपयोगु ।
 अथवा अधिकारप्रसंगु । कवणां एथ ॥ ७६ ॥
 ऐसें जें जें काहीं । उक्त असे इये ठाई ।
 ते आघवें चि पाहीं । सांघेन आतां ॥ ७७ ॥
 तूं चित्त देउनि अवधारी । ऐसें हणौनियां हरी ।
 बोलिजेल ते पुढारी । कथा आहे ॥ ७८ ॥

ॐ तत्सदिति श्रीमद्भगवद्गीतासूपनिषत्सु ब्रह्मविद्यायां
 योगशास्त्रे श्रीकृष्णार्जुनसंवादे संन्यासयोगो नाम
 पंचमोऽध्यायः ॥

॥ श्रीकृष्णार्पणमस्तु ॥



ज्ञानेश्वरी

अध्याय साहावा

श्रीगणेशायनमः

रायातें ह्मणे संजयो । तो चि अभिप्रा३ अवधारिजो ।
कृष्णु सांघति आतां जो । योगरूपु ॥ १ ॥
साहाजें ब्रह्मरसाचें परगुणें । केलें अर्जुनालागि नारायणें ।
किं तिया चि अवसरीं पाहुणे । पातलों आहीं ॥ २ ॥
कैसी दैवाची थोरी नेणिजे । जैसैं तान्हैलेयां तोय सेविजे ।
किं तें चिये विकरुनु पाहिजे । तव अमृत आहे ॥ ३ ॥
तैसैं आह्मांतुह्मां जालें । जें आठमुठी तत्व फावलें ।
तव धृतराष्ट्रें ह्मणितलें । हें न पुसों तूतें ॥ ४ ॥
तेया संजया येणें बोलें । रायाचें हृदय चोजवलें ।
जें अवसरीं आहे घेतलें । कुमारांचिया ॥ ५ ॥
हें जाणौनि मनीं हांसिला । ह्मणे ह्यातारा मोहें नासिला ।
यन्हविं बोलु तारि भला जाला । अवसरिचा ॥ ६ ॥
परि तें तैसैं कैसेन होईल । जाल्यंथा कैचें पाहील ।
तेवि च एरु सें घेईल । ह्मणौनि भिए ॥ ७ ॥
परि आपण चित्तिं आपुलां । निकिया परीं संतोषला ।
जें तो संवाद्दु कां फावला । कृष्णार्जुनचा ॥ ८ ॥

तेणें आनंदाचेनि धालेपणें । साभिप्रायें अंतष्करणें ।
 आतां आदरेंसीं बोलणें । घडेल तेया ॥ ९ ॥
 तो गीतेमाजि षष्टिचा । प्रसंगु असे आणिचा ।
 जैसा क्षीरार्णविं अमृताचा । निवाडु जाला ॥ १० ॥
 तैसें गीतार्थाचें सार । जें विवेकसिंधुचें पार ।
 नाना योगविभवभांडार । उघडलें कां ॥ ११ ॥
 जें आदिप्रकृतिकें विसंवणें । जें शब्दब्रह्मासि न बोलणें ।
 जेथौनि गीतावलिचें ठाणें । प्ररोहो पावे ॥ १२ ॥
 तो अध्या३ हा साहावा । वरि साहित्याचिया बरवा ।
 सांघिजेल ह्मणौनि परियसावा । चित्त देउनि ॥ १३ ॥
 माझा मन्हाटा चि बांलु कवतिकें । परि अमृतातें हीं पैजेंसीं जीके ।
 ऐसीं अक्षरें चि रसिकें । मेलवीन ॥ १४ ॥
 जिये कोवळिकेचेनि पाडे । दीसति नादिचे तरंग थोकडे ।
 वेधें परिमळाचें ब्रीक मोडे । जेयाचेनि ॥ १५ ॥
 आइकां रसालपणाचेया लोभा । किं श्रवणिं चि होथि जीभा ।
 बोलें इंद्रियां लागे कलभा । येकमेकां ॥ १६ ॥
 साहाजें शब्दु तरि विषो श्रवणाचा ।
 पारि रसना ह्मणे कां रसु चि हा आमचा ।
 घ्राणासि भावो जाये परिमळाचा ।
 हा तो चि कां होईल ॥ १७ ॥
 नवल बोलतिये रेखेची वाहाणी । दावितां डोलेयां हीं पुरों लागे आणि ।
 ते ह्मणति उघडिलीं कां खाणि । रूपांची हे ॥ १८ ॥
 जेथ संपूर्ण पद उभारे । तेथ मन चि धांवे बाहिरें ।
 बोलुभुजांहीं आशे भरे । आलिंगावेया ॥ १९ ॥
 ऐसां इंद्रियें आपुलां भाविं । झोंबतां पारि तो सारिसेपणें चि बुझावी ।
 जैसा एकला जग चेंववी । सहस्रकर ॥ २० ॥

तैसें शब्दाच व्यापकपण । देखिजे असाधारण ।
 पाठेयां भावज्ञां फावति गुण । चिंतामणिचे ॥ २१ ॥
 हें असो सेयां बोलाचीं तांटे भलीं । वरि केवळ्यरसें आगरला ।
 हे प्रतिपत्ति मियां केली । निष्कामासि ॥ २२ ॥
 आतां आत्मप्रभा नीचनवी । ते चि करुनि ठाणा दिवी ।
 जो इंद्रियांते चोरुनु जेवी । तेयासी च फावे ॥ २३ ॥
 एथ श्रवणाचेनि पांगें । विण श्रोतेयां होआवें लागे ।
 हें मनाचेनी चि आंगें । भोगिजे गा ॥ २४ ॥
 आहाच बोलाची वालीप फेडिजे । आणि ब्रह्माचेया चि आंगा घडिजे ।
 मग सुखेंसीं सुरवाडिजे । तेयामाझि ॥ २५ ॥
 ऐसें हलवारपण जरि येईल । तरि चि हें उपेगा जाइल ।
 यन्हविं आधवी गोठि होईल । मूकां बोलतेयाची ॥ २६ ॥
 परि तें असो आतां आघवें । न लगे श्रोतेयां कडसावें ।
 जें एथ अधिकारिये स्वभावें । पूर्णकाम ॥ २७ ॥
 जेहीं आत्मबोधाचिया आवडी । केली स्वर्गसंसाराची कुरवंडी ।
 ते वांचौनु एथिची गोडी । नेणति आणिक ॥ २८ ॥
 जैसा वायसी चंद्र नोलखिजे । तैसा प्राकृतीं ग्रंथु हा नेणिजे ।
 आणि तो हिमांशु जेविं खार्जे । चकोरांचें ॥ २९ ॥
 तैसा सज्ञानांसि तरि हा ठाऊ । आणि अज्ञानांसि आन गाऊ ।
 ह्मणौनि बोलावेया विषो पाहा हो । विशेषे नाहिं ॥ ३० ॥
 परि अनुवादलों मी प्रसंगें । तें सज्जनीं उपसाहावें लागे ।
 आतां सांचैन काइ श्रीरंगें । निरूपिलें जें ॥ ३१ ॥
 तें बुद्धी हीं कबलितां सांकडें । ह्मणौनि बोलीं विपायीं सांपडे ।
 परि निवृत्तिकृपाउजियेडें । देखैन मी ॥ ३२ ॥
 जें दिठी हीं न पविजे । तें दिठीविण देखिजे ।
 जन्हें अतींद्रिय लाहिजे । ज्ञानबलें ॥ ३३ ॥

ना तरि जें धातुवादिया हीं न जोडे । तें लोहीं चि पन्हरे सांपडे ।
 जरि दैवयोगें चडे । परिसु हाता ॥ ३४ ॥
 तैसी सद्गुरुकृपा होए । तरि करितां काइ आपु नोहे ।
 ह्मणौनि अपार मातें आहे । ज्ञानदेउ ह्मणे ॥ ३५ ॥
 तेणें कारणें मीं बोलैल । बोली अरूपाचें रूप दावीन ।
 अतींद्रिय परि भोगवीन । इंद्रियांकरवि ॥ ३६ ॥

श्रीभगवानुक्त्वच ॥

अनाश्रितः कर्मफलं कार्यं कर्म करोति यः ॥

स संन्यासी च योगी च न निरग्निर्य चाक्रियः ॥ १ ॥

आइकां यशश्रीऔदार्य । ज्ञानवैराग्यऐश्वर्य ।
 हे साही गुणवर्य । वसति जेथ ॥ ३७ ॥
 तेथ तो भगवंतु । जो निःसंगाचा सांगातु ।
 ह्मणे पार्था दत्तचित्तु । होई आतां ॥ ३८ ॥
 आइकें योगी आणि संन्यासी जनीं । हे एक चि सिनाने झनै मानीं ।
 यन्हविं विचारिजति जवं दोन्हीं । तवं एकु चि ते ॥ ३९ ॥
 सांडिजे दुजेया नामाचा आभासु । तारि योगु तो चि संन्यासु ।
 पांतां ब्रह्मी नाहिं अवकाशु । दोहीमाझि ॥ ४० ॥
 जैसैं नावांचेनि अनारिसेपणें । एका पुरुषातें आलवणें ।
 कां दोहीं मार्गी जाणें । एका चि ठाया ॥ ४१ ॥
 ना तरि एक चि उदक साहाजें । पारि सिनानां घटीं भरिजे ।
 तैसैं भिन्नत्व हें जाणिजे । योगसंन्यासांचें ॥ ४२ ॥
 आइकें सकलसंमते जगिं । पाहे तो चि योगी ।
 जो कमें करौनि रागी । नव्हे चि फलिं ॥ ४३ ॥
 जैसी मही हे उद्विजें । जनी अहंबुद्धिविण साहाजें ।
 तेथिचीं तियें बीजें । अपेक्षी ना ॥ ४४ ॥

तस आम्नायाचेनि आधारे । जातीचेनि अनुकरे ।
 जे जें अवसरें । करणें पावे ॥ ४५ ॥
 तें तैसें चि उचित करी । परि साटोप नाहिं शरीरी ।
 बुद्धि हीं करौनु फलवेन्ही । जाये चि ना ॥ ४६ ॥
 ऐसा तो चि गा संन्यासी । पार्था परियसि ।
 तो चि भरवसेंसी । योगीश्वर ॥ ४७ ॥
 बांचूनि उचित कर्म प्रासंगिक । तेयातें ह्मणे हें सांडीन बद्दक ।
 तरि टाकटाकीं आणिक एक । मांडी चि तो ॥ ४८ ॥
 जैसा झालौनियां लेपु एकु । सर्वे चि लाविजे आणिकु ।
 तैसा आग्रहाचा पाइकु । विचवे वायां ॥ ४९ ॥
 गृहस्थाश्रमाचें ओझें । कपालीं आदिं चि आहे साहाजें ।
 किं तें चि संन्यासु सवा टेविजे । सरिसें पुढुती ॥ ५० ॥
 ह्मणौनि अग्निसेवा न संडितां । कर्मरेखा नोलंडिता ।
 आधि योगमुख स्वभावता । आपणपां चि ॥ ५१ ॥
 आइकें संन्यासी तो चि योगी । ऐसी एकवाक्यतेची जर्गि ।
 गुढी उभिली अनेकीं । शास्त्रांतरीं ॥ ५२ ॥
 यं संन्यासमिति प्राहुर्योगं तं विद्धि पांडव ॥
 न ह्यसंन्यस्तसंकल्पो योगी भवति कश्चन ॥ २ ॥
 आरुरुक्षोर्मुनेर्योगं कर्म कारणमुच्यते ।
 योगारूढस्य तस्यैव शमः कारणमुच्यते ॥ ३ ॥
 जेथ संन्यासैला संकल्पु तूटे । तेथ चि योगाचें सर्वस्व भेटे ।
 ऐसें हें अनुभवाचेनि धटे । साच तेया ॥ ५३ ॥
 आतां योगाचलाचा निमथा । जरि टाकावा आधि पार्था ।
 तरि सोपाना या कर्मपंथा । चूकसि झनें ॥ ५४ ॥
 एणें यमनियमाचेनि तलवटें । रिगैं आसनाचिये पाउलवाटे ।
 एइ प्राणायामाचेनि आडकठें । वरौता गा ॥ ५५ ॥

मग प्रत्याहाराचा आधाडा । जो बुद्धिचेयां हीं पात्रां विसरळा ।

जेथ हटिये सांडित होडा । कडेलग ॥ ५६ ॥

तन्हि अभ्यासाचेनि वलें । तिये प्रत्याहारीं निराले ।

नाखि लागेल घेई डालें । वैराग्याचीं ॥ ५७ ॥

ऐसा पवनाचेनि पाठारें । एतां धारणेचें पैयारें ।

क्रमिध्या नावं चवरे । सांडे तवं ॥ ५८ ॥

मग तेया मार्गाची धावं । पुरैल प्रवृत्तिची हावं ।

जेथ साध्यसाधना खेवं । समरसें होइल ॥ ५९ ॥

जेथ पुढैल पैसु पारुखे । मागील स्मरावें तें ठाके ।

ऐसिये सारिसिये भूमिके । समाधि राहे ॥ ६० ॥

येणें उपायें योगारूढ । जो निरवधी जाला प्रौढ ।

तेयाचेया चिन्हामाजि निवाडु । तें सांघेन आइक ॥ ६१ ॥

यदा हि नांद्रियार्थेषु न कर्मस्वनुषजते ॥

सर्वसंकल्पसंन्यासी योगारूढस्तदोच्यते ॥ ४ ॥

तारि जेयाचेया इंद्रियांचेया घरा । नाहिं विषयांचिया एरझारा ।

जो आत्मबोधाचेया उभरां । पवढला असे ॥ ६२ ॥

जेयाचें सुखदुःखाचेनि आंगें । झगटलें मानस चेउ नेचे ।

विखो पासीं हीं आलेयां आशे न रिगे । हें काइ झणौनि ॥ ६३ ॥

इंद्रियें कर्माचां च ठांई । वाढिनलीं पारि कहीं ।

फलहेतुची राल नाही । अंतष्करणीं ॥ ६४ ॥

असतेनि देहें येतुला । जो चेंतू चि देखसी निदेला ।

तो चि योगारूढ भला । बोलख तूं ॥ ६५ ॥

तेथ अर्जुनु झणे अनंता । हें मज विस्मो बहू आइकतां ।

सांघें तेया ऐसी योग्यता । कवणें दीजे ॥ ६६ ॥

उद्धरेदात्मनात्मानं नात्मानमवसादयेत् ।

आत्मैव ह्यात्मनो बंधुरात्मैव रिपुरात्मनः ॥ ५ ॥

ज्ञानहीन हणु हणु । तूझें नवल ना हें बोलणें ।
 कवणासि काइ दीजेल कवणें । एथ अद्वैतीं इये ॥ ६७ ॥
 पै व्यामोहाचिये सेजे । बलियां अविद्या निद्रितां रिगिजे ।
 तेव्हलि हा दुःस्वप्न भोगिजे । जन्ममृत्युचा ॥ ६८ ॥
 पाठिं अवसांत ये चेउ ॥ तैं ते आघवें चि होये बावो ।
 ऐसा उपजे नित्य सद्भावो । तो ही आपणपां चि ॥ ६९ ॥
 हणौनि आपण चि आपणपेया । धातु कीजतसे धनंजया ।
 चित्त देउनि येया नाथिलेया । देहाभिमाना ॥ ७० ॥

बंधुरात्मात्मनस्तस्य येनात्मैवात्मना जितः ॥

अनात्मनस्तु शत्रुत्वे वर्तेतात्मैव शत्रुवत् ॥ ६ ॥

हा विचारुनि सांडिजे । मग अनती चि वस्तु होइजे ।
 तारि आपुलीं शास्तिं साहाजें । आपण केली ॥ ७१ ॥
 यन्हविं कोसेकीटकिण्चिया परीं । तो आपणपेया आपण बैरी ।
 जो आत्मबुद्धि शरीरीं । चारुस्थला ॥ ७२ ॥
 कैसा प्राप्तिचिये वेले । निद्वैवां आंधलेपणाचे डोंले ।
 किं असते आपुले डोंले । आपण बांधे ॥ ७३ ॥
 कां कव्हणीं येकु भ्रमलेपणें । मी तो नोहें गा चोरलां हणु ।
 ऐसा नाथिला संतु अंतष्करणें । घेउनि ठाके ॥ ७४ ॥
 यन्हविं होय तें चि तो आहे । पारि काइ कीजे बुद्धि तैसी नोहे ।
 देखां स्वप्निचेनि घायें । किं मरे साचे ॥ ७५ ॥
 जैसी लेया शुकाचेनि आंगभारें । नलिका भविनली एरी मोहरे ।
 तारि तेषें बुडावें कां पारि न पुरे । मनाशंके ॥ ७६ ॥
 वाखां चि मान पीली । आठूंइ हियें आवली ।
 दिष्टियांतु नली । धरुनि ठाके ॥ ७७ ॥
 हणु बांधला मी फुडा । ऐसिये भावनेचिये पडे खोडां ।
 किं सोकलेयां पायांचा चवडा । गुंफा अधिकें ॥ ७८ ॥

योगी युञ्जीत सततमात्मानं रहसि स्थितः ॥

एकाकी यतचित्तात्मा निराशीरपरिग्रहः ॥ १० ॥

जेयाचें नावं गा तीर्थरा३० । दर्शनें प्राप्तिचा चि ठा३० ।
जेयाचेनि संगें ब्रह्मभा३० । भ्रांतांसी गा ॥ २ ॥
जेयाचेनि बोले धर्मु जिण । दीटि महासिद्धितें विये ।
देखें स्वर्गमुखादि इणें । खेळु जेयाचा ॥ ३ ॥
विपायें जरि आठवला चित्ता । तरि दे आपुली योग्यता ।
हें असो तेहातें प्रसंसितां । लाभु आथि ॥ ४ ॥
पुढुतीं अस्तवेना ऐसें । जेया पाहलें अद्वैतादिवसें ।
मग आपणपां चि आपण असे । अखंडीत ॥ ५ ॥
ऐसिया द्विष्टि जो विवेकी । पार्था तो एकाकी ।
साहाजें अपरिग्रही जें तिहिं लोकीं । तो चि क्षणौनि ॥ ६ ॥
ऐसिं इयें असाधारणें । निष्पन्नाचीं लक्षणें ।
आपुलेन बौहसपणें । बोले कृष्ण ॥ ७ ॥
जो ज्ञानियांचा बापु । देखणेयांचिये दीठी दीपु ।
जेया दादुलेयाचा संकल्प । विश्व रची ॥ ८ ॥
प्रणवाचिये पेंठे । जालें शब्दब्रह्म मांजिठें ।
तें जेयाचेया यशा धाकुटें । वेद न पुरे ॥ ९ ॥
जेहाचेनि अंगिकें तेजें । आ३० रविशशिचिये वणिजे ।
क्षणौनि जग हें वेसजें । पोसे तेयां ॥ ११० ॥
हां गा नावं चि येक जेहाचें । पातां गगन हीं दीसे दीचें ।
गुण थैकैक काइ तेहाचे । कलिसील तूं ॥ ११ ॥
क्षणौनि असो हें वानणें । सांघें नेणों कवणाचीं लक्षणें ।
दावावीं मीसें एणें । बोलिलां तों ॥ १२ ॥
आइकां द्वैताचा ठा३० चि फेडी । ते ब्रह्मविद्या कीजेल उघडी ।
तरि अर्जुनु पढिये हे गोडी । नासैल हान ॥ १३ ॥

ह्यणौनि तें तैसें बोलणें । नव्हे सततल आड लावणें ।
 केले मेल चि वेगलेपणें । भोगावेया ॥ १४ ॥
 जै अहंभाओ हा ढंकु । मोक्षसुखा लागौनि रंकु ।
 तेयाचिये दीठिचा झनें कलंकु । लागे प्रेमा ॥ १५ ॥
 विपायें अहंभाओ येयाचा जाइल । मि तें चि जरि हा होईल ।
 तरि काइ कीजेल । एकलेयां ॥ १६ ॥
 दीठी चि पाहातां निविजे । कां तोंड भरुन बोलिजे ।
 दाटून खेवं देइजे । ऐसें कवण आहे ॥ १७ ॥
 आपुलेया मना बरवी । जे असमाई गोठि जीवीं ।
 ते कवणोंसिं मग चावलावी । जरि ऐक्य जालें ॥ १८ ॥
 इया काकुलती जनार्दन । अन्योपदेशाचेनि हातासनें ।
 बोळामाझिं मन मनें । आळिगुं सरलें ॥ १९ ॥
 हें परिसतां जरि कानडें । तरि जाण पां पार्थु उघडें ।
 श्रीकृष्णसूत्राचें चि रूपडें । ओतलें आहे ॥ २० ॥
 हें असो वयसेचिये सेवटीं । जैसें येक चि विये वांझौटी ।
 मग ते मोहाची तुगुटी । नाचों लागे ॥ २१ ॥
 तैसें जालें अनंता । ऐसें तरि मीं न हणतां ।
 जरि तेथ न देखतां । अतिशयो एथ ॥ २२ ॥
 पाहा पां नवल कैसें चोज । कें उपदेशु कें जूझ ।
 पारि पुढें बालभाचें चि भोज । नाचतसे ॥ २३ ॥
 आवडि ह्यणौनि न लजवी । व्यसन जैसें न सीणवी ।
 पीसैं आणि न भुलवी । तरि तें चि काइसैं ॥ २४ ॥
 ह्यणौनि भावार्थु हा ऐसा । अर्जुनु मैत्रिचा कुवांसा ।
 किं सुखें शृंगारलेया मानसा । दर्पणु तो ॥ २५ ॥
 बापु पुण्य पवित्र । जगीं भक्तिबीजासि क्षेत्र ।
 तो कृष्णकृपे पात्र । एया चि लागि ॥ २६ ॥

हो काज आत्मनिवेदनातलिची । जे पीठिका आहे सख्याची ।
 पार्थु अधिष्ठात्री तेथिची । मातृका गा ॥ २७ ॥
 पासिं चि गोसांविं वर न वनिजे । मग पाइकाचा गुण बेइजे ।
 ऐसा अर्जुनु तो साहाजें । पढिए हरी ॥ २८ ॥
 पाहे पां अनुरागें भजे । जे प्रियोत्तमें मानिजे ।
 ते पती ही हुनु काइ न वनिजें । पतिव्रता ॥ २९ ॥
 तैसा अर्जुनु विशेषें स्तवाचा । ऐसें आवडलें मज जीवा ।
 जे तो त्रिभुवनीचेया देवां । आयतन जाला ॥ १३० ॥
 जेयाचिये आवडीचें पांगें । अमुर्तु ही मूर्ति आवंगे ।
 पूर्णी परि लागे । अवस्था जेयाची ॥ ३१ ॥
 तयं श्रोते ह्यणति देवं । कैसी बोलाची हवाव ।
 काइ नादातें हान वारिवं । जीणौनि आले ॥ ३२ ॥
 हां हो नवल नोहे देशी । मन्हाटी बोलिजे तरि ऐसी ।
 वाणें उमटत आहे मा आकाशीं । साहिल्या रंगाचें ॥ ३३ ॥
 कैसें उन्मेषाचांदिणें तार । आणि भावार्थी पडतसे गार ।
 हें चि श्लोकार्थ कुमुदिं तरि फार । सेवितां होतें ॥ ३४ ॥
 चाड चि निचाडां करी । ऐसी मनोरथीं इण थोरी ।
 तेणें विवळलें जेथ आंतरीं । तेथ डोलु आला ॥ ३५ ॥
 तें निवृत्तिदासें जाणीतलें । मग अवधान देआं ह्याणितलें ।
 नवल पांडवकुलीं पाहलें । कृष्णादिवसें ॥ ३६ ॥
 देवकिया उदरीं बाहिला । यशोदा सायासें पाहिला ।
 किं शेषीं आइता उपेगा गेला । पांडवांसी ॥ ३७ ॥
 ह्यणौनि बहुत दीवसु ओलगावा । कां अवसर पाहोनि विनवावा ।
 हा ही सोमु तेया सदैवां । पडे चि ना ॥ ३८ ॥
 हें असोनु कथा सांविं वेगीं । मग अर्जुनु ह्याने सलगी ।
 देवा ह्ये संतचिन्हें हान आंगीं । न ठांति माझां ॥ ३९ ॥

यन्हविं यथा लक्षणाचेया सारा । मी अपाडें किर अपुरा ।
 परि तुमचेनि बोलें अवधारां । थोरावें जरि ॥ १४० ॥
 जी तुह्मीं चित्त देआल । तरि ब्रह्म माझें होइल ।
 काइ जाले अभ्यासिजैल । सांघाल तें ॥ १४१ ॥
 हां हो नेणों कोणाची काहाणी । श्लाघिजत असे अंतष्करणीं ।
 ऐसी जालेपणाची स्त्रियाणी । काइसी तन्हें ॥ १४२ ॥
 तें आंगें चि मियां होइजो कां । एतुलें गोसांविपणें आपुलें कीजो कां ।
 तवं हांसौनि कृष्णु हो कां । करूं ह्मणथी ॥ १४३ ॥
 देखां संतोखु एकु न जोडे । तवं सुखाचें सैघ सांकडें ।
 मग जोडलेयां काहीं कवणीकडें । अपुरें असे ॥ १४४ ॥
 तैसा सर्वेश्वरु चि बलिया सोंके । ह्मणौनि ब्रह्म होये कवतुकें ।
 परि कैसा भारें आतला पां पीके । दैवांचेनि ॥ १४५ ॥
 जो जन्मसहस्रांचिया साटीं । इंद्रादिकां महागु भेटी ।
 तो आधीनु कैतुला किरीटी । जें बोलु ही न साहे ॥ १४६ ॥
 मग आइकां जें पांडवें । ह्मणितलें ब्रह्म मियां चि होआवें ।
 तें अशेष ही देवें । निर्झरिलें ॥ १४७ ॥
 तेथ ऐसें चि एक विचारिलें । जें यथा ब्रह्मत्वाचे डोहोले ।
 परि उदरा वैराग्य आहे आलें । बुद्धिचेया ॥ १४८ ॥
 यन्हविं दिवस तरी येया अपुरे । परि तें वैराग्यवसंताचेनि भारें ।
 जें सोहंभावमहुरें । मोडौनि आलें ॥ १४९ ॥
 ह्मणौनि प्राप्तिफलीं फलतां । एयासि वेलु न लगैल आतां ।
 होये विरगतु ऐसा अनंता । भरवसा जाला ॥ १५० ॥
 ह्मणे जें जें हा अधिष्ठील । तें आतां आरंभीं चि एआ फावैल ।
 ह्मणौनि सांघितला न वचैल । अभ्यासु वायां ॥ १५१ ॥
 ऐसें विवरौनियां श्रीहरी । ह्मणितलें तेया अवस्वरीं ।
 अर्जुना हा अवधारीं । पंथराजु ॥ १५२ ॥

जेथ ब्रह्मसितल्लाचा बुडि । दीसती भिवृत्तिफळाकिचा कोडी ।
 जिये मार्गिचा कापडी । महेशु आबुई ॥ ५३ ॥
 पै योगिबुंदें वहिर्ली । आड चि आकाशें निगाली ।
 किं तेथ अनुभवाचा पाउली । धोरणु पडिला ॥ ५४ ॥
 ते हीं आत्मबोधाचेनि उजुकारें । धांव घेतली एकसरें ।
 एर सकल मार्ग निदुसुरे । सांडूनियां ॥ ५५ ॥
 पाठि महर्षी एणें आले । साधकांचे सिद्ध जाले ।
 आत्मविद धोरावले । एणें चि पंथें ॥ ५६ ॥
 हा मार्गु जें देखिजे । तें ताहन भूक विसरिजे ।
 रात्रि दिवसु नेणिजे । वाटे इये ॥ ५७ ॥
 चालतां पाउल जेथ पडे । तेथ अपवर्गाची खाणि उघडे ।
 अन्हांटलेयां जोडे । स्वर्गसुख ॥ ५८ ॥
 निमिजे पूर्विली मोहोरा । किं येइजे पश्चिमाचेया घरा ।
 निश्चलपण धनुर्दरा । चालणें एथिचें ॥ ५९ ॥
 एणें मार्गे जेया जाइजे । तो गाऊं आपण होइजे ।
 हें साधों काइ साहाजें । जाणसी तू ॥ ६० ॥
 तेथ पार्थें ह्मणितले देवा । तरि तें चि मग केन्हां ।
 कां आर्तिसमुद्रौनि न कढावा । बुडुतु जी मी ॥ ६१ ॥

शुचौ देशे प्रतिष्ठाप्य स्थिरमासनमात्मनः ॥

नात्युच्छ्रितं नातिनीचं चैलाजिनकुशोत्तरम् ॥ ११ ॥

तवं कृष्णु ह्मणति ऐसें । उत्सुक बोलणें काइसें ।
 आर्क्षि सांघत असों आपैसें । वरि पूसिलें तुवां ॥ ६२ ॥
 तरि विशेषें आतां चि बोलिजेल । परि तें अनुभवं उपेग जाइल ।
 ह्मणौनि तैसें एक लगेल । स्थान पाहावें ॥ ६३ ॥
 जेथ आराणुकेचेनि कोडें । बैठलेयां उठूं नावडे ।
 वैराग्यासि दूण चडे । देखिलेयां जें ॥ ६४ ॥

जो बसविला ठाऊ ॥ संतोपासि सान्हाऊ ॥
 मना होये सान्हाऊ ॥ धैर्याचा ॥ ६५ ॥
 अभ्यासू चि आपणेयांतें करी । हृदयातें अनुभउ चि विवरी ।
 ऐसी रम्यपणाची थोरी । अखंड जेथें ॥ ६६ ॥
 जेया आड जातां पार्था । तपश्चर्येचेयां मनोरथां ।
 पाखांडियाची हां आस्था । मूल होये ॥ ६७ ॥
 सभावें वाटा येतां । जरि वरिपडा जाला अवचिता ।
 तरि सकामु हीं परि माघौता । निगों विसरे ॥ ६८ ॥
 ऐसें न न्हातेआतें राहावी । भ्रमातुकातें बैसवी ।
 थापटूनि चेववी । विरगतिते ॥ ६९ ॥
 हें राज्य वर सांडिजे । मग निवातां एथ चि असिजे ।
 ऐसें श्रिंगारिआंहीं उपजे । देखत खेऊ ॥ १७० ॥
 जें एणें मानें वरवंट । तैसें चि अति चोखट ।
 जेथ अधिष्ठान प्रकट । डोलां दीसे ॥ ७१ ॥
 आणिक येक पावें । जें साधकिं वसतें होआवें ।
 आणि जनाचेनि पाएरे । मैले चि ना ॥ ७२ ॥
 जेथ अमृताचेनि पाडें । मुलां हीं सकट गोडें ।
 जोडति दाटें झाडें । सदा फलति ॥ ७३ ॥
 पाउलां पाउलां उदकें । परि वरिषाकालि हिं चोखें ।
 निक्षेरे कां अशेषें । मुलभें जेथ ॥ ७४ ॥
 हो अतपु ही आलुमालु । जाणिजे तन्हीं सीतलु ।
 पवनु अति निर्बलु । मंदु झुलका ॥ ७५ ॥
 बहुतकरुनि निःशब्द । दाट न रिगे स्वापद ।
 शुक्र हान षट्पद । तेयांचे नाही ॥ ७६ ॥
 पाणिलगें हंसें । दोनि च्यारि सारसें ।
 कन्हायी एकीं वेलीं बैसे । तरि कोकिलु ही होए ॥ ७७ ॥

निरंतर नाही । तन्हीं आलां गेलां कहीं ।
 होतु कां मयूरे हीं । तें आम्हीं न म्हणों ॥ ७८ ॥
 पारि आवसिक पांडवा । ऐसा ठाओ जोडावा ।
 तेथ निर्गुडु मठु होआवा । कां शिवालय ॥ ७९ ॥
 दोहोंमाजि आवडतें । जें मानलें होये चित्तें ।
 बहुतकरुनि एकांतें । बैसिजे गा ॥ १८० ॥
 झणौनि तैसें तें जाणावें । मन राहातें पावें ।
 राहील तेथ रचावें । आसन हें ॥ ८१ ॥
 वारि चोखट मृगसेवडी । माक्षि वस्त्राची घडी ।
 तलवटीं अमोडी । कुशांकुर ॥ ८२ ॥
 सकौमल सरिसे । सुबद्ध राहाति आपसे ।
 एके पाडें तैसें । ओजा घाली ॥ ८३ ॥
 पारि सांग्हिआं चि उंच होईल । तरि आंग हान डोलैल ।
 नीचा तरि पावैल । भूमिदोखु ॥ ८४ ॥
 म्हणौनि तैसें न करावें । सामधेनिआ एं धरावें ।
 हें बहू असो होआवें । आसन ऐसें ॥ ८५ ॥

तत्रैकाग्रं मनःकृत्वा यतचित्तैन्द्रियक्रियः ॥

उपविश्यासने युञ्ज्याद्योगमात्मवेगुदये ॥ १२ ॥

मग तेथ आपण । एकाग्र अंतःकरण ।
 करुनि गुरुस्मरण । अनुभविजे ॥ ८६ ॥
 जैसेनि स्मरतेनि आदरें । सबाह्य सात्विकें भरे ।
 जवं कठिनपण कां विरे । अहंभावाचें ॥ ८७ ॥
 विषयांचा विसरू पडे । इंद्रियांची कसमस मोडे ।
 मनाची घडी घडे । हृदयामाक्षि ॥ ८८ ॥
 ऐसें ऐक्य हें साहाजें । फावे तव राहिजे ।
 मग तेणेंचि बोधें बैसिजे । आसनावारि ॥ ८९ ॥

आतां आंगातें आंग करी । पवनातें पवनु चि धरी ।
 ऐसी अनुभवाची उजिरी । हों चि लागे ॥ १९० ॥
 प्रवृत्ति मागौति मोहरे । समाधि ऐलाडि उत्तरे ।
 आधर्वे अभ्यासु सरे । बैसत खेवो ॥ ९१ ॥

समं कायशिरोग्रीवं धारयन्नचलं स्थिरम् ॥

संप्रेक्ष्य नासिकाग्रं स्वं दिशश्चानवलोकयन् ॥ १३ ॥

मुद्रेची प्रौढि ऐसी । ते चि सांघिजेल आतां परिहसैं ।
 तरि ऊरू इया जघनेंसी । जडूनि घाली ॥ ९२ ॥
 चरणतलें देव्हडीं । आधारद्रुमाचां बुडीं ।
 सुघटितें गाढीं । संचरि पां ॥ ९३ ॥
 सव्य तें तलीं ठेविजे । तेणें सीवणिमध्यु पीडिजे ।
 बरि बैसे तो साहाजें । वामचरण ॥ ९४ ॥
 गुदमेंदू आंतौतीं । च्यारि चि आंगुलें निरुतीं ।
 तेथ सार्द्ध सार्द्ध प्रांतीं । सांडूनियां ॥ ९५ ॥
 माक्षि अंगुल एक नीगे । तेथ टांकेचेन उत्तरभागें ।
 निहटिजे वरि आंगें । पेललेनि ॥ ९६ ॥
 उचललें कां नेणिजे । तैसें पृष्ठांत उचलिजे ।
 गुल्फद्वय धरिजे । तेणें चि मानें ॥ ९७ ॥
 मग शरीरुसंचु पार्था । हा अशेषु ही सर्वथा ।
 पांष्णिचा माथां । स्वयंभु होये ॥ ९८ ॥
 अर्जुना हें जाण । मूलबंधाचें लक्षण ।
 वज्रासन गौण । नाम एयासि ॥ ९९ ॥
 ऐसी आधारीं मुद्रा पडे । आणि अधिचा मार्गु मोडे ।
 तेथ अपानु आंतुलीकडे । उहटों लागे ॥ २०० ॥
 तव करपुट आपैसैं । वाम चरणीं बैसे ।
 बाहुमूलीं दीसैं । थोरी आली ॥ १ ॥

माक्षि उभारलेनि दंडें । शिरकमल होये गाढें ।
 नेत्रद्वारिचीं कवाडें । लागों पांति ॥ २ ॥
 वरिचिलें पांति न ढलति । तलिचिं तलिं पुंजालति ।
 ते अर्द्धोन्मीलनस्थिति । उपजे तेयां ॥ ३ ॥
 दीठि राहुनु आंतुलीकडे । बाहिरे पाउल घाली कोडें ।
 तें ठायें ठाऊं पडे । नासाग्रपीठीं ॥ ४ ॥
 ऐसें अढंचें आंतु चि रचे । बाहिरील माघौते न वचे ।
 ह्मणौनि राहाणें आधि ए दीठिचें । तेथ चि होये ॥ ५ ॥
 आतां दिशांची भेटि घेयावी । कां रुपाची वाट पाहावी ।
 हे चाड सरे आघवी । आपैसेया ॥ ६ ॥
 मग कंठनाल आटे । हणौटी हडौती दाटे ।
 ते गाढी होउनि निहटे । वक्षस्थलीं ॥ ७ ॥
 माक्षि घंटिका लोपे । वरि बंधु जो आरोपे ।
 तो जालांधरु ह्मणिपे । पांडुकुमरा ॥ ८ ॥
 नाभी वरि पोखे । उदर हें थोंके ।
 आंतरीं फांके । हृदयकोश ॥ ९ ॥
 स्वाधिष्ठानावरिली कांठी । नाभिस्थानातलवटीं ।
 बंधु पडे किरीटी । उडियाणु तो ॥ २१० ॥

प्रशांतारमा विगतभीर्ब्रह्मचारिव्रते स्थितः ॥

मनः संयम्य मच्चित्तो युक्त आसीत मत्परः ॥ ११ ॥

ऐसी शरीराबाहिरिलीकडे । अभ्यासाची पाखर पडे ।
 तबं आंतु त्राये मोडे । मनोधर्माची ॥ ११ ॥
 कल्पना निमे । प्रवृत्ति समे ।
 आंगें मन विरमे । साविह्मां चि ॥ १२ ॥
 क्षुधा काइ जाली । निद्रा केउती गेली ।
 हे आठवण हीं हीरतली । न दिसे वेगां ॥ १३ ॥

जो मूलबंधे अडल्य । अपानु मावौता मुरडला ।
 तो सर्वे चि वरि सांकडला । फाकु धरी ॥ १४ ॥
 क्षोभलेपणे माजे । उवाइला ठाई गाजे ।
 मणिफुलेंसीं जूझे । राहूनियां ॥ १५ ॥
 मग थावली ते बाहुंटली । सैग घेउनि घर डडुली ।
 बालपणिचि कोठली । बाहिर घाली ॥ १६ ॥
 भीतरि बलि न धरे । कोठेआं माक्षि संचेर ।
 कफपित्ताचे थारे । उरों नेंदी ॥ १७ ॥
 धातुचे समुद्र उलंडी । मेदाचें पर्वत फेडी ।
 आटली-मजा काढी । अस्तिगत ॥ १८ ॥
 नाडितें सोडवी । गात्रातें विघडवी ।
 साधकातें भेडसवी । परि बिहावें नां ॥ १९ ॥
 व्याधितें दावी । सर्वे चि हारवी ।
 आप पृथ्वी कालवी । एकावट ॥ २० ॥
 तव एरीकडे धनुर्दरा । आसनाचा उबारा ।
 शक्ति करी उजगरा । कुंडलिणि ॥ २१ ॥
 नागाचें पिलें । कुंकुमें न्हालें ।
 बलण देउनि आलें । सेजे जैसें ॥ २२ ॥
 तैसी ते कुंडलिणी । मोटकां ओंठे वलणीं ।
 अधोमुख सर्पिणी । निर्दली असं ॥ २३ ॥
 विद्युल्लुतेची विडी । बन्हिज्वालांची घडी ।
 पन्हरेयाची चोखडी । खोटी जैसी ॥ २४ ॥
 तैसी सुबद्ध आडली । पुटीं होती दाटली ।
 ते वज्रासनें चिमूटली । सावध होये ॥ २५ ॥
 तैथ नक्षत्र जैसें उलंडलें । कां सूर्याचें आसन मोडलें ।
 तैजाचें बीज विरुडलें । अंकुरेसीं ॥ २६ ॥

तैसी वेढेयांतें सांडिती । कवतिके आंग मोडिती ।
 कंदावारि शकति । उठिली दीसे ॥ २७ ॥
 साहजें बहुवां दिआंची भूक । वरि चेवविली तें होये मीख ।
 मग आवेसें पसरी मुख । ऊर्ध्वाउजू ॥ २८ ॥
 तेथ हृदयाकाशातलवटी । जो पवनु भरे किरीटी ।
 तेया सगलेयाची मीठी । देउनि घाली ॥ २९ ॥
 मुखिचां जालीं । तलीं वरि कुवली ।
 मांसाचिया वडवालीं । आरोगुं लागे ॥ ३० ॥
 जे जे ठाये समांस । तेथ आहाच जोडे घाउस ।
 पाठीं एकदोन घांस । ते ही भरी ॥ ३१ ॥
 मग तलवे तलहाथ शोधी । ऊर्ध्विचें खंड भेदी ।
 झाडा घे संधी । प्रत्यंगीचां ॥ ३२ ॥
 आधार तरि न संडी । परि नखिचें हीं सत्व काढी ।
 त्वचा धूनि जडी । पांजरेसीं ॥ ३३ ॥
 अस्थिचे नळे निरपे । शिरांचे हीर उरपे ।
 तबं बाहिरि विरुढि करपे । रोमबीजाची ॥ ३४ ॥
 मग सप्तधातुचां सागरीं । तान्हेली घोंटु भरी ।
 आणि सवें चि उन्हाला करी । खडखडितु ॥ ३५ ॥
 नासापुटौनि वारा । जो जांतु असे अंगुलें वारा ।
 तो गचि धरुनि माघारा । आंतु घाली ॥ ३६ ॥
 तेथ अध वरौतें आकुंचे । ऊर्ध्व तलहौतें खांचे ।
 तेआ खेवांमाझि चक्रांचें । पदर उरें ॥ ३७ ॥
 एन्हविं तेव्हां चि दोन्हीं मीलतीं । परि कुंडलिणी नाशेक दुचिती ।
 जे तेयांतें ह्मणे पन्हातीं । तुझीं काइसीं ॥ ३८ ॥
 आइकें पार्थिव धातु आघवी । आरोगितां काहीं मुरवी ।
 आणि आपातें तबं ठेवी । पूसुनियां ॥ ३९ ॥

ऐसी दौंही भूते खाये । तेहलि संपूर्ण धाय ।
 मग सौम्य होउनि राहे । सुषुप्तेपासी ॥ २४० ॥
 तेथ तृप्तिचेनि संतोषे । गरल जे वमी मुखे ।
 तेणे त्रियेचेनि विषे । प्राण जिये ॥ ४१ ॥
 तो आगी आंतौनि निगे । परि सबाह्य निववू चि लागे ।
 तेथ कसु बांधति आंगे । सांडिला पुडुती ॥ ४२ ॥
 मार्ग मोडथि नाडीचे । नवविधपण वायुचें ।
 जाये ह्मणौनि शरीरिचे । धर्म नाही ॥ ४३ ॥
 इडा पिंगला एकवटथि । गांठी तीन्हीं सूटति ।
 साही पदर फूटथि । चक्रांचे हे ॥ ४४ ॥
 मग शशि आणि भानु । ऐसा कल्पी जो अनुमानु ।
 तो वातिवरी मनु । गिवसितां न दिसे ॥ ४५ ॥
 बुद्धिची पुलिक विरे । परिमलु प्राणी उरे ।
 तो ही सकतीसवें संचरे । मध्यमेमाझि ॥ ४६ ॥
 तव वरिळीकडौनि ढाले । चंद्रामृताचें तले ।
 कानवडौनि भिले । शक्तिमुखी ॥ ४७ ॥
 तेणे नातकें रसु भरे । तो सर्वांगामाझि घरे ।
 जेथिचा तेथ मुरे । प्राणपवनें ॥ ४८ ॥
 तातलिये मूसे । मेण निगौनि जाये जैसे ।
 मग कोदळां ठाये रसे । उतलेनि ॥ ४९ ॥
 तैसी पिंडाचेनि आकारें । ते कला चि का अवतरे ।
 वरि त्वचेचेनि पदरें । पांगुतलीसे ॥ २५० ॥
 जैसी अमालिची बांध । कळनि राहे गभस्ति ।
 मग फीटलेयां दीप्ति । धरु नैण ॥ ५१ ॥
 तैसा आहाचुवरि कोरडा । त्वचेचा असे पातवडा ।
 तो झडौनि जाये कांडा । जैसा होये ॥ ५२ ॥

भग काश्मिराचें स्वयंभ । कां रत्नबीजा निगाले कोभ ।
 अवेवकांतिची भांभ । तैसी दीसे ॥ ५३ ॥
 ना तरि संध्यारागिचे रंग । काढुनि वळिलें तें आंग ।
 किं अंतर्ज्योतिचें लिंग । निर्वाळिलें ॥ ५४ ॥
 कुंकुआचें भरिवं । सिद्ध रसाचें उभतिव ।
 मज पाहातां सवेव । शांती चि तें ॥ ५५ ॥
 तें आनंदचिबिबें लेप । ना तरि महासुखाचें रूप ।
 किं संतोषतरुचें रोप । थावलें जैसें ॥ ५६ ॥
 तो कनकचंपकाचा कला । किं अमृताचा पूतला ।
 नाना सांसिनला मला । कोवळिकेचा ॥ ५७ ॥
 हों काज शारदियेचेनि उल्लें । चंद्रबिंब पाल्हेलें ।
 कां तेज चि मूर्त बैठलें । आसनावरि ॥ ५८ ॥
 तैसें शरीर होये । जेव्हालि कुंडलिणी चांद्र पिण ।
 भग देहाकृती बिहे । कृदांतु गा ॥ ५९ ॥
 वृद्धाप्य तन्हीं बाड्डडे । तारुण्याची गांठि विघडे ।
 छोपली उघडे । बालदशा ॥ ६० ॥
 वयसा तरि येतुली वेन्हीं । जें बलाचा बालार्थु करी ।
 घेयाची थोरी । निरूपम ॥ ६१ ॥
 कनकद्रुमाचां पालवीं । रत्नकलिकांची नवी ।
 बानी तैसी वरवीं । नाखें निगति ॥ ६२ ॥
 दांत ही आन होती । परि अपाडे सानेजांती ।
 जैसी दोबाहीं बैसे पांती । हीरेयांची ॥ ६३ ॥
 माणिकुलेयांचिया कणियां । सावियां चि अणुमाणिषां ।
 तैसिया सर्वांगीं उधवति अणियां । रोमेचिया ॥ ६४ ॥
 करचरणतलें । जैसीं कां रातोत्पलें ।
 परवाली होथि डोळे । काइ सांघों ॥ ६५ ॥

निडासचेंनि कौंधाटें । मोतियें नावरति संपुटें ।
 मम सिवाणि जैसी उतटे । शुक्तिपल्लवांची ॥ ६६ ॥
 तैसी पातेचिये कवलिये न समाए । दीठि जाकळनि निगों पाए ।
 आधिली चि परि होये । गगनखल्लिचें ॥ ६७ ॥
 आइकें देह होये सोनेयाचें । परि लाघव ये वायुचें ।
 जें आपा आणि पृथ्विचे । अंश नाही ॥ ६८ ॥
 भग समुद्रा पैलाडी देगे । स्वर्गिचा आलोचु आइके ।
 मनोगत ओलखे । मुंगियेचें ॥ ६९ ॥
 पवनाचां वारिकां बलघे । चाले तरि उदकीं पाउ न लगे ।
 एणें बड्ड काइ प्रसंगें । होति सिद्धि ॥ ७० ॥
 आइकें प्राणाचा हातु धरुनि । गगनाची पाउटी करुनि ।
 मध्यमेमाक्षिचेनि दादरेंहुनि । हृदया आली ॥ ७१ ॥
 जे कुंडलिणी जगदंबा । जे चैतन्यचक्रवर्तिची शोभा ।
 जिथी विश्वबीजाचेया कौंभा । साउली केली ॥ ७२ ॥
 जे शून्यलिंगाची पिंडी । जे परमात्मशिवाची करंडी ।
 जे प्राणाची उघडी । जन्मभूमी ॥ ७३ ॥
 हें असो ते कुंडली । हृदया आंतु आली ।
 तव अनाहताचां बोलीं । चावले ते ॥ ७४ ॥
 शक्तिचेया आंगा लागलें । बुद्धिचें चैतन्य होतें जालें ।
 तेणें तें आइकिलें । आलुमालु ॥ ७५ ॥
 घोषाचां कुंडीं । नादचित्तांचीं रूपडीं ।
 प्रणवाचिया मोडी । रेखिली जैसी ॥ ७६ ॥
 हें चि कल्पये तरि जाणिजे । परि आतां कल्पितें कैचें आणिजे ।
 तन्हें नेणों काइ वाजे । तिये ठाई ॥ ७७ ॥
 विसरौनि गेलों अर्जुना । जव नालु नाही पवनां ।
 तव वाचा आशि गगना । ह्मणौनि बोलें ॥ ७८ ॥

तेया अनाहताचेनि मेघें । मग आकाश दुसुदुम् लागें ।
 तवं ब्रह्मस्थानिचें बेगें । फाटे साहाजें ॥ ७९ ॥
 आइकें कमलगर्भाकारें । जें महदाकाश दूसरें ।
 जेथ चैतन्य आधुधुरे । करुनि असिजे ॥ ८० ॥
 तेया हृदयाचां परिवरीं । कुडलिया परमेश्वरी ।
 तेजार्चा सिधारी । विनियोगिली ॥ ८१ ॥
 बुद्धिचेनि शाकें । हातवोने नीकें ।
 द्वैत जेथ नेदगें । तेथ केलें ॥ ८२ ॥
 ऐसी निजकांति हारविली । मग प्राणाची केवल जाली ।
 तेव्हलि कैसी गमली । क्षणाची पां ॥ ८३ ॥
 हो कां जे पवनाची पूतली । पांगुतली होती सोनेसली ।
 तियें काढूनियां वेगली । ठेविलीं तिआ ॥ ८४ ॥
 ना तारि वारेआचेनि आंगें झगटली । दीपाची दीठि निमुटली ।
 कां लखुलखुनि हारतली । विजु गगनीं ॥ ८५ ॥
 तैसी हृदयकमलवेन्ही । दीसे सोनेयांची जैसी सरी ।
 ना तारि प्रकाशजलाची झरी । वाहांति आली ॥ ८६ ॥
 मग तिये हृदयभूमी पोकले । जिराली कां येकें बेलें ।
 ऐसें शक्तीचें रूप मावले । शक्तीमाझि ॥ ८७ ॥
 तेव्हां तन्हीं शक्ती चि मग झणिजे । एव्हविं तो प्राणु केवलु जणिजे ।
 आतां नादबिंदु नेणिजे । कलाज्योति ॥ ८८ ॥
 मनाचा हान मारु । कां पवनाचा धरु ।
 ध्यानाचा आदरु । नाना परीं ॥ ८९ ॥
 हे कल्पना घे सांडी । तें नाहिं इये परिवडी ।
 हे महाभूतांची फुडी । आटणी देखां ॥ ९० ॥
 पिंडें पिंडाचा ग्रासु । तो हा नाथसंकेतिचा डंसु ।
 परि दाउनु गेला उद्देशु । माहाविष्णु ॥ ९१ ॥

तेथ ध्वनिताचें केणें सोडुनि । यथार्थाची घडी झाडुनि ।
 उपलविली मियां जाणौनि । ग्राहिक श्रोते ॥ ९२ ॥
 आइकां शक्तिचें तेज लोपे । तेथ देहिचें रूप हारपे ।
 मग तें डोलेयां चि माझि लपे । जगाचेयां ॥ ९३ ॥
 यन्त्रविं आदिला चि ऐसें । सावयव तरि असे ।
 परि वायुचें जैसें । बलिलें आहे ॥ ९४ ॥
 ना तरि कदलिचा गाभा । वृंथि सांडुनु उभा ।
 कां अवेवु चि नभा । निवडला तो ॥ ९५ ॥
 तैसें होये शरीर । तैं तें ह्मणिजे खेचर ।
 हें पद होतां चमत्कार । पिंडुजनीं ॥ ९६ ॥
 देखैं साधकु निगौनि जाये । मागां पाउलाची उल्लि राहे ।
 तेथ ठांड चि होए । अणिमादिक ॥ ९७ ॥
 परि तेंणें काड आपणपेया । अवधारीं ऐसा धनंजया ।
 लोपु आधि भूतत्रया । देहिचा देहीं ॥ ९८ ॥
 पृथ्वीतें आप विरवी । आपातें तेज जिरवी ।
 तेजातें पवनु हारवी । न्हुदयामाझि ॥ ९९ ॥
 पाठिं येकला आपण उरें । परि शरीराचेनि अनुकारें ।
 मग तो ही निगे आंतरे । गगना मिलों ॥ ३०० ॥
 तेव्हलि कुंडलिणी हे भाक जाये । मग मारुती ऐसें नांव लाहे ।
 परि शक्तिपण तें आहे । जवें मिलेल शिवि ॥ १ ॥
 मग जालंधर सांडी । ककारांत फांडी ।
 गगनाचिये पाडी । पेंठी होए ॥ २ ॥
 तेथ उंकाराचिये पाठी । पाये देंत उठाउठी ।
 पश्यंतियेची पाउटी । मागां घाली ॥ ३ ॥
 पुढां तन्मात्रार्द्रवेन्ही । आकाशाचां आंतरीं ।
 भरति गमे सागरीं । सरिता जैसी ॥ ४ ॥

मग ब्रह्मरंध्रीं थिरावौनि । अहंभावाचिया बाह्या पसरुनि ।
 परतमलिंगा धावौनि । आंगा घडे ॥ ५ ॥
 तबं महां भूतांची जवनीक फीटे । मग दोहोंसीं ही होय शेटे ।
 तेथ गगनासकट आटे । समरसिं तिए ॥ ६ ॥
 पै मंत्राचेनि मुखें निवडला । समुद्र कां उम्वि पडिला ।
 तो माघौता जैसा आला । आपणपेआ ॥ ७ ॥
 पिंडाचेनि मीसें । पदीं पद प्रवेशे ।
 तें येकत्व होये तेसें । पांडुकुमरा ॥ ८ ॥
 आतां दुजें हान होतें । किं एक चि हें आइतें ।
 ऐसिये विवंचनेपुरतें । उरें चि ना ॥ ९ ॥
 गगनीं गगन लया जाये । ऐसां जे काहीं आहे ।
 तें अनुभवे जो होये । तो होउनि ठाके ॥ १० ॥
 ह्यणौनि तेथ चि मातु । न चडे चि बोलाचा हातु ।
 जेणें संवादाचेआ गांवां आंतु । पैठी कीजे ॥ ११ ॥
 अर्जुना यन्हविं तन्हें । एआ अभिप्रायाचा जे गर्भु धरी ।
 ते पाये पां बैखरी । दूरि ठेली ॥ १२ ॥
 भ्रूलता मागिलीकडे । तेथ मकाराचें चि आंग नडे ।
 सडेआ ग्राखा सांकडे । गगना एतां ॥ १३ ॥
 पाठीं तेथ चि तो भांसलला । तबं शब्दाचा दिउ भावलला ।
 मग तेया ही वरि आटु भविनला । आकाशाचा ॥ १४ ॥
 आतां महाशून्याचां डोहीं । गगनासी चि धाउं नाहीं ।
 तेथ तागा लागेल काइ । बोलाचा एआ ॥ १५ ॥
 ह्यणौनि आखरामाक्षि सांपडे । कां कानवरि जोडे ।
 हें तेसें न्हवे फुडें । विशुद्धी मा ॥ १६ ॥
 चें कहीं दैवें । अनुभविलें फाकवें ।
 तें आपण चि हें ठाकावें । होउनिआं ॥ १७ ॥

पुडुत्ती जाणणे तें नाही चि । ह्मणौनि असो केती हें चि ।
 बोलावें आतां वायां चि । धनुर्दरा ॥ १८ ॥
 ऐसें शब्दजात माघौतें फिरे । तेथ संकल्पाचें आयुष्य पुरे ।
 वारा ही जेथ सिरें । विचाराचा ॥ १९ ॥
 जें उन्मनियेचें लावण्य । जें तुरियेचें तारुण्य ।
 अनादि जें अगण्य । परमतत्व ॥ २० ॥
 जें आकाराचा प्रांतु । जें मोक्षाचा एकांतु ।
 जेथ आदि आणि अंतु । विरौनि गेलीं ॥ २१ ॥
 जें विश्वाचें येया मूल । जें योगद्रुमाचें फल ।
 जें आनंदाचें केवल । चैतन्य गा ॥ २२ ॥
 जें महाभूताचें बीज । जें महातेजाचें तेज ।
 पार्था जें निज । स्वरूप माझे ॥ २३ ॥
 हे चतुर्भुज कोंभैली । जेयाची शोभा चि रूपा आली ।
 देखौनि नास्तिकीं नोंकिलीं । भक्तवृंदें ॥ २४ ॥
 तें अनिर्वाच्य महासुख । पै आपण चि जाले पुरुष ।
 जेहांचें कां निष्कर्ष । प्राप्तिवेन्हीं ॥ २५ ॥

युंजन्नेवं सदात्मानं योगी नियतमानसः ॥

शान्तिं निर्वाणपरमां मत्संस्थामधिगच्छति ॥ १५ ॥

आखीं साधन जें हें सांधितलें । तें चि शरीरी जेही केलें ।
 ते अमचेन चि पाडें आलें । निर्वालेया ॥ २६ ॥
 परब्रह्माचेनि रसें । देहाकृतिचिये मूसे ।
 उ०तिवं जाले तैसे । दीसथि आंगें ॥ २७ ॥
 ना तारि प्रतीति हान आंतरिं फांके । तारि विश्व चि हे आघवें झांके ।
 तवं अर्जुनु ह्मणे नीकें । साच जी हें ॥ २८ ॥
 कां जें आपण आतां देउ ॥ हा बोलिजे जो उपाउ ॥
 तो प्राप्तिचा चि ठाउ ॥ ह्मणौनि घडे ॥ २९ ॥

इये अभ्यासी दृढ जे होंथि । ते भरवसेनि ब्रह्मत्वा एंथि ।
 हे सांघतियां चि रीती । कललें मज ॥ ३३० ॥
 देवा गोठि चि हे आइकतां । बोधु उपजत असे चित्ता ।
 मां अनुभवे तल्लीनता । नव्हल केवि ॥ ३१ ॥
 ह्मणौनि एथ काहीं । अनारिसें नाही ।
 परि नांभरि चित्त देई । बोला एका ॥ ३२ ॥
 आतां कृष्णा सांघितला योगु । तो मना तारि आला चांगु ।
 परि न सके करुं पांगु । योग्यसेचा ॥ ३३ ॥
 साहाजें आंगिक जेतुलें आहं । तेतुलिया चि जरि सिद्धी जाये ।
 तारि हा चि मार्गु सुखोपायें । अभ्यासीन ॥ ३४ ॥
 नातारि देऊ जैसी सांघतील । तैसी आपणपां जरि निदिसैल ।
 तारि योग्यताविण होइल । तें चि प्रसें ॥ ३५ ॥
 जीविची ऐसी धारण । ह्मणौनि प्रसावेया जालें कारण ।
 मग ह्मणे तारि आपण । चित्त देइजो ॥ ३६ ॥
 हां हो जी अवधारिलें । जें हें साधन तुम्हीं निरूपिलें ।
 तें आवडतेया ही अभ्यासिलें । पावों सके ॥ ३७ ॥
 किं योग्यतेविण नाही । ऐसें हान असें कांहीं ।
 तेथ कृष्ण म्हणथि तारि काई । धनुर्द्धरा ॥ ३८ ॥
 हें काज फिर निर्वाण । परि अनिक ही कांहीं जें साधारण ।
 तें अधिकाराचेनि उडवलेन विण । कायि सिद्धी जाये ॥ ३९ ॥
 पै योग्यता जे म्हणिजे । ते प्राप्ती चि आधीन जाणिजे ।
 कां जें योग्यां होनि कीजे । तें आरंभीं चि फले ॥ ४० ॥
 तैह तैसी एथ काहीं । साविह्यां चि कोणि नाही ।
 आणि योग्यांची काई । खाणि आहे ॥ ४१ ॥
 नाव एक विरक्तु । जाला देहधर्मि जरि नियतु ।
 तारि तो चि नव्हे व्यवस्थितु । अधिकारिया ॥ ४२ ॥

एतुलालिए आणिमाझिंबडे । योग्यपण तूतें हीं जेडे ।
 ऐसे प्रसंगे सांकडे । फेडिले तेयाचें ॥ ४३ ॥
 मग म्हणे पार्था । हे ते ऐसी चि व्यवस्था ।
 अनियतासि सर्वथा । योग्यता नाही ॥ ४४ ॥

मात्थश्रतस्तु योगोस्ति न चैकान्तमनश्रतः ।

न चातिस्वप्नशीलस्य जाग्रतो नैव चाजुर्न ॥ १६ ॥

जो रसनेंद्रियांचा आंकला । कां निद्रेसि जीवें वीकला ।
 तो नाही एथ म्हणितला । अधिकारिया ॥ ४५ ॥
 अथवा आग्रयाचिये बांधौडी । क्षुधातृषा इये कोंडी ।
 आहारातें तोडी । मारुनियां ॥ ४६ ॥
 निद्रेचिया वाटा न वचे । ऐसा दंडीचेनि अवतरणें नाचें ।
 तें शरीर चि नव्हे तेयाचें । मग योगु कवणां ॥ ४७ ॥

युक्ताहारविहारस्य युक्तचेष्टस्य कर्मसु ।

युक्तस्वप्नावबोधस्य योगो भवति दुःखहा ॥ १७ ॥

म्हणौनि अतिशयें विषयमेवा । तैसा बोलु न व्हावा ।
 कां सर्वनिरोधु करावा । तें हीं नकां ॥ ४८ ॥
 आहार तरि सेविजे । परि युगुतिचेनि मापें मविजे ।
 क्रियाजात आचरिजे । तिया चि स्थिती ॥ ४९ ॥
 मितलां बोलीं बोलिजे । मवलां पाटलिं चालिजे ।
 निद्रे ही मानु दीजे । अवसरें येकें ॥ ५० ॥
 जागणें जन्हें जालें । तन्हें तें ही होआवें मितलें ।
 एतुलेनि धातुसाम्य सांचलें । असैल सुखें ॥ ५१ ॥
 ऐसें युगुतिचेनि हाथें । जै इंद्रियां उप्पे भातें ।
 तें संतोषासि वाढतें । मनु चि करी ॥ ५२ ॥
 बाहिरि युगुतीची मुद्रा पडे । तवें आंतु सुख वाढे ।
 येथ साहाज चि योगु घडे । नाम्यासितां ॥ ५३ ॥

भाष्याच्चिचि भंडसे । उद्यमाचेनि मीसे ।
 समृद्धिजात जैसे । घर रिगों ये ॥ ५४ ॥
 तैसा युगुतिमंत कवतिकें । अभ्यासाचिये मोहरे ठाके ।
 आणि आत्मसिद्धि चि पीके । अनुभों तेयाचा ॥ ५५ ॥

यदा विनियतं चित्तमात्मन्येवावतिष्ठते ।
 निस्पृहः सर्वकामेभ्यो युक्त इत्युच्यते तदा ॥ १८ ॥

म्हणौनि युक्ति हे पांडवा । घडे जेया सदैवा ।
 तो अपवर्गिचिया राणिवा । अलंकरेजे ॥ ५६ ॥
 युक्तियोगाचें आंग पावे । ऐसें प्रयाग होये बरवें ।
 तेथ क्षेत्रसंन्यासें थिरावे । मानस जेहाचें ॥ ५७ ॥

यथा दीपो निवातस्थो नैगते सोपमा स्मृता ।
 योगिनो यताचित्तस्य युंजतो योगमात्मनः ॥ १९ ॥

तेयांतें योगयुगुतु ह्मण । प्रसंगें हें हीं जाण ।
 तेया दीपाचें उपलक्षण । निर्वातिचेया ॥ ५८ ॥
 आतां तूझे मनोगत जाणौनि । कांहिं येक आर्म्ह म्हणौनि ।
 तें नीकें चित्त देउनि । परियसावें ॥ ५९ ॥
 तूं प्राप्तिची चाड वाहांसी । परि अभ्यासिं दक्षु नोहोंसि ।
 तें सांघ पां काड विहसी । दुवाडपणां ॥ ६० ॥
 तरि पार्था हें ज्ञनें । सायास घोंसि हो मनें ।
 बायां बागुलु इयें दुर्जनें । इंद्रियें करिति ॥ ६१ ॥
 पाये पां आयुष्याचा आडलु करीं । जें सरतें परिणामु वेन्हीं ।
 तेया औषधातें काड वैरी । जिव्हा न ह्मणे ॥ ६२ ॥
 ऐसें हितासि जें जें नीकें । तें सदा चि एआं दुःखें
 यन्हवि सोहोपें योगासारिखें । कांहिं आहे ॥ ६३ ॥

हृणीनि अवसानाचिया गाढिका ।

जो आह्मी अभ्यासु सांघितला नीका ।

तेणें होईल तरि हो कां ।

निरोधु एआं ॥ ६४ ॥

यत्रोपरमते चित्तं निरुद्धं योगसेवया ।

तत्र चैवात्मनात्मानं पश्यन्नात्मनि तुष्यति ॥ २० ॥

यन्हाविं तन्है थोगें । जें इंद्रियां विंदाण लागे ।

तैं चि चित्त भेटों निगे । आपणपेया ॥ ६५ ॥

परतौनि पाठिमोरें ठाके । आणि आपणपेयांतें आपण देखे ।

देखतखेओ ओलखे । ह्मणे तत्व हें मीं ॥ ६६ ॥

तिये ओलखी चि सरिसें । सुखाचां साम्राज्यां वैसे ।

पूथ चित्तपण समरसें । विरोनि जाये ॥ ६७ ॥

सुखमात्यंतिकं यत्तद्बुद्धिग्राह्यमतींद्रियं ।

वेत्ति यत्र न चैवायं स्थितश्चलति तत्त्वतः ॥ २१ ॥

मग मेरूपासौनि थोरें । देहदुःखाचेनि डोंगरें ।

दाटिजो पां परिभारें । चित्त न दटे ॥ ६८ ॥

कां शस्त्रवारि तोडिलेआं । देह आगीमाझि पडिलेआं ।

चित्त महासुखीं पवढलेआं । चेअ नए ॥ ६९ ॥

ऐसें आपणपां रिगौनि ठायें । मग देहाची वास न पाये ।

आणि तें सुख चि होउनि जाण । ह्मणौनि विसरे ॥ ३७० ॥

यं लब्ध्वा चापरं लाभं मन्यते नाधिकं ततः ।

यस्मिन्स्थितो न दुःखेन गुरुणापि विचाल्यते ॥ २२ ॥

जेभ्हा सुखाचिआ जोडी । मन आर्त्तिची से चि सांडी ।

सारासाराचें तोडी । गुंतलें जें ॥ ७१ ॥

जें योगाची बरव । संतोषाची राणिव ।

ज्ञानाची जाणिव । जेयालागी ॥ ७२ ॥

एन्हविं तन्हीं अर्जुना । जो एकावटलिआ भावना ।

सर्व भूतीं अभिन्ना । मातें भजे ॥ ९२ ॥

भूतांचेनि अनेकपणें । अनेकु नोहे अंतष्करणें ।

केवल एकत्व चि माझे जाणे । सर्वत्र जो ॥ ९३ ॥

यो मां पश्यति सर्वत्र सर्वं च मयि पश्यति ।

तस्याहं न प्रणश्यामि स च मे न प्रणश्यति ॥ ३० ॥

मग तो एकु हे माया । बोलतां दीसतसे वायां ।

यन्हवीं न बोळिजे तारि धनंजया । तो मीं आहे ॥ ९४ ॥

तन्हें दीपा आणि प्रकाशा । एकवंकैयेचा पाडु जैसा ।

तो माझां ठांडे तेसा । मी तेयामाझि ॥ ९५ ॥

जैसा उदकाचेनि आयुष्यें रमु । कां गगनाचेनि मानें अवकाण्ण ।

तेसा माझेनि रूपें रूपसु । पुरुषु गा तो ॥ ९६ ॥

सर्वभूतस्थितं यो मां भजत्येकत्वमास्थितः ।

सर्वथा वर्तमानोऽपि स योगी मयि वर्तते ॥ ३१ ॥

जेणें ऐक्याचिया दीठी । सर्वत्र मातें चि किरीटी ।

देखिलें जैसा पटीं । तंतु एकु ॥ ९७ ॥

कां सरूपें तरि बहुतें आथि । परि तैसिं सोनिं बहुतें नोहोंति ।

ऐसी ऐक्याचलार्चा बुंधी । केली जेणें ॥ ९८ ॥

ना तरि वृक्षाचिं पानें जेतुलीं । तेतुलीं रोपें नाहिं लाविलीं ।

ऐसी अद्वैतदिवसें पाहालीं । रात्रि जेआं ॥ ९९ ॥

तो पंचात्मिकीं सांकडे । मग सांघ पां कैसेनि अडे ।

जो प्रतीतिचेनि पाडें । मासिं तूके ॥ १०० ॥

माझे व्यापकपण आघवें । गवसलें तेयाचेनि अनुभवें ।

तारि न ह्मणतां स्वभावें । व्यापकु जाला ॥ १ ॥

आत्मौपम्येन सर्वत्र समं पश्यति योऽर्जुन ।

सुखं वा यदि वा दुःखं स योगी परमो मतः ॥ ३२ ॥